

ယောဟန်

ယောဟန် ရေးဟူးဟူ ခရစ်တော်ရဲ့

ဒန်းကောန်း

နိဒါန်း

ယောဟန် ရေးဟူးဟူ ခရစ်တော်ရဲ့ ဒန်းကောန်းဟာ ယေရှုခရစ်တော်ရဲ့ သတ်တော်စဉ်ဟို့ ဖော်ပြဟူးဟူ ဓမ္မသစ်ကျမ်းထဲမှာ ကျမ်းလေးစောန်ထဲဟု တစောန်ဖြစ်ဟူ ယ်။ အယ်ကျမ်းတစောန်စီဟို့ “ဧဝံဂေလိ” ဆိုဘီး ခေါ်ဟူယ်။ “ဒန်းကောန်း” ဆိုဘီး ဓိပါယ်ရဟူယ်။ ယေရှုသေဆောင်းဘီးန အယ်ကျမ်းလေဟို့ မသဲ၊ မာကု၊ လုကာန ယောဟန်ဟု ရေးဟူးဟူယ်။ ယောဟန်ရေးဟူ ဒန်းကောန်းဟာ ခရစ်တော် မွီးဘီးန ၉၀ ခုနှစ်လော့-က်မာ တမန်တော် ယောဟန်ဟု ရေးဟူးဇာ ဖြစ်နိုင်ဟူယ်။ အယ်ကျမ်းမာ ယောဟန်ဟာ ကျမ်းရေးသူ ဖြစ်ဟူယ် ဆိုဘီး ပြောဟူးဘေမဲ့လည်း စာရေးသားပေါင်စံဟာ ယောဟန်ရဲ့ ပထမပေးစာ၊ ယောဟန်ရဲ့ ဒုတိယပေးစာ၊ ယောဟန်ရဲ့ တတိယပေးစာန ရရာတိုင်း တူညီလေဟူယ်။ ယောဟန်ဟာ အယ်ခိဒူးဟု ဖောက်မြို့မာ နေဟူကြောန့် အယ်ကျမ်းဟို့ ဖောက်မြို့မာ ရေးဟူးဇာဖြစ်မယ် ဆိုဘီး ရှေးခေတ်စာရေးဆရာလေဟု သတ်မှတ်ဂေဟူယ်။

ယေရှုဟာ သတ်ရှင်ဟူ ဘုရားသခင်ရဲ့ သားတော် (၂၀.၃၁)၊ ခရစ်တော် ဖြစ်ဟုယ် ဆိုဇာဟို့ လူလေယောင် ကြည်အောန် ကူညီဟို့တွပ် ဖြစ်ဟုယ် ဆိုဘီး ယောဟန်ဟာ အယ်ကျမ်းရဲ့ ရည်ရွယ်ချစ်ဟို့ ရှင်းရှင်းလန်းလန်း ဖော်ပြဟူးဟုယ်။ အယ်မျိုး ယောင်ကြည်ဇာအားဖြင့် နို့လေဟာ ကိုယ်တော်နာမနှိုက် သတ်ဟို့ ရဂေမယ်။ အယ်ကျမ်းဟာ ယုဒလူမျိုးလေန ယုဒလူမျိုးမှုဘဲဟူ စာဖတ်မားလေ နွေမျိုးလောင်းတွပ် ရေးဟူးလေဟုယ်။ ယောဟန်ရဲ့ ဒန်းကောန်းကျမ်းဟာ တချို့နေရာလေမာ တခြားဒန်းကောန်း သောင်းစောန်န ရရာတိုင်း ကွာခြားလေဟုယ်။ သူဟာ ယေရှုလောက်ဆောန်ဟူးဟူ နိမိတ်လတ်ခဏဟို့ ရေးဟူးဘီး ကိုယ်တော်ရဲ့ ပေါန်ဥပမာလေကြောင်းဟို့ ဘောင်ဂီးရေးဟုမ်း။ ယေရှုရဲ့ ဗတုတိဇံဇာန တောကန္တာရထဲမာ စောင်ဇမ်းခံရဇာလေမျိုးနတူဟူ တခြားခိက ဖြစ်ပျစ်လေဟို့လည်း အယ်ဒန်းကောန်းထဲမာ ရေးဟုမ်း။

ကြောင်းရာ ကျဉ်းချောက်

၁။ ယောဟန်ဟာ အယ်ဒန်းကောန်းကျမ်းဟို့ စပြုဟူးဟူကြောင်း (၁.၁-၁၈)

၂။ သူဟာ ယေရှုလောက်ဆောန်ဟူးဟူ နိမိတ်လတ်ခဏလေ ဘောင်းဇောင်ဟို့ ရေးဟူးဟူကြောင်း (၁.၁၉-၁၂.၅၀)

၃။ နှော့-က်ဘီးဟာ သူဟာ ယေရှုရဲ့ သတ်တော်စဉ်ထဲမာ ဖြစ်ပျစ်လေ ဘောင်းဇောင်ဟို့ ဖော်ပြဘီး

ကိုယ်တော်ရဲ့ သေခံဇာနည် ထမြော့-က်ဇာထိ ဆွဲခေါ်
ဟူးဟူကြောင်း (၁၃.၁—၂၀.၃၁)

၄။ ယောဟန်ဟာ ယေရှုရဲ့ သေရာဟုနေ ထမြော့-က်
ဘီးနဲ့ လူလေဟို့ ထန်ရှားပြဇာလေ ဘောင်ဂီးထဲဟု
တခုဟို့ ပြောပြဘီးဟာ အယ်ကျမ်းရေးဟူးဟူ သူရဲ့
ရည်ရွယ်ချစ်ဟို့ ဖော်ပြလိုက်ဘီး အယ်ဒန်းကောင်းဟို့
ဆောင်းသတ်လိုက်ဟူကြောင်း (၂၁.၁-၂၅)

သတ်ရှင်ဟူ စကားတော်

¹ စစဒူးဟု စကားတော်* ဟာ ရှိဘီးသားဖြစ်ဟယ်။ အယ်
စကားတော်ဟာ ဘုရားသခင်နတူးဒူ ရှိနေဟယ်။ အယ်
စကားတော်ဟာလည်း ဘုရားသခင်ဖြစ်ဟယ်။

² အယ်စကားတော်ဟာ စစဒူးဟု ဘုရားသခင်နတူးဒူ ရှိ
နေဟယ်။

³ ဘုရားသခင်ဟာ စကားတော်နဘဲ ရှိမျှဂူလောင်းဟို့ ဖန်
ဆင်းဟူးဟယ်။ ဖန်ဆင်းဘဲန ဖြစ်နေဇာလေ တခုလည်း
မဲ့ဟူ။

⁴ စကားတော်ဟာ သတ်ရဲ့ ရင်းမြစ်ဖြစ်ဟယ်။† အယ်
ဘီးဟာ အယ်သတ်ဟာ လူလေနားဟို့ လန်းရောန်ဟို့ သယ်
ဆောက်လာဟယ်။

* 1:1 ၁.၁ စကားတော်၊ ဟာ ခရစ်တော်ဟို့ ရည်ညွှန်းဟူးဟယ်။ † 1:4
၁.၄ စကားတော်ဟာ သတ်ရဲ့ ရင်းမြစ်ဖြစ်ဟယ်။ အယ်မျိုးမူဘဲနေဟာ
သတ်ဟာ စကားတော် နတူးဒူ ပေါင်းစည်းလိုက်ဟယ်။

5 အယ်လန်းရောန်ဟာ မှောက်ထဲမှာ လန်းထီနေဟယ်။
အယ်ဘီးဟာ အယ်မှောန်ဟာ အယ်လန်းရောန်ဟို ဖောင်း
နိုင်ဟယ်။

6 ဘုရားသခင်ဟာ ယောဟန် နာမယ်ရှိဟူ လူတ
ယော့-က်ဟို မိမိရဲ့ စေတမန်ဖြစ်န စေလွှတ်လိုက်ဘီး၊

7 လူလေဂူလောင်းဟာ တရားစကားဟို ကြားဘီးန
ယောင်ကြည်ဟိုတွပ် အယ်လူဟာ လန်းရောန်ကြောင်းဟို
သတ်သေခံဟို လာဟယ်။

8 သူကိုယ်တိုင်ဟာ လန်းရောန် မူဟယ်။ လန်းရောန်ကြော
န်းဟို သတ်သေခံဟိုတွပ် လာဟယ်။

9 အယ်စစ်မှန်ဟူ လန်းရောန်ဟာ လောကဟို ကြွလာဘီး
န လူလေ ဂူလောင်းထတ်မှာ လန်းထီဟယ်။

10 စကားတော်ဟာ လောကထဲမှာ ရှိဟယ်။ ဘုရားသခင်
ဟာ ကိုယ်တော်အားဖြင့် လောကဟို ဖန်ဆင်းဟူးဟယ်။
အယ်ဘေမဲ့ အယ်လောကဟု ကိုယ်တော်ဟို သိဂေဟယ်။

11 ကိုယ်တော်ဟာ သူဒေသဟို ပုလန်လာဟယ်။ အယ်
ဘေမဲ့ ကိုယ်တော်ရဲ့ လူမျိုးလေဟု ကိုယ်တော်ဟို လတ်ခံ
ဂေဟယ်။

12 အယ်ဘေမဲ့ တချို့ဟု ကိုယ်တော်ဟို လတ်ခံဘီး
ကိုယ်တော်ရဲ့ နာမဟို ယောင်ကြည်ဟယ်။ အယ်ကြောန်
ကိုယ်တော်ဟု သူးနှိဟို ဘုရားသခင်ရဲ့ သားမီးလေဖြစ်ခွ
မ့်ပေးဟယ်။

13 သူ့နှို့ဟာ သွီးသားရှင်းပေါင်းဘီး ပေါ့-က်လာဟူ သားမီးလေ မူဟူ။ လူသားဖဟုနေ ပေါ့-က်လာဟူ သားမီးလေ မူဟူ။ ဘုရားသခင်ဟုနေ ပေါ့-က်လာဟူ သားမီးလေဖြစ်ဟယ်။

14 စကားတော်ဟာ လူသားဖြစ်လာဘီး ကျေးဇူးတော်န သမ္မာတရားန ပုလဲဇောင်ဘီးဟာ နို့လေထဲမာ စံမြန်းနေဟယ်။ နို့လေဟာ ကိုယ်တော်ရဲ့ ဖောင်းသရေတော်ဟို့ မြင်ရဘီ။ အယ်ဖောင်းသရေတော်ဟာ ဖရဲ့ တယော့-က်ဒဲရှိဟူ သားဖြစ် လတ်ခံရရှိဟယ်။

15 ယောဟန်ဟာ ကိုယ်တော်ရဲ့ ကြောန်းဟို့ “‘ငါ့နော့-က်ဟုနေ ကြွလာဟူသူဟာ ငါမိုးခန်ဂဒဲဟု ရှိနေကြောန့် ငါ့ထတ်ကီးမြတ်ဟယ်’ ဆိုဇာဟို့ ငါပြောဟူးဟူသူဟာ အယ်လူဘဲ ဖြစ်ဟယ်” ဆိုဘီး အော်ပြောဘီး သတ်သေခံလေဟယ်။

16 ကိုယ်တော်ရဲ့ ကျေးဇူးတော် ပုလဲဇောင်မူဟုနေ နို့လေဂူလောင်းဟာ ကောန်းဂျီးလေ ခုဘီးခု လတ်ခံရရှိဟယ်။

17 ဘုရားသခင်ဟာ မောရှေအားဖြင့် ပညတ်တရားဟို့ ပေးဟယ်။ ကျေးဇူးတရားန သမ္မာတရားဟို့ ယေရှုခရစ်တော်အားဖြင့် ဖြစ်လာဟယ်။

18 ဘုရားသခင်ဟို့ ဖယ်လူလည်းမြင်ဖူးဟူ။ ဖရဲ့ ရင်ခွမ်မာရှိဟူ၊ ဘုရားသခင်ဖြစ်ဟူ၊ တယော့-က်ဒဲဟူသားဟာ ဘုရားသခင်ဟို့ ထန်ရှားစေဘီ။

ဗတုတိဇိယောဟန်ရဲ့ တရား

(မသဲ ၃.၁-၁၂; မာကု ၁.၁-၈; လုကာ ၃.၁-၁၈)

¹⁹ ခု ယေရုရှလင်မြို့ဟု ယုဒလူ အာဏာပိုင်လေဟာ ယဇ်ပုရောဟိတ်လေန လေဝိတချို့ဟို့ ယောဟန်နားဟို့ စေလွှတ်ဘီး “နန်ဟာ ဖယ်သူနူး” ဆိုဘီး မေးမြန်းလေဟာ ယ်။ ယောဟန်ရဲ့ သတ်သေခံချစ်ဟာ အယ်မျိုးဖြစ်ဟယ်။

²⁰ ယောဟန်ဟု လှည့်ဝှက်ဇာမ္မေဘဲန ဝန်ခံဘီး “ငါဟာ မေရှိယ မှဟု” ဆိုဘီး ပွမ့်ပွမ့်လန်းလန်းဟားန ရှင်းရှင်း လန်းလန်းဟားဘဲ ပုလန်ဖြေလိုက်ဟယ်။

²¹ “အယ်ဆိုဟာ နန်ဟု ဖယ်သူနူး။ နန်ဟာ ဧလိယလော” ဆိုဘီး သူးနို့ဟု မေးလိုက်ဟယ်။

“ငါဟာ ဧလိယ မှဟု” ဆိုဘီး ယောဟန်ဟု ပုလန်ဖြေ ဟယ်။

“နန်ဟာ ပရောဖက်လော”[‡] ဆိုဘီး သူးနို့ဟု ပုလန်မေး ဟယ်။

“ငါဟာ ပရောဖက်လည်း မှဟု” ဆိုဘီး ပုလန်ဖြေဟ ယ်။

²² “အယ်ဆိုဟာ နန်ဟု ဖယ်သူနူး။ နို့လေဟို့ စေလွှတ် လိုက်ဟူ လူလေဟို့ ပုလန်ဘီးပြောပြရမယ်။ နန့်ကြောင်း ဟို့ ဖြားမျိုးပြောမယ်နူး” ဆိုဘီး သူးနို့ဟု မေးလေဟယ်။

²³ ယောဟန်ဟာ ပရောဖက်ဟောရှာယဟို့ ကိုးကားဘီး “ငါဟာ ‘ဘုရားသခင်ရဲ့ လမ်းဟို့ ပြင်ဆင်ဟားဂေ့! ဆိုဘီး

[‡] 1:21 ၁.၂၁ ပရောဖက်၊ မေရှိယကြွလာဟို့တွပ် ကြေညာဟူ သူန ပေါ်ထွပ်လာဟို့တွပ် မျှော်လင့်နေဟူသူ။

တောကန္တာရထဲမှာ အော်ဟစ်နေဟူ သံဖြစ်ဟယ်” ဆို
ဘီး ပုလန်ဖြေလိုက်ဟယ်။

24 ဟရိရဲ့လေ စေလွှတ်လိုက်ဟူ စေတမန်လေဟု၊

25 ဟရိရဲ့လေ စေလွှတ်လိုက်ဟူ စေတမန်လေဟု “နန်
ဟာ မေရိယလည်း မှဟု။ ဇလိယလည်း မှဟု။ ပရောဖက်
လည်း မှဟု ဆိုဟာ ဖြားဖြစ်ကြောင့် ဗတုတိဇိပေးနေနူး”
ဆိုဘီး ယောဟန်ဟို မေးလေဟယ်။

26 ယောဟန်ဟာ “ငါဟာ ရေန ဗတုတိဇိပေးဟယ်။
အယ်ဘေမဲ့ နန်းနို့ထဲမှာ နန်းနို့သိဘဲဟူ လူတယော့-က်ရို
ဟယ်။

27 သူဟာ ငါ့နှော့-က်ဟု ကြွလာနေဘီ။ အယ်ဘေမဲ့ ငါ
ဟာ သူရဲ့ ခေနပ်ကြိုးဟို ဖြေဟိုဟိုမှ ထိုက်ဟု” ဆိုဘီး ပု
လန်ဖြေလိုက်ဟယ်။

28 အယ်မူဇာ ဂူလောင်းဟာ ယောဟန် ဗတုတိဇိပေးဟူ
ယော်ဒန်မှလစ်ရဲ့ ရှေ့ဖတ်ကမ်းဟု ဗေသနိဝါမှာ ဖြစ်ဟား
ဟယ်။

ဘုရားသခင်ရဲ့ သိုးသားဂန်းဟား

29 နတ်ကီးဖတ်မှာ ယောဟန်ဟာ သူနားဟို ယေရှုလာနေ
ဇာဟို မြင်လိုက်ဟူ ခီမှာ “လောကသားလေရဲ့ ပြစ်ဟို ယူ
ဆောန်ဟားဟူ ဘုရားသခင်ရဲ့ သိုးသားဂန်းဟားဟို ကေ့
ကေ့!

§ 1:25 **၁.၂၅** ဟရိရဲ့လေ စေလွှတ်လိုက်ဟူ စေတမန်လေ၊
အယ်မျိုးမှူးဘဲနေဟာ အယ်စေတမန်လေဟာ ဟရိရဲ့လေဖြစ်ဟယ်။

30 ‘နော-က်ဟုနေ ကြွလာဟူသူဟာ ငါမိုးခန်ဂဒဲဟု ရှိနေကြောန့် ငါထတ်ကီးမြတ်ဟယ်’ ဆိုဘီး ငါပြောနေဇာဟာ အယ်လူကြောန်းဘဲ ဖြစ်ဟယ်။

31 ငါကိုယ်တိုင်လည်း အယ်လူဟို့ သိဟု။ အယ်ဘေမဲ့ ကုသရေလလူမျိုးလေဟို့ သိစေဟို့တွပ် ရေန ဗတုတိဇံ ပေးဟို့ ငါလာဟယ်” ဆိုဘီး ပြောလေဟယ်။

32 အယ်န ယောဟန် သတ်သေခံဇာဟု “ဝိညာဉ်တော်ဟာ ကောန်းဂန်ဘောင်ဟုနေ ချိုးငှတ်မျိုး ဆင်းလာဘီး အယ်လူထတ်မာ နားနေဇာဟို့ ငါမြင်ဟယ်။

33 အယ်လူဟာ ဖယ်လူဖြစ်ဟယ် ဆိုဇာဟို့ ငါသိဟု။ အယ်ဘေမဲ့ ငါ့ဟို့ ရေန ဗတုတိဇံပေးဟို့ စေလွှတ်ဟူ ဘုရားသခင်ဟု ‘သန့်ရှင်းဟူဝိညာဉ်တော်ဟာ ဆင်းလာဘီး ယော့-က်ယော့-က်ထတ်မာ နားနေဇာဟို့ မြင်ရလေမယ်။ အယ်လူဟာ သန့်ရှင်းဟူဝိညာဉ်တော်န ဗတုတိဇံ ပေးမယ်လူ ဖြစ်ဟယ်’ ဆိုဘီး ငါ့ဟို့ ပြောလေဟယ်။

34 အယ်ဇာဟို့ ငါမြင်ရဘီ။ အယ်ကြောန့် နန်းနို့ဟို့ ငါပြောမယ် အယ်လူဟာ ဘုရားသခင်ရဲ့သား ဖြစ်ဟယ်” ဆိုဘီး ယောဟန် သတ်သေခံလေဟယ်။

ယေရှုရဲ့ ဦးဆောင်းတမဲ့တော်လေ

35 နတ်ကီးတိုင်မာ ယောဟန်ဟာ တမဲ့တော်နေ့ပါးနတူးဒူ အယ်နေရာမာ ပုလန်ဘီးရပ်နေဟယ်။

36 ယောဟန်ဟာ ယေရှု ကြွလာနေဇာတို့ မြင်လိုက်ဟယ်။ “ကေ့ကေ့! ဟောက်မာ ဘုရားသခင်ရဲ့ သိုးသားဂန်းဟား ဖြစ်ဟယ်!” ဆိုဘီး သူဟု ပြောဟယ်။

37 တမဲ့တော်နေ့ပါးဟာ အယ်မျိုးပြောဇာတို့ ကြားလိုက်ဘီးန ယေရှုနတူးဒု လိုက်ဟားဂေဟယ်။

38 ယေရှုဟု လှည့်ကေ့လိုက်ဘီး သူးနို့လေ လိုက်လာဇာတို့ မြင်လေဟယ်။ အယ်န “ဖြားဇာရှာနေနူး” ဆိုဘီး သူးနို့ဟို မေးလေဟယ်။

သူးနို့ဟု “ရဗ္ဗဗိ၊ ကိုယ်တော်ဟု ဖယ်မာနေဟယ်နူး” ဆိုဘီး မေးလေဟယ်။ (ရဗ္ဗဗိရဲ့ ဓိပါယ်ဟာ “ဆရာ” ဖြစ်ဟယ်။)

39 “လိုက်ဘီးကေ့ဂေ့” ဆိုဘီး ကိုယ်တော်ဟု ဖြေဟယ်။ (အယ်ခိဟာ နေဒန်ဇာလေးနာရီလော့-က်ရှိဘီ။) အယ်ကြောန့် သူးနို့လေဟာ ကိုယ်တော်နတူးဒု လိုက်ဟားဘီး ကိုယ်တော်နေဟူ နေရာဟို တွဲဟားလေဟယ်။ အယ်ဘီးန အယ်နေဟို ကိုယ်တော်နတူးဒု နေလေဟယ်။

40 ယောဟန်ရဲ့ စကားဟို ကြားဘီး ယေရှုနော့-က်လိုက် ဖြစ်လာဟူ နေ့ယော့-က်ထဲဟု တယော့-က်ဟာ ရှိမုန်ပေတရုရဲ့ညီ အနုဒြေဖြစ်ဟယ်။

41 ရှစ်ရှင်းဘဲ အနုဒြေဟာ သူ့နောန်ရှိမုန်ဟို တွဲဟားခိမာ “နို့လေ မေရှိယဟို တွဲဟားဘီ” ဆိုဘီး ပြောပြဟယ်။ မေရှိယရဲ့ ဓိပါယ်ဟာ “ခရစ်တော်” ဖြစ်ဟယ်။

42 အယ်ဘီးန သူဟု ရှိမုန်ဟို့ ယေရုဇာဗဲဟို့ ခေါ်ဆောန်ဟူးဟယ်။

ယေရုဇာ အယ်လူဟို့ ကေဘီးန “နန်ဟာ ယောဟန်ရဲ့ သား ရှိမုန်ဖြစ်ဟယ်။ အယ်ဘေမဲ့ နန်ဟို့ ကေဖ ဆိုဘီး ခေါ်ရမယ်” ဆိုဘီး ပြောလိုက်ဟယ်။ ကေဖဟာ ပေတရု နာမယ်န ထပ်တူဖြစ်ဘီး ကုလော့-က် ဆိုဘီး ဓိပါယ်ရဟယ်။

ယေရုဇာ ဖိလိပ္ပုန နာသနေလဟို့ ခေါ်ဟူကြောင်း

43 နတ်ကီးတိုင်မာ ယေရုဇာ ဂါလိလဲနယ်ဟို့ သွားဟို့ ဆောင်းဖြတ်ဟယ်။ ကိုယ်တော်ဟာ ဖိလိပ္ပုဟို့ တွံဟူ ခီမာ “ငါနတူးဒုလိုက်ပါ!” ဆိုဘီး သူဟို့ ပြောလေဟယ်။

44 ဖိလိပ္ပုဟာ အနုဒြေန ပေတရု နေထိုင်ဟူ ဗက်ဒဲဒ မြို့ဟုဖြစ်ဟယ်။

45 ဖိလိပ္ပုဟာ နာသနေလဟို့ တွံဟူ ခီမာ “နီလေဟာ မောရှေရဲ့ ပညတ်ကျမ်းန ပရောဖက်လေရဲ့ ကျမ်းမာ ရေးဟူးဟူလူဟို့ တွံဟူးဘီ။ အယ်လူဟာ နာဇရက်မြို့ဟု ယောသပ်ရဲ့သား ယေရုဖြစ်ဟယ်” ဆိုဘီး ပြောပြလေဟယ်။

46 “နာဇရက်မြို့ဟုနေ ကောင်းဟူဇာ ထွပ်နိုင်ဘဲ့လော” ဆိုဘီး နာသနေလဟု မေးဟယ်။

“လာဘီးကေကေ” ဆိုဘီး ဖိလိပ္ပုဟု ဖြေလေဟယ်။

47 ယေရုဇာ သူနားဟို့ လာနေဟူ နာသနေလဟို့ မြင်ဟူ ခီမာ ကိုယ်တော်ဟု “ကေကေ! လှည့်ဇားမှု လောင်းဝ မှေ့

ဘဲဟူ၊ စစ်မှန်ဟူ ကုသရေလလူ ဖြစ်ဟုယ်!” ဆိုဘီး သူ့ဟို ပြောဟုယ်။

⁴⁸ နာသနေလဟု “ကိုယ်တော်ဟု ကျွန်တော်ဟို ဖယ်မျိုး လောက်ဘီး သိနေရဏ္ဍ” ဆိုဘီး ကိုယ်တော်ဟို မေးဟုယ်။

ယေရှုဟု “ဖိလိပ္ပုဟု နန်းဟို ခေါ်လာခန်မာ နန်ဟာ သဖန်းဗန်အော့-က်မာ ရှိနေဂဒဲဟု နန်းဟို ငါမြင်ဟုယ်” ဆိုဘီး ပုလန်ဖြေဟုယ်။

⁴⁹ “ဆရာ၊ ကိုယ်တော်ဟာ ဘုရားသခင်ရဲ့ သားဖြစ်ဟုယ်! ကုသရေလလူမျိုးရဲ့ မန်းဂီးလည်းဖြစ်ဟုယ်!” ဆိုဘီး နာသနေလဟု ပုလန်ဖြေလေဟုယ်။

⁵⁰ ယေရှုဟု “သဖန်းဗန်အော့-က်မာ နန်းဟို ငါမြင်ဟုယ် ဆိုဘီး ပြောလိုက်ဇာဟို နန်ယောင်ကြည်ဘဲ့လော။ အယ် ထတ် ရရာတိုင်းကီးဟူ ဇာလေဟို နန်မြင်ရလေ့မယ်” ဆိုဘီး ပြောလိုက်ဟုယ်။

⁵¹ ကိုယ်တော်ဟု “နန်းနို့ဟို ငါ မှန်တိုင်းပြောမယ်၊ ကောန်းဂန်ပွမ့်ဘီးဟာ လူရဲ့သား * ထတ်မာ ဘုရားသခင်ရဲ့ ကောန်းဂန်တမန်လေဟာ ဆင်းလိုက်တတ်လိုက် လောက် နေဇာဟို နန်းနို့ မြင်ရလေ့မယ်” ဆိုဘီး သူးနို့လေဟို ပြောလေဟုယ်။

2

ကာနုမြို့ဟုအီတတ်မဲ့

* 1:51 ၁.၅၁ လူရဲ့သား၊ ဆိုဇာ ခရစ်တော် ဖြစ်ဟုယ်။

၁ သောင်းရစ်မြေ-က်နေ့မှာ ဂါလိလဲနယ် ကာနမြို့မှာ အိတ်တတ်ပွဲလောက်လေဟယ်။ အယ်ပွဲမှာ ယေရှုရဲ့ မိလည်း ရှိနေဟယ်။

၂ အယ်ဘီးဟာ ယေရှုနဲ့ တမဲ့တော်လေဟိုလည်း အိတ်တတ်ပွဲဟို ဖိဟူးလေဟယ်။

၃ ဝိုင်ကူဟူးခီမှာ ယေရှုရဲ့မိဟဲ့ “သူးနို့မှာ ဝိုင်ကူဟူးဘီ” ဆိုဘီး ကိုယ်တော်ဟို ပြောလေဟယ်။

၄ ယေရှုဟဲ့ “ဧဗီးမ၊ နို့ဟို ပြားလောက်ရမယ် ဆိုဘီး ပြောနဲ့။ နို့ခီဟာ ခုထိ ရော့-က်သေးဟဲ့” ဆိုဘီး ပုလန်ပြောဟယ်။

၅ အယ်ဘီးနဲ့ ယေရှုရဲ့ မိဟဲ့ “နန်းနို့ဟို သူစေခိုင်းဟူတိုင်း လောက်ဂေ” ဆိုဘီး စေခံလေဟို ပြောလိုက်ဟယ်။

၆ ယုဒလူလေမှာ ဘာသာဓလေ့တိုင်း ဆေးကြောဇာနဆို င်ဟူ စည်းမျဉ်းလေရှိဟယ်။ အယ်စည်းမျဉ်းလေကြောနဲ့ အယ်နေရာမှာ ကုလော့-က်ရေအိုး ခြော့-က်လောင်းရှိဘီး ရေအိုးဂီးတလောင်းစီဟာ ဂါလိလဲနဲ့ဆယ်နဲ့ သောင်းဆယ်ကြား ဝမ်ဆဲ့ဟယ်။

၇ ယေရှုဟဲ့ “အယ်ရေအိုးလေဟို ရေဖုလဲဂေ” ဆိုဘီး စေခံလေဟို ပြောလိုက်ဟယ်။ သူးနို့ဟာ ပုလဲအောက် ဖုလဲဂေဟယ်။

၈ အယ်ဘီးနဲ့ ကိုယ်တော်ဟဲ့ “ခု အယ်အိုးထဲဟဲ့ရေဟို ခပ်ဘီးဟာ ပွဲအောက်နားဟို ယူဟူးဂေ” ဆိုဘီး သူးနို့ဟို ပြောလိုက်ဟယ်။ သူးနို့ဟာ ရေဟို ယူဟူးဟယ်။

9 ခု အယ်ရေဟာ ဝိုင်ဖြစ် ပုလောန်းလဲဟူးဘီး ပွဲအောက်ဟု မြည်းလေဟယ်။ အယ်ဝိုင်ဟာ ဖယ်နေရာဟု ရလာဟယ် ဆိုဇာဟို သူသိဟု။ အယ်ဘေမဲ့ ရေခပ်လာဟူ စေခံလေဟာ ကောန်းကောန်းဟူးသိနေဟယ်။ အယ်ကြောန် သူဟာ ဒို့သားဟို ခေါ်လိုက်ဘီး၊

10 “လူတိုင်းဟာ ကောန်းဆောင်း ဝိုင်နဘဲ့ ဦးဆောင်း ဧည့်ခံဟယ်။ ဧည့်သည်လေ ဘောင်ဂီးသော-က်ဘီးမှ ညံ့ဟူဝိုင်န ဧည့်ခံဟယ်။ အယ်ဘေမဲ့ နန်ဟု ကောန်းဆောင်း ဝိုင်ဟို ခုထံသီးဟူးလေဟယ်!” ဆိုဘီး ပြောလေဟယ်။

11 ယေရှုဟာ ဦးဆောင်း နိမိတ်လတ်ခဏာဟို ဂါလိလဲနယ် ကာနမြို့မာ လောက်ဘီးဟာ မိမိရဲ့ ဖောင်းသရေတော်ဟို ဖွဲ့မ့်ပြလေဟယ်။ အယ်ဘီးန တမဲ့တော်လေဟာ ကိုယ်တော့်ဟို ယောင်ကြည်ဂေဟယ်။

12 အယ်မျိုး နိမိတ်လတ်ခဏာ ပြဘီးန ယေရှုဟာ သူ့ရဲ့ မိ၊ ညီငယ်လေ၊ တမဲ့တော်လေနတူးဒူ ကပေရနောင်မြို့ဟို သွားဘီး အယ်မြို့မာ ရစ်နဲနဲဟူး နေလေဟယ်။

ယေရှုဟာ ဗိမာန်တော်ဟို သွားဟူကြောင်း
(မသဲ ၂၁.၁၂,၁၃; မာကု ၁၁.၁၅-၂၇; လုကာ ၁၉.၄၅,၄၆)

13 ယုဒလူလေရဲ့ ပသခါပွဲ နီးလာဟူကြောန် ယေရှုဟာ ယေရုရှလင်မြို့ဟို သွားလေဟယ်။

14 ကိုယ်တော်ဟာ ဗိမာန်တော်ထဲမှာ သိုးလေ၊ နွားသား
ဂန်းလေ၊ ချိုးငှက်လေဟို ရောင်းဝယ်နေဟူ လူလေန ကပ်
လဲပေးမားလေဟာ သူးနှိမ့် စားမွဲလေမာ ထိုင်နေဇာဟို တို့
ဟယ်။

15 အယ်ကြောန့် ကိုယ်တော်ဟာ ကြိုးလေန ကြာပွတ်ဟို
လောက်ဘီးန သိုးလေ၊ နွားလေ ဂူလောင်းဟို ဗိမာန်တော်
ထဲဟု နန်ထုဘီးဟား ကပ်လဲမားလေရဲ့ မွဲလေဟိုလည်း
မော့-က်လဲဘီးန သူးနှိမ့် ဒန်းဂါးလေဟို ဖုလဲဖုလဲစင်အော
န့် လောက်လေဟယ်။

16 အယ်ဘီးန ကိုယ်တော်ဟာ ချိုးငှက်ရောင်းဟူ လူလေ
ဟို “အယ်ပစ္စည်းလေဟို ယူဟားဂေ့! ငါ့ဖရဲ့ အိတော်ဟို
ဆေးဖြစ်ဟားအောန် လောက်ဂေ့န!” ဆိုဘီး မိန့်ပေးလိုက်
ဟယ်။

17 ကိုယ်တော်ရဲ့ တမွဲတော်လေဟာ “အိုဘုရားသခင်၊
ကိုယ်တော် ရဲ့ အိတော် ဟို ရှစ် ခင်တွယ် တာ မူ ဟာ
ကျွန်တော်ထဲမာ မီးမျိုး လောန်ကျမ်းနေဟယ်” ဆိုဘီး
ကျမ်းစာဟု ပြောဟားဇာလေဟို အော့-က်မေ့လာဂေ့ဟု
ယ်။

18 ယုဒအာဏာပိုင်လေဟာ ကိုယ်တော်နားဟို ပုလန်လာ
ဘီး “နန်ဟာ အယ်မူဇာဟို လောက်ပိုင်ခွမ် ရှိဟယ် ဆိုဇာ
ဟို နို့လေဟို ဖြားမျိုး နိမိတ်လတ်ခဏာ လောက်ပြနိုင်မယ်
နူး” ဆိုဘီး မေးခွန်းတခုဟို မေးလေဟယ်။

19 ယေရှုဟု “အယ်ဗိမာန်တော်ဟို့ ဖြိုဖျစ်ဂေ။ သောင်းရစ်ထဲန ငါ့ပုလန်ဆော့-က်ပြမယ်” ဆိုဘီး ဖြေလိုက်ဟယ်။

20 ယုဒလူလေဟု “အယ်ဗိမာန်တော်ဟို့ ဆော့-က်ဟို့ တွပ် လေးဆယ့်ခြော့-က်နှစ် ကြာဟယ်! နန်ဟု သောင်းရစ်ထဲန ပုလန်ဆော့-က်ဟို့လော” ဆိုဘီး မေးဂေဟယ်။

21 အယ်ဘေမဲ့ ယေရှုပြောနေဟူ ဗိမာန်တော်ဟု သူရဲ့ ကိုယ်ခန္ဓာဖြစ်ဟယ်။

22 အယ်ကြောန် ယေရှုဟု သေရာဟုနေ ပုလန်ရှင်လာဟူ ခီမာ ကိုယ်တော်ရဲ့ တဗဲ့တော်လေဟု ကိုယ်တော်ပြောဟူးဟူ စကားလေဟို့ အော့-က်မေ့လာလေဟယ်။ အယ်ဘီးန သူးနို့လေဟု ကျမ်းစာတော်န ကိုယ်တော်ပြောဟူးဟူ စကားလေဟို့ ယောင်ကြည်ဂေဟယ်။

ယေရှုဟု လူလေရဲ့ သဘောဟို့ သိဟူကြောန်း

23 ယေရှုဟု ယေရုရှလင်မြို့ဟု ပသခါပွဲမာရှိနေဒူးမာ ကိုယ်တော်လောက်ဟူ နိမိတ်လတ်ခဏာလေဟို့ တွံရဟူ ကြောန် လူလေဘောင်ဂီးဟု ကိုယ်တော်နာမဟို့ ယောင်ကြည်ဂေဟယ်။

24 အယ်ဘေမဲ့ ယေရှုဟု လူလေ ဂူလောင်းရဲ့ ကြောန်းဟို့ သိနေဟူကြောန် သူးနို့လေဟို့ ယောင်ကြည်ဟု။

25 ကိုယ်တော်ဟု လူလေရဲ့ စိန်လောင်းဟို့ သိနေဟယ်။ အယ်ကြောန် ကိုယ်တော်ဟို့ ယော့-က်ယော့-က်ဟု သူးနို့ကြောန်းဟို့ သတ်သေခံဟို့ လိုအပ်ဟု။

3

ယေရှုန နိကောဒင်

¹ ဖာရိရှဲဖွဲ့ဝင် နိကောဒင်နာမယ်ရှိဟူ ယုဒလူခေါင်းဆောင် တယော-က်ရှိဟုယ်။

² တညဉ့်မာ သူဟာ ယေရှုနားဟို့ လာဘီးဟာ ကိုယ်တော့်ဟို့ “ရဗဗီ၊ ကိုယ်တော်ဟာ ဘုရားသခင်စေလွှတ်လိုက်ဟူ ဆရာတယော-က် ဖြစ်ဟုယ် ဆိုဇာဟို့ ကျွန်တော့်ဟားလေ သိဟုယ်။ ဘုရားသခင်ဟာ ဆရာနတူးဒုရှိဟု ဆိုဟာ ဖယ်လူလည်း အယ်နိမိတ်လတ်ခဏာလေဟို့ လောက်နိုင်ဟို့ မဟု” ဆိုဘီး လျှော့-က်လေဟုယ်။

³ ယေရှုဟု “နန်ဟို့ ငါ မှန်တိုင်းပြောမယ်၊ ဒုတိယခါ ပုလန်*မိုးဟု ဆိုဟာ ဖယ်လူလည်း ဘုရားသခင်ရဲ့ နိုင်ငံတော်ဟို့ မြင်နိုင်ဟို့ မဟု” ဆိုဘီး ဖြေလိုက်ဟုယ်။

⁴ “သတ်ကီးဟူလူဟု ဖယ်မျိုးဒုတိယခါ ပုလန်မိုးနိုင်ဟို့ နူး။ အယ်လူဟာ ဒုတိယခါ မိုးဟို့တွပ် သူမိရဲ့ ဗိုက်ထဲဟို့ လောင်းဝ ဝမ်နိုင်ဟု!” ဆိုဘီး နိကောဒင်ဟု မေးဟုယ်။

⁵ ယေရှုဟု “နန်ဟို့ ငါ မှန်တိုင်းပြောမယ်၊ ရေန ဝိညာဉ်တော်အားဖြင့် မိုးဟု ဆိုဟာ ဖယ်လူလည်း ဘုရားသခင်ရဲ့ နိုင်ငံတော်ဟို့ ဝမ်နိုင်ဟို့ မဟု။

⁶ ဇာတိသွီးသားဟာ ဇာတိသွီးသားဟို့ မွီးပေးဟုယ်။ အယ်ဘေမဲ့ ဝိညာဉ်တော်ဟာ ဝိညာဉ်ဟို့ မွီးပေးဟုယ်။

⁷ ဒုတိယခါ ပုလန်†မိုးရမယ် ဆိုဘီး ငါပြောဟူကြောန့်

* 3:3 ၃.၃ ပွန်၊ အယ်မျိုးမှုဘဲနေဟာ ထတ်ဟု။ † 3:7 ၃.၇ ပွန်၊ အယ်မျိုးမှုဘဲနေဟာ ထတ်ဟု။

အံ့ဩဟူးနု။

⁸ လေဟာ သူလိုရှိဟူ နေရာဟို တိုက်လေဟယ်။ နန်ဟာ လေတိုက်သံဟို ကြားရဟယ်။ အယ်ဘေမဲ့ အယ်လေဟာ ဖယ်နေရာဟု လာဘီး ဖယ်နေရာဟို သွားနေဟယ် ဆိုဇာ ဟို နန်သိဟို မူဟု။ ဝိညာဉ်တော်အားဖြင့် မိုးဟူလူတိုင်း ဟာလည်း အယ်မျိုးဘဲဖြစ်ဟယ်” ဆိုဘီး ပုလန်ဖြေလေ ဟယ်။

⁹ “အယ်ဇာဟာ ဖယ်မျိုးဖြစ်နိုင်ဟို့နူး” ဆိုဘီး နိုကောဒ င်ဟု မေးဟယ်။

¹⁰ ယေရှုဟု “နန်ဟာ ကုသရေလလူမျိုးထဲမာ ဆရာဂီး တယော့-က်ဖြစ်ဘီး အယ်မူဇာဟို နန်သိဟုလော။

¹¹ နန်ဟို ငါ မှန်တိုင်းပြောမယ်၊ နို့လေဟာ သိဟူဇာဟို ပြောဘီး နို့လေဟာ မြင်ဟူဇာဟို သတ်သေခံဟယ်။ အယ် ဘေမဲ့လည်း နန်းနို့ဟာ နို့လေရဲ့ သတ်သေခံဇာဟို လတ်ခံ ရှင်ဟူ စိမ္မေဂေဟု။

¹² အယ်လောကနဆိုင်ဟူ ဇာလေဟို ငါပြောဟူ ခီမာ နန်းနို့လေ ယောင်ကြည်ဂေဟု။ အယ်ဆိုဟာ ကောန်းဂန် ဘောင်နဆိုင်ဟူ ဇာလေဟို ငါပြောဟူ ခီမာ နန်းနို့လေ ဖယ် မျိုး ယောင်ကြည်မယ်နူး။

¹³ ကောန်းဂန်ဘောင်ဟုနေ ဆင်းလာဟူ လူရဲ့သားမှတ ပါး ဖယ်လူလည်း ကောန်းဂန်ဘောင်ဟို တတ်ဟူးဟူ လူ မေ့ဟု”[‡] ဆိုဘီး ဖြေလိုက်ဟယ်။

[‡] 3:13 ၃.၁၃ ကိုးကားချစ်ဟာ ခန်းငယ် ၂၁ ထိ ဖြစ်ဟယ်။

14 မောရှေဟာ ကန္တာရထဲမှာ ကြေးဝါဗွီဟို တိုင်ထတ်မာ ခံဟူးမျိုးဘဲ လူ့ရဲ့သားဟိုလည်း ခံဟူးလေ့မယ်။

15 အယ်ကြောန့် ကိုယ်တော်ဟို ယောင်ကြည်ဟူ လူတိုင်းဟာ ထာဝရသတ်ဟို ရမယ်။

16 ဘုရားသခင်ဟာ လောကသားလေဟို ရရာတိုင်း ရှစ်ဟူကြောန့် သူ့ရဲ့ တပါးဒဲရှိဟူ သားတော်ဟို ပေးလေဟယ်။ အယ်ကြောန့် သားတော်ဟို ယောင်ကြည်ဟူ လူတိုင်းဟာ ပျစ်စီးဘဲန ထာဝရသတ်ဟို ရမယ်။

17 ဘုရား သ ခ င် ဟု သူ့ရဲ့ သား တော် ဟို အယ် လောကသားလေဟို တရားစီရင်ဟိုတွပ် စေလွှတ်လိုက်ဇာ မှုဟု။ အယ်လောကဟို ကယ်တန်ဟိုတွပ် စေလွှတ်လိုက် ဟယ်။

18 သားတော်ဟို ယောင်ကြည်ဟူ လူလေဟာ စီရင် ခံရဟု။ အယ်ဘေမဲ့ ယောင်ကြည်ဘဲဟူ လူလေဟာ ဘုရားသခင်ရဲ့ တပါးဒဲရှိဟူ သားတော်ရဲ့ နာမဟို ယောင် ကြည်ဘဲကြောန့် စီရင်ခံရဟယ်။

19 စီရင်ရှင်းရဲ့ ဘောတရားဟု အယ်မျိုးဖြစ်ဟယ်။ လန်းရောန်ဟာ လောကထဲဟို ရှေး-က်လာဟယ်။ အယ် ဘေမဲ့ လူလေဟာ သူးနို့ရဲ့ ကျင့်လေ ဆိုးညစ်ဟူကြောန့် လန်းရောန်ထတ် မှောန်မိုက်ဟို ရှစ်ဂေဟယ်။

20 ဆိုးညစ်ဟူ လူတိုင်းဟာ လန်းရောန်ဟို မူးဘီး လန်း ရောန်နားဟို လာဂေဟု။ သူးနို့ရဲ့ ဆိုးညစ်ဟူ ကျင့်လေဟို ထန်ရှားရှင်ဂေဘဲဟူကြောန့် ဖြစ်ဟယ်။

21 အယ်ဘေမဲ့ သမ္မာတရားအားဖြင့် သတ်ရှင်ဟူ လူလေ
ဟာ လန်းရေန်နားဟို့ လာဂေဟယ်။ အယ်ကြောန့် သူးနို့
လောက်ဆော်ဟူ ဇာလေဟာ ဘုရားသခင်ရဲ့ ရှေ့တော်
မာ ထန်းထန်ရှားရှားဟား ဗြင်ရလေဟယ်။

ယေရှုနု ယောဟန်

22 အယ်ဘီးနု ယေရှုဟာ တမဲ့တော်လေနတူးဒု ယုဒနယ်
ဟို့ သွားဂေဘီး အယ်နေရာမာ သူးနို့လေနတူးဒုနေဘီး ဗ
တုတိဇိပေးဟယ်။

23 ယောဟန်ဟာလည်း ရှာလိမ်မြို့နားဟု အဲနန်ရပ်မာ
ဗတုတိဇိပေးနေဟယ်။ ဖြားဖြစ်ကြောန့်နူးဆိုဟာ အယ်
နေရာမာ ရေလေဘောင်ဂီးရှိဟယ်။ လူလေဟာ သူနားဟို့
လာဂေဘီး ဗတုတိဇိခံဂေဟယ်။

24 အယ်မူဇာဟာ ယောဟန် ထောန်ကုလခန်မာ ဖြစ်ဟု
ယ်။

25 ယောဟန်ရဲ့ တမဲ့တော်တချို့ဟာ ဘာသာဓလေ့
နုဆိုင်ဟူ ဆေးကြောဇာန ပတ်သက်ဘီး ယုဒလူတ
ယော့-က်နီန စဘီးဟာ ဂြင်းဂေဟယ်။

26 အယ်ကြောန့် သူးနို့ဟာ ယောဟန်နားဟို့ သွားဘီး
“ဆရာ၊ ယော်ဒန်မှလစ် ရှေ့ဖတ်ကမ်းမာ ဆရာနတူးဒု နေ
ဖူးဟူ၊ သူ့ကြောန့်ဟို့ သတ်သေခံဖူးဟူလူဟို့ မှတ်မိသေး
ဘဲ့လော။ ခု သူဟာ ဗတုတိဇိပေးနေဟယ်။ လူတိုင်းဟု

3:24 ၃.၂၄ မ ၁၄:၃ မာ ၆:၁၇ လု ၃:၁၉,၂၀ § 3:25 ၃.၂၅
ယုဒလူတယော့-က်၊ တချို့ မူရင်းလတ်ရေးမူလေမာ ယုဒလူမျိုးတချို့၊
ဆိုဘီး ရှိဟယ်။

လည်း သူ့နားဟို သွားနေဂေဟယ်!” ဆိုဘီး ပြောပြလေဟယ်။

27 ယောဟန်ဟု “ကောန်းဂန်ဟုနေ ပေးဟု ဆိုဟာ ဖယ်လူလည်းရနိုင်ဟု။

28 ‘ငါဟာ မေရှိယ မဟု။ အယ်ဘေမဲ့ ငါ့ဟို သူ့ရှေ့ဟုနေ စေလွှတ်လိုက်ဟယ်’ ဆိုဘီး ငါပြောဟူးဇာလေဟာ နန်းနို့ ကိုယ်တိုင် ငါ့ရဲ့ သတ်သေခံလေ ဖြစ်ဟယ်။

29 ဒို့သမီးဟို ပိုင်ဆိုင်ဟူလူဟာ ဒို့သားဖြစ်ဟယ်။ အယ်ဘေမဲ့ ဒို့သားရဲ့သံဟို ရပ်ဘီး နားထောန်နေဟူ ဒို့သားရဲ့ မိဆွေဟာ ဒို့သားရဲ့သံဟို ကြားရဟူ ခီမာ ဝန်းသာလေဟယ်။ အယ်မျိုးဘဲ့ ငါဟာလည်း အယ်ဝန်းသာဇာလေန ပုလဲဝနေဟယ်။

30 အယ်သခင်ဟာ တိုးပွားရမယ်။ ငါဟာ ဆုတ်ယုတ်ရမယ်” ဆိုဘီး ဖြေလေဟယ်။

ကောန်းဂန်ဘောင်ဟုနေ ကြွလာဟူသခင်

31 ထတ်ဟုနေ ကြွလာဟူ သူဟာ ဂူလောင်းထတ် ကီးမြတ်ဟယ်။ မုလေဂီးဟုနေ ဖြစ်ဟူလူဟာ မုလေဂီးန ဆိုင်ဘီး မုလေဂီးရာဟို ပြောဟယ်။ အယ်ဘေမဲ့ ကောန်းဂန်ဘောင်ဟုနေ ကြွလာဟူ သခင်ဟာ ဂူလောင်းထတ် ကီးမြတ်ဟယ်။

³² ကိုယ်တော်ဟု မြင်ဟူး၊ ကြားဟူးဇာလေဟို့ ပြောဟယ်။ အယ်ဘေမဲ့လည်း ကိုယ်တော်ရဲ့ စကားတော်ဟို့ ဖယ်သူလည်း ထော့-က်ခံဂေဟု။

³³ အယ်ဘေမဲ့ ကိုယ်တော်ရဲ့ စကားတော်လေဟို့ လတ်ခံဟူလူတိုင်းဟု ဘုရားသခင်ဟု သမ္မာတရားဖြစ်ဟယ် ဆိုဇာဟို့ သိမှတ်ပြုလေဟယ်။

³⁴ ဘုရားသခင် စေလွှတ်လိုက်ဟူလူဟု ဘုရားသခင်ရဲ့ စကားတော်လေဟို့ ပြောဟယ်။ ဖြားဖြစ်ကြောန့်နဲ့ဆိုဟု ဘုရားသခင်ဟု သူရဲ့ ဝိညာဉ်တော်ဟို့ ပုလဲဝပေးလေဟယ်။

³⁵ ဖဟု သားတော်ဟို့ ရှစ်တော်မူဘီး တဂိုးအာဏာ ဂူလောင်းဟို့ သားတော်ရဲ့ လတ်ထဲမာ အပ်ပေးဟူးဟယ်။

³⁶ သားတော်ဟို့ ယောင်ကြည်ဟူ လူဟု ထာဝရသတ်ဟို့ ရဘီး သားတော်ဟို့ နားထောန်ဘဲဟူ လူဟု သတ်ဟို့ ရဘဲန ဘုရားသခင်ရဲ့ မျစ်ဒေါသအော့-က်မာ နေရလေမယ်။

4

ယေရှုန ရှမာရိုမီးမ

¹ ယေရှုဟု ယောဟန်ထတ် တမဲ့တော်လေဘောင်ဂီး ဖြစ်စေဘီး ဗတုတိဇံပေးနေဟယ် ဆိုဇာဟို့ ဖာရိုရှဲလေဟု ကြားဂေဟယ်။

2 တဂယ်ဒန်းဆိုဟာ ယေရှုကိုယ်တိုင်ဟု ဖယ်လူတို့ လည်း ဗတုတိဇီပေးဟု။ တမဲ့တော်လေဟာဘဲ ဗတုတိဇီ ပေးဂေဟယ်။

3 အယ်ကြောန့် ယေရှုဟာ ယုဒနယ်ဟုနေ ထွပ်ဟားဘီး ဂါလိလဲနယ်တို့ ပုလန်ဟားဘီး၊

4 ကိုယ်တော်ဟု ရှမာရိနယ်တို့ ဖြတ်ဘီးဟာ သွားရဟယ်။

5 ယာကုပ်ဟု သူ့သားယောသပ်တို့ ပေးဟားဟု မုလေပု လန်နား ရှမာရိနယ်ထဲဟု ရှခါနာမယ်ရှိဟုမြို့တို့ ရော့-က် လာဟယ်။

6 ယာကုပ်ရဲ့ ရေဒွမ်းဟာ အယ်နေရာမာရှိဟယ်။ ယေရှု ဟာ ခရီးပန်းကြောန့် ရေဒွမ်းနားမာ ထိုင်နေဟယ်။ အယ်ခီ ဟာ မွန်းဒဲခီလည်းဖြစ်ဟယ်။

7 ရှမာရိမီးမတယော့-က်ဟာ ရေခပ်တို့တွပ် ရော့-က် လာဟု ခီမာ ယေရှုဟု “ငါသော့-က်တို့ ရေပေးပါ” ဆိုဘီး အယ်မီးမတို့ ပြောဟယ်။

8 (ကိုယ်တော်ရဲ့ တမဲ့တော်လေဟာ စားဇာဝယ်စားတို့ မြို့ထဲတို့ သွားဂေဟားဟယ်။)

9 အယ်မီးမဟာ “သင်ဟု ယုဒမျိုးသားတယော့-က် ဖြစ်ဟယ်။ ကျွန်မဟု ရှမာရိမျိုးသမီးတယော့-က် ဖြစ်ဟယ်။ ဖယ်မျိုးဖြစ်ကြောန့် ရေတောန်းသော့-က်ရနူး” ဆိုဘီး မေးလေဟယ်။ (ယုဒလူလေဟာ ရှမာရိလူလေ သောင်းပြု

ဟူ စန်ဟန်းဇားလေဟုံ သောင်းပြုလေ့ မှေ့ဟူ။)*

10 ယေရှုဟု “ဘုရားသခင်ရဲ့ လတ်ဆောက်နံ့ ငါသော့-က်
ဟို့တွပ် ရေပေးပါ ဆိုဘီး တောန်းဆိုနေဟူလူဟာ ဖယ်သူ
ဖြစ်ဟယ် ဆိုဇာဟို့ သိမယ် ဆိုဟာ နန်ဟာ အယ်လူနား
မာ တောန်းလေ့မယ်။ အယ်လူဟုလည်း နန်ဟို့ သတ်ရေ
ဟို့ ပေးလေ့မယ်” ဆိုဘီး ပြောလေဟယ်။

11 အယ်မီးမဟု “ဆရာ၊ ဆရာမာ ရေခပ်ဟို့ အန်းဗေါ
င်းလည်း မှေ့ဟူ။ ရေဒွမ်းဟုလည်း ရရတိုင်း နတ်ဟယ်။
ဖယ်နေရာဟုနေ သတ်ရေဟို့ ရဟို့နူး။

12 အယ်ရေဒွမ်းဟာ ကျွန်မဟားလေရဲ့ ဘိုးဘေးယာကု
ပ်ဟု ကျွန်မဟားလေဟို့ ပေးဟားဘီး သူကိုယ်တိုင်နု သူ
ရဲ့သားမီးလေ၊ သိုးလေ၊ နွားလေ ဂူလောင်းဟာ အယ်ရေ
ဒွမ်းဟု ရေဟို့ သော့-က်ဟယ်။ ကိုယ်တော်ဟု ကျွန်မဟား
လေရဲ့ ဘိုးဘေး ယာကုပ်ထတ် ကီးမြတ်ကြောန့်လော” ဆို
ဘီး ပြောလေဟယ်။

13 ယေရှုဟု “အယ်ရေဟို့ သော့-က်ဟူလူလေဟာ ပု
လန်ဘီး ရေငတ်လေ့အူးမယ်။

14 အယ်ဘေမဲ့ ငါပေးမယ့်ရေဟို့ သော့-က်ဟူလူလေ
ဟာ ပုလန်ဘီး ရေငတ်လေ့မယ် မှေ့ဟူ။ ငါပေးမယ့်ရေဟာ
သူးနို့ထဲမာ သတ်စမ်းရေဗော့-က် ဖြစ်ဟားဘီး သူးနို့ဟို့
ထာဝရသတ်ဟို့ ပေးလေ့မယ်” ဆိုဘီး ပုလန်ဖြေဟယ်။

* 4:9 ၄.၉ ယုဒလူလေဟာ ရှမာရိလူလေ သောင်းပြုဟူ စန်ဟန်းဇားလေဟို့
သောင်းပြုလေ့ မှေ့ဟူ၊ အယ်မျိုးမှူးဘဲနေဟာ ယုဒလူလေဟာ
ရှမာရိလူလေနတူးဒူ လောင်းဝ စားသော့-က်လေ့ မှေ့ဟူ။

15 အယ်မီးမဟု “ဆရာ၊ အယ်ရေဟို ကျွန်မဟို ပေးပါ၊ အယ်ဆိုဟာ ကျွန်မဟာ ပုလန်ဘီး ရေငတ်ဟိုမှဘိ အယ် နေရာဟို လာဘီး ရေခပ်ဇာလည်း လိုဟမ်း” ဆိုဘီး ပြောဟယ်။

16 ယေရှုဟု “သွားဘီး နန့်လန်ဟို ခေါ်ဘီးဟာ ပုလန်လာ ပါ” ဆိုဘီး အယ်မီးမဟို ပုလန်ပြောဟယ်။

17 “ကျွန်မမာ လန်မေ့ဟု” ဆိုဘီး အယ်မီးမဟု ဖြေဟယ်။

ယေရှုဟု “နန့်မာ လန်မေ့ဟု ဆိုဘီး ပြောဇာဟာ မှန်ဟယ်။

18 နန့်မာ လန်ငါးယော့-က်ရှိဖူးဟယ်။ ခု နန့်နတူးဒူနေဟု လန်ဟာလည်း နန့်လန်စစ်စစ် မှုဟု။ နန့်ဟာ ငါ့ဟို မှန်ဟု စကားဟို ပြောဟယ်” ဆိုဘီး ပုလန်ပြောလေဟယ်။

19 “ဆရာ၊ ဆရာဟာ ပရောဖက်ဖြစ်ဟယ် ဆိုဇာဟို ကျွန်မသိဟားဘိ။

20 ကျွန်မဟားလေရဲ့ ဘိုးဘေလေဟာ အယ်တောန်ထတ်မာ ဘုရားသခင်ဟို ကိုးကွယ်ဂေဟယ်။ အယ်ဘေမဲ့ ဆရာရဲ့ ယုဒလူလေဟာ ယေရုရှလင်မြို့မာဘဲ ဘုရားသခင်ဟို ကိုးကွယ်ရမယ် ဆိုဘီး ပြောဂေဟယ်” ဆိုဘီး အယ်မီးမဟု ပြောဟယ်။

21 ယေရှုဟု “ဝှေ့မီးမ၊ ငါ့ဟို ယောင်ကြည်ပါ။ အယ်တောန်ထတ်ဟိုရော၊ ယေရုရှလင်မြို့ဟိုရော လာဘဲန ဖဟို ကိုးကွယ်ရဟိုခီ ရှေ့-က်လာလေ့မယ်။

22 ကယ်တန်ရှင်းဟာ ယုဒလူလေဟာနေတဆင့် ရှေ့-က်
လာဟူကြောန့် နို့ယုဒလူလေဟာ နို့လေကိုးကွယ်ဟူဇာ
ဟို့ သိဟယ်။ အယ်ဘေမဲ့ နန်းနို့ရှမရိလူလေဟာ နန်းနို့
ကိုးကွယ်ဇာဟို့ မှန်သိဂေဟ။

23 စစ်မှန်ဟူ ကိုးကွယ်သူလေဟာ ဝိညာဉ်နရော၊ သစ်စာ
နရော ဖဟို့ ကိုးကွယ်ရမယ့်ခိဟာ ရှေ့-က်လာလေ့မယ်။
အယ်ဘေမဲ့ ခုဘဲရှေ့-က်နေဘိ။ အယ်မျိုး ကိုးကွယ်သူ
လေဟို့ ဖဟာ လိုရှင်ဟယ်။

24 ဘုရားသခင်ဟာ ဝိညာဉ်ဖြစ်ဟူကြောန့် ကိုယ်တော်
ဟို့ ကိုးကွယ်သူလေဟာ ဝိညာဉ်နရော၊ သမ္မာတရားနရော
ကိုးကွယ်ရမယ်” ဆိုဘီး အယ်မီးမဟို့ ပြောလေဟယ်။

25 အယ်မီးမဟာ “ခရစ်တော် ဆိုဘီး ခေါ်ဟူ မေရှိယ
ကြွလာမယ် ဆိုဇာဟို့ ကျွန်မသိဟယ်။ ကြွလာဟူ ခီမာ
ကျွန်မဟူးလေဟို့ ဂူလောင်း ပြောပြလေ့မယ်” ဆိုဘီး ကို
ယ်တော်ဟို့ လျှော့-က်ဟယ်။

26 ယေရှုဟာ “နန်နတူးဒု စကားပြောနေဟူ ငါဟာ မေရှိ
ယဖြစ်ဟယ်” ဆိုဘီး မိန့်တော်မူလေဟယ်။

27 အယ်ခီမာဘဲ ယေရှုရဲ့ တမဲ့တော်လေဟာ ပုလန်
ရှေ့-က်လာဟယ်။ ကိုယ်တော်ဟာ မီးမတယော့-က်န
စကားပြောနေဇာဟို့ သူးနို့လေဟာ တို့လိုက်ကြောန့် ရရာ
တိုင်း အံ့ဩဟူးဂေဟယ်။ အယ်ဘေမဲ့ “ဖြားဇာလိုရှင်ဟို့
နူး” ဆိုဘီး အယ်မီးမဟို့ ဖယ်လူလည်းမေးဂေဟ။ “ဖြား
ဖြစ်ကြောန့် အယ်မီးမန စကားပြောနေရနူး” ဆိုဘီးလည်း

ကိုယ်တော့်ဟို ဖယ်လူလည်းမေးဂေဟ။

28 အယ်ဘီးန မီးမဟာ ရေအိုးဟို ထားရစ်ဘီး မြို့ထဲဟို ပုလန်ဟားဘီးဟာ

29 “ကျွန်မလောက်ဟားဟူဇာလေ ဂူလောင်းဟို ပြောပြ သူဟို လာဘီးကေကေ။ အယ်သူဟာ မေရှိယဘွဲ့လော” ဆို ဘီး လူလေဟို ပြောလေဟယ်။

30 အယ်ကြောန့် သူးနို့လေဟာ မြို့ထဲဟထွပ်ဟားဘီး ယေရှုနားဟို သွားဂေဟယ်။

31 အယ်ခီမာဘွဲ့ တမဲ့တော်လေဟာ ယေရှုဟို “ဆရာ၊ တခုခုစားပါအူး!” ဆိုဘီး တောန်းလျှော့-က်နေဂေဟယ်။

32 အယ်ဘေမဲ့ ယေရှုဟ “နန်းနို့သိဘဲဟူ စားဇာဟာ ငါ့ မာရှိဟယ်” ဆိုဘီး ဖြေလေဟယ်။

33 အယ်ကြောန့် တမဲ့တော်လေဟ “ကိုယ်တော့်ဟို ယော့-က်ယော့-က်ဟာ စားဇာလေဟို လာပို့ဟားလော” ဆို ဘီး သူးနို့ရှင်းရှင်း စဘီးမေးနေဂေဟယ်။

34 ယေရှုဟ “ငါ့ဟို စေလွှတ်ဟူသူရဲ့ လိုတော်ဟို လိုက်နာဘီး သူလောက်ခိုင်းဟားဟူ လောက်ဟို ပီးအောန် လောက်ဇာဟာ ငါ့စားဇာဖြစ်ဟယ်။

35 နန်းနို့ဟ ‘လေးလကြာဘီးန ရိသီးခီရော့-က်လေ့မယ်’ ဆိုဘီး ပြောဂေဟယ်။ အယ်ဘေမဲ့ နန်းနို့ဟို ငါ မှန်တိုင်း ပြောမယ်၊ လဲဗုလန်လေဟို ကေလိုက်။ ခု ရိသီးဟို သီးနှံ လေဟာ မှည့်နေဘိ!

36 ရိုသီးမားဟာ ခဟို ယူဘီး ထာဝရသတ်တွပ် သီးနှံ လေဟို စုသီးဟယ်။ အယ်ကြောန့် စိုက်မားန ရိုသီးမား လေဟာ တူးဒုန်းသာဂေလေမယ်။

37 အယ်ကြောန့် ‘တယော့-က်ဟ ဖိုက်ဟယ်။ တယော့-က်ဟ ရိုသီးဟယ်’ ဆိုဘီး ပြောဟားဇာဟာ မှန်ဖြစ်ဟားဘိ။

38 နန်းနို့စိုက်ဘဲဟူ လဲဗုလန်မာ သီးနှံလေဟို ရိုသီးဟို နန်းနို့ဟို ငါစေလွတ်လိုက်ဟယ်။ တခြားလူလေဟ လောက်ရဘီး နန်းနို့ဟ ကျိုးခံစားရဟယ်” ဆိုဘီး သူးနို့ဟို ပြောလေဟယ်။

39 အယ်မီးမဟ “အယ်လူဟာ ကျွန်မလောက်ဟားဇာ လေ ဂူလောင်းဟို ပြောပြဟယ်” ဆိုဘီး သတ်သေခံဟူ ကြောန့် အယ်မြို့မာရှိဟူ ရှမာရိုလူလေ ဘောင်ဂီးဟာ ယေရှုဟို ယောင်ကြည်ဟားဂေဟယ်။

40 အယ်ကြောန့် ရှမာရိုလူလေဟာ ကိုယ်တော်နားဟို လာဟူ ခီမာ သူးနို့ဟာ ကိုယ်တော့်ဟို သူးနို့နတူးဒုနေဟို တောန်းလျှော့-က်ဂေဟယ်။ အယ်န ကိုယ်တော်ဟာ အယ်နေရာမာ နေ့ရစ်နေလေဟယ်။

41 လူလေဘောင်ဂီးဟာ ကိုယ်တော်ရဲ့ တရားစကား ကြောန့် ယောင်ကြည်လာဂေဘီး

42 သူးနို့ဟ “ခု နို့လေ ယောင်ကြည်ဟားဇာဟာ နန်ပြော ကြောန့် မူဟူ။ အယ်ဘေမဲ့ နို့လေကိုယ်တိုင် ကိုယ်တော်ရဲ့ တရားစကားဟို ကြားဟိုကြောန့် အယ်သူဟာ လောကရဲ့

စစ်မှန်ဟူ ကယ်တန်ရှင် ဖြစ်ဟုယ် ဆိုဇာဟို့ နို့လေသိဟွား
ဘိ” ဆိုဘီး အယ်မီးမဟို့ ပြောပြဂေဟွယ်။

ယေရှုဟု ရာရှိရဲ့ သားတယော့-က်ဟို့ နာပျော့-က်စေ
ကြောန်း

⁴³ နှေ့ရစ်နေဘီးန ယေရှုဟု အယ်နေရာဟုနေ ထွပ်
ဟွားဘီး ဂါလိလဲနယ်ဟို့ ကြွတ်မူလေဟွယ်။

⁴⁴ ယေရှုကိုယ်တိုင်ဟု “ပရောဖက်လေဟု သူးနို့ရဲ့ မြို့
မာ လေးစားခံရဂေဟု” ဆိုဘီး မိန့်တော်မူလေဟွယ်။

⁴⁵ ကိုယ်တော်ဟု ဂါလိလဲနယ်ဟို့ ရော့-က်လာခီမာ လူ
လေဟု ကိုယ်တော်ဟို့ ကြုံဆိုဂေဟွယ်။ ဖြားဖြစ်ကြောန့်
နှုဆိုဟု ယေရုရှလင်မြို့ဟု ပသခါပွဲဟို့ သူးနို့ရော့-က်
ဟွားဂေဘီး အယ်ပွဲတော်မာ ကိုယ်တော် လောက်ဟူဇာ
လေ ဂူလောင်းဟို့ မြင်ဟွားဂေဟွယ်။

⁴⁶ အယ်ဘီးန ယေရှုဟု ရေဟုနေ ဝိုင်ဖြစ် ပုလောန်းလဲ
ဟွားဟူ ဂါလိလဲနယ် ကာနမြို့ဟို့ ပုလန်ဟွားဟွယ်။ ကပေ
ရနောင်မြို့ဟု ရာရှိတယော့-က်ရဲ့ သားဟု နေကောန်းဘဲ
ဖြစ်နေဟွယ်။

⁴⁷ ယုဒနယ်ဟုနေ ဂါလိလဲနယ်ဟို့ ယေရှုရော့-က်လာဟု
ယ် ဆိုဇာဟို့ အယ်ရာရှိဟု ကြားဟွားခီမာ ကိုယ်တော်နား
ဟို့ သွားဘီး သေခါနီးဖြစ်နေဟူ သူ့သားရဲ့ နာဟို့ ပျော့-က်
စေဟို့ထွပ် တောန်းလျှော့-က်လေဟွယ်။

48 ယေရှုဟု “နန်းနို့ဟု အံ့ဩဘွယ်ရာလေန နိမိတ်လတ် ခဏာလေဟို့ မြင်ရဘဲ ဆိုဟု ယောင်ကြည်ဂေဟို့ မှဟု” ဆိုဘီး သူ့ဟို့ ပြောလေဟယ်။

49 ရာရှိဟု “ဆရာ၊ ကျွန်တော့်သား သေခန့် ကျွန်တော်န တူးဒူ လိုက်ပါ” ဆိုဘီး ပုလန်လျှော့-က်လေဟယ်။

50 ယေရှုဟု “သွားလိုက်ပါ။ နန့်ရဲ့သား သတ်ရှင်ဟွား လေ့မယ်” ဆိုဘီး သူ့ဟို့ ပြောလေဟယ်။

အယ်လူဟု ယေရှုရဲ့ စကားတော်ဟို့ ယောင်ကြည်ဘီး သွားလိုက်ဟယ်။

51 အီပုလန်လမ်းမာ သူ့ရဲ့ စေခံလေဟု သူ့ဟို့ တို့ဟူခီမာ “သခင်ရဲ့သားဟု သတ်ရှင်ဟွားဘီ!” ဆိုဘီး ပြောဂေဟယ်။

52 သူဟု သူ့ရဲ့သား နာပျော့-က်ဟွားခီဟို့ စေခံလေဟို့ မေးဟူခီမာ သူးနို့လေဟု “နတ်ကီးမွန်းဒဲ တနာရီမာ နာ ပျော့-က်ဟွားဟယ်” ဆိုဘီး ဖြေဂေလေဟယ်။

53 အယ်ခီဟု “နန့်ရဲ့သား သတ်ရှင်ဟွားဘီ” ဆိုဘီး ယေရှုပြောလိုက်ဟူ ခီဖြစ်ဟယ် ဆိုဇာဟို့ ဖဟု ဒီရဟွား လေဟယ်။ အယ်ကြောန့် သူန သူ့ရဲ့အီသား ဂူလောင်းဟု ယောင်ကြည်ဂေဟယ်။

54 အယ်မူဇာဟု ယုဒနယ်ဟု နေ ဂါလိလဲနယ်ဟို့ ရော့-က်လာဘီးန ယေရှုလောက်ဟူ ဒုတိယ နိမိတ်လတ် ခဏာ ဖြစ်ဟယ်။

5

ရေကန်နားမှာ ကျန်းမာစေဟူကြောန်း

¹ အယ်ဘီးန ယုဒလူလေရဲ့ ဘာသာရေးပွဲတော် ရှိဟူကြောန်း ယေရှုဟာ ယေရုရှလင်မြို့ဟို့ သွားလေဟယ်။

² ယေရုရှလင်မြို့ သိုးခွဗော့-က်နားမှာ မုခ်ဦးဆောန် ငါးဆောန်ရှိဟူ ရေကန်တကန်ရှိဟယ်။* ဟေဗြဗကားန ဗေသေဇာသ † ဆိုဘီး ခေါ်ဟယ်။

³ အယ်မုခ်ဦးဆောန်လေထဲမှာ မျစ်စိကန်းဟူလူ၊ ခေသန်ဘဲဟူလူန လေဖြတ်ဟူလူလေ ဘောင်ဂီးဟာ လှဲလျောင်းနေဂေဟယ်။

⁴ ‡

⁵ အယ်နေရာမှာ သောင်းဆယ်ရှစ်နှစ် လောင်းလောင်းနာဇးနေဟူ လူတယော့-က် ရှိဟယ်။

⁶ လှဲလျောင်းနေဟူ အယ်လူဟို့ ယေရှုဟာ ဖြင်လိုက်ဘီးခိကြာဂီး နာဇးနေရဟယ် ဆိုဇာဟို့ သိဟူကြောန်း ကိုယ်တော်ဟာ “နန်အနာပျော့-က်ရှင်လော” ဆိုဘီး သူဟို့ မေးလေဟယ်။

* 5:2 ၅-၂ ယေရုရှလင်မြို့ သိုးခွဗော့-က်နားမှာ မုခ်ဦးဆောန် ငါးဆောန်ရှိဟူ ရေကန်တကန်ရှိဟယ်။ အယ်မျိုးမှုဘဲနေဟာ သိုးရေကန်နားမှာ သိုးခွဗော့-က်ရှိဟယ်။ † 5:2 ၅-၂ ဗေသေဇာသ၊ တချို့ မူရင်းလတ်ရေးမူမှာ ဗေသေသဒ၊ ဆိုဘီး ရှိဟယ်။ ‡ 5:4 ၅-၄ တချို့ မူရင်းလတ်ရေးမူမှာ ခန်းငယ် ၃၁-၄ ဟို့၊ သူးနို့ဟာ ရေလောက်ရှားဇာဟို့ စောန်နေဟယ်။ ၄ ဖြးဖြစ်ကြောန်းနဲ့ဆိုဟာ ဘုရားသခင်ရဲ့ ကောင်းဂန်တမန်ဟာ တခါတလေမှာ ရေကန်ထဲဟို့ ခထပ်ပေါန်းထဲဟူးဟယ်။

7 နာဇာဇေယျလူဟု “ဆရာ၊ ရေဟို့ လာမို့ဟူ ခီမာ ကျွန်တော့်ဟို့ ရေကန်ထဲဟို့ ခုလပေးဟို့လူ မေ့ဟူ။ ကျွန်တော်ဟာ ရေကန်ထဲဟို့ ဆင်းဟို့လောက်နေဒူးမာ တခြားတယော့-က်ဟု ဦးဆောင်းဆင်းဟူးလေဟယ်” ဆိုဘီး ဖြေလေဟယ်။

8 ယေရှုဟု “ထဒန်၊ နန့်ထမ်းစင်ဟို့ ကော့-က်ဘီးဟာ လမ်းရှော့-က်ဟူးလိုက်” ဆိုဘီး သူဟို့ ပြောလေဟယ်။

9 အယ်လူဟာ ရှင်းရှင်းဘဲ နာပျော့-က်ဟူးဘီး သူအိယာဟို့ ကော့-က်ဘီး လမ်းရှော့-က်ဟူးဟယ်။

အယ်မျိုးဖြစ်ဟူးဟူ နေဟာ ဒန်းနေဖြစ်ဟယ်။

10 အယ်ကြောန် ယုဒအာဏာပိုင်လေဟာ “အယ်နေဟာ ဒန်းနေဖြစ်ဟယ်။ နန့်ဟာ နန့်ရဲ့အိယာဟို့ ကော့-က်နေဇာဟာ နို့လေရဲ့ ပညတ်တော်ဟို့ ဆန့်ကျင်နေဇာဘဲ” ဆိုဘီး နာပျော့-က်ဟူးဟူ လူဟို့ ပြောဂေဟယ်။

11 သူဟု “ကျွန်တော့်ဟို့ ကျန်းမာစေဟူလူဟု အိယာ ကော့-က်ဘီးဟာ လမ်းရှော့-က်ဟူးလိုက် ဆိုဘီး ကျွန်တော့်ဟို့ ပြောဟယ်” ဆိုဘီး ပုလန်ဖြေလေဟယ်။

12 သူးနို့ဟု “နန့်ဟို့ အယ်မျိုးလောက်ဟို့ ပြောဟူလူဟု ဖယ်သူနူး” ဆိုဘီး သူဟို့ မေးဂေဟယ်။

13 အယ်ဘေမဲ့ နာပျော့-က်ဟူးဟူလူဟု အယ်မျိုးလောက်ခိုင်းဟူလူဟာ ယေရှုဖြစ်ဟယ် ဆိုဇာဟို့ သိဂေဟု။ အယ်နေရာမာ လူအောက်ဂီးရှိနေဟူကြောန် ယေရှုဟု လည်း တိတိဟူး ထွပ်ဟူးလေဟယ်။

14 အယ်ဘီးန ယေရှုဟာ သူ့တို့ ဗိမာန်တော်ထဲမှာ တို့ဟူ ခီမာ “နားထောန်၊ နန်ဟာ ခု နာပျော့-က်ဟားဘီ အယ်ကြောန့် ပြစ်လောက်ဇာလေဟို့ ရပ်လိုက် အယ်မျိုးမှဘဲနေဟာ အယ်ထတ်ဆိုးဇာလေဟာ နန်မာ ဖြစ်လေ့မယ်” ဆိုဘီး ပြောလေဟယ်။

15 အယ်ဘီးန အယ်လူဟာ ထွပ်ဟားဘီး သူ့တို့ နာပျော့-က်စေဟူလူဟာ ယေရှု ဖြစ်ဟယ် ဆိုဘီး ယုဒအာဏာပိုင်လေဟို့ ပြောပြလိုက်ဟယ်။

16 အယ်ကြောန့် ဒန်းနေမာ အယ်မျိုး နာပျော့-က်အောန်လောက်ပေးကြောန့် ယုဒခေါင်းဆောင်လေဟာ ယေရှုဟို့ စဘီးဟာ ညှဉ်းဆဲဂေ့ဟယ်။

17 ယေရှုဟာ “ငါ့ဖဟာ မြဲဒမ်း လောက်လောက်ဟူကြောန့် ငါလည်း လောက်လောက်ဟယ်” ဆိုဘီး သူးနို့ဟို့ ပုလန်ဖြေလေဟယ်။

18 အယ်မျိုးပြောလိုက်ကြောန့် ယုဒအာဏာပိုင်လေ ဂူလောင်းဟာ ကိုယ်တော့်ဟို့ သတ်ဟို့ ပိုဘီး ကြိုးစားဂေ့ဟယ်။ ဖြားဖြစ်ကြောန့်နူးဆိုဟာ ယေရှုဟာ ဒန်းနေဟို့ ခုလိုးဖော့-က်ဟယ်။ ဘုရားသခင်ဟို့ မိမိရဲ့ဖ ဆိုဘီး ခေါ်ဟယ်။ သူ့ကိုယ်သူ ဘုရားသခင်န တတန်းဒဲထားဟယ်။

သားတော်ရဲ့ ခွံမ့်အာဏာ

19 အယ်ကြောန့် ယေရှုဟာ “နန်းနို့ဟို့ ငါ မှန်တိုင်းပြောမယ်၊ သားတော်ဟာ သူ့လိုလို ဖြားလည်းလောက်နိုင်ဟူ။ ဖလောက်ဟူ ဇာလေဟို့ မြင်ဟူအတိုင်းဘဲ လောက်ဇာဖြစ်

ဟုယ်။ ဖလောက်ဟူမျိုး သားတော်ဟုလည်း လောက်ဂေဟုယ်။

20 ဖဟု သားတော်ဟို့ ရှစ် ဟူကြောန့် ဖကိုယ်တိုင် လောက်နေဇာလေ ဂူလောင်းဟို့ သားတော်ဟို့ ပြဟုယ်။ အယ်မူဇာထတ် ရရာတိုင်း ကီးဟူဇာလေဟို့ လောက်ဟို့ ဖဟု သားတော်ဟို့ ပြအူးမယ်။ အယ်ဆိုဟာ နန်းနို့ဂူလောင်းဟာ အံ့ဩဟားလေ့မယ်။

21 ဖဟာ လူသေလေဟို့ ထမြော့-က်စေဘီး ပုလန်ရှင်စေမျိုးဘဲ သားတော်ဟုလည်း မိမိလိုရှင်ဟူ လူလေဟို့ ပုလန်ရှင်စေမယ်။

22 ဖဟာ ဖယ်လူဟို့လည်း တရားစီရင်ဟု။ ဖဟာ သားတော်ဟို့ တရားစီရင်ခွမ် ဂူလောင်းဟို့ ပေးအပ်ဟားဟုယ်။

23 အယ်ကြောန့် လူလေ ဂူလောင်းဟာ ဖဟို့ ရိုသေမျိုးဘဲ သားတော်ဟို့လည်း ရိုသေရမယ်။ သားတော်ဟို့ ရိုသေဟု ဆိုဟာ သားတော်ဟို့ စေလွှတ်ဟူ ဖဟို့လည်း ရိုသေဟု။”

24 “နန်းနို့ဟို့ ငါ မှန်တိုင်းပြောမယ်၊ ငါ့စကားတော်လေဟို့ ကြားဘီး ငါ့ဟို့ စေလွှတ်ဟူ ဖဟို့ ယောင်ကြည်ဟူလူဟာ ထာဝရသတ်ရမယ်။ သူးနို့ဟာ တရားစီရင်ခံရဘဲနသေရာဟုနေ သတ်ရှင်ရာဟို့ ကူးဟားဘီဖြစ်ဟုယ်။

25 နန်းနို့ဟို့ ငါ မှန်တိုင်းပြောမယ်၊ လူသေလေဟာ ဘုရားသခင်သားတော်ရဲ့ သံဟို့ ကြားရဟို့ခီဟာ ရော့-က်နေဘီ။ အယ်ခီဟာ ရော့-က်နေဘီ သားတော်ရဲ့ သံဟို့

ကြားရဟူ လူလေဟာ သတ်ရှင်ရလေ့မယ်။

²⁶ ဖကိုယ်တိုင်ဟာ သတ်ရဲ့ ရင်းမြစ်ဖြစ်ဟူမျိုးဘဲ သားတော်ဟိုလည်း သတ်ရဲ့ ရင်းမြစ်ဖြစ်စေဟယ်။

²⁷ သားတော်ဟာ လူရဲ့ သားဖြစ်ဟူကြောင့် တရားစီရင်ခွင့်ဟို့ အပ်ပေးလေဟယ်။

²⁸ အယ်မူဇာဟို့ အံ့ဩဂေ့န။ သန်းခလိုင်ထဲဟု လူသေလေ ဂူလောင်းဟာ သားတော်ရဲ့ သံဟို့ ကြားရဟို့ ခီရော့-က်လာနေဘိ

²⁹ အယ်ဘီးဟာ သူးနို့ရဲ့ သန်းခလိုင်ထဲဟု ထွပ်ရမယ်။ ကောန်းဇာလောက်ဟူ လူလေဟာ ထမြော့-က်ဘီး သတ်ရှင်လေ့မယ်။ ကောန်းဘဲဇာလောက်ဟူ လူလေဟာ ထမြော့-က်ဘီး ပြစ်စီရင်ခံရမယ်။

ယေရှုကြောန်း သတ်သေခံသူလေ

³⁰ “ငါဟာ ငါ့ရဲ့ ခွမ့်အာဏာနု ဖြားလည်းလောက်နိုင်ဟု။ ငါဟာ ဘုရားသခင် ပြောဟွားတိုင်းဘဲ တရားစီရင်ဟယ်။ အယ်ကြောန် ငါ့ရဲ့ တရားစီရင်ဇာဟာ မှန်ဟယ်။ ဖြားဖြစ်ကြောန်းနူးဆိုဟာ ငါ့ရဲ့ လိုတိုင်းလောက်ဟု။ ငါ့ဟို့ စေလွှတ်ဟူ ဖရဲ့ လိုတိုင်းဘဲ လောက်ဟယ်။

³¹ “ငါဟာ ငါ့ရဲ့ ကြောန်းဟို့ သတ်သေခံမယ် ဆိုဟာ ငါ့ရဲ့ သတ်သေခံချစ်ဟာ မှန်ဖြစ်ဟို့ မူဟု။

³² အယ်ဘေမဲ့ ငါ့ကြောန်းဟို့ သတ်သေခံပေးမယ့် လူတယော့-က် ရှိဟယ်။ အယ်လူပြောဟူ ငါ့ကြောန်းဟာ မှန်ဖြစ်ဟယ် ဆိုဇာဟို့ ငါသိဟယ်။

33 နန်းနို့ဟာ ယောဟန်နားဟို့ တမန်လေဟို့ စေလွှတ်ဟယ်။ သူဟာ သမ္မတရားဟို့ သတ်သေခံဟယ်။

34 လူရဲ့သတ်သေခံချစ်ဟို့ ငါခံယူဇာ မူဟာ။ နန်းနို့ကယ် တန်ခံရဟို့တွပ် အယ်မျိုး ငါပြောဟယ်။

35 ယောဟန်ဟာ တော့-က်လောန်ဘီး လန်းနေဟူ မီးအီ နတူဟယ်။ နန်းနို့ဟာ သူရဲ့ လန်းရောန်ထဲမာ ရှစ်ဟားဘဲ့ ပျော်ဟို့ ဆန္ဒရှိဂေဟယ်။

36 အယ်ဘေမဲ့ ယောဟန်ရဲ့ သတ်သေထတ် ကီးမြတ်ဟူ သတ်သေဟာ ငါ့မာရှိဟယ်။ ငါ့ဖဟု ငါ့ဟို့ ပေးအပ်ဟူ ဇာ လေဟို့ ခု ငါပြီးမြော့-က်အောန် လောက်ဆောန်နေဇာဟာ ငါ့ဟို့ ငါ့ဖဟု စေလွှတ်ဟယ် ဆိုဇာဟို့ သတ်သေခံနေဟယ်။

37 ငါ့ဟို့ စေလွှတ်ဟူ ဖဟုလည်းဘဲ့ ငါ့ကြောန်းဟို့ သတ်သေခံဟယ်။ နန်းနို့ဟာ ဖရဲ့ သံတော်ဟို့ ကြားဖူးဂေဟ။ မျစ်နှာတော်ဟို့လည်း မြင်ဖူးဂေဟ။

38 အယ်ဘီးဟာ ဖစေလွှတ်ဟူလူဟို့ ယောင်ကြည်ဘဲ ကြောန် စကားတော်ဟာ နန်းနို့ရဲ့ စိန်လောင်းထဲမာ မေ့ဟူ။

39 နန်းနို့ဟာ ထာဝရသတ်ဟို့ တို့လေ့မယ် ထန်ဘီး ကျမ်းစာလေဟို့ လေ့လာဂေဟယ်။ အယ်ကျမ်းစာလေဟု ငါ့ကြောန်းဟို့ သတ်သေခံဟားဟယ်!

40 အယ်ဘေမဲ့ နန်းနို့ဟာ သတ်ရဟို့တွပ် ငါ့နားဟို့ လာရှင်ဟူ ဆန္ဒ မေ့ဟူ။

41 “ငါဟာ လူလေရဲ့ ချီးမွမ်းဇာတို့ ရှာဟု။

42 အယ်ဘေမဲ့ နန်းနို့ဟာ ဖြားမျိုးလူဇာလေ ဖြစ်ဟယ် ဆိုဇာတို့ ငါသိဟယ်။ နန်းနို့မာ ဘုရားသခင်တို့ ရှစ်ဟူ နှ လောင်းသားမေ့ဟု ဆိုဇာတို့လည်း ငါသိဟယ်။

43 ငါဟာ ငါ့ဖရဲ့ ခွမ့်အာဏာနု ရော့-က်လာဟယ်။ အယ်ဘေမဲ့ နန်းနို့ဟု ငါ့တို့ လတ်ခံဂေ့ဟု။ အယ်ဘေမဲ့ လည်း တခြားလူတယော့-က်ဟာ သူ့ကိုယ်ပိုင်ခွမ့်အာဏာ နု ရော့-က်လာမယ် ဆိုဟာ နန်းနို့လတ်ခံလေ့မယ်။

44 နန်းနို့ဟာ ယော့-က်နယော့-က် ချီးမွမ်းခံရဇာတို့ဘဲ ကြိုက်ဂေ့ဟယ်။ အယ်ဘေမဲ့ တပါးဒဲရှိဟူ ဘုရားသခင် နားဟု ချီးမွမ်းခံရတို့ ကြိုးစားဂေ့ဘဲဟူ နန်းနို့လေဟာ ငါ့ တို့ ဖယ်မျိုး ယောင်ကြည်နိုင်ဂေ့မယ်နူး။

45 အယ်ဘီးဟာ ငါဟု နန်းနို့တို့ ငါ့ဖရှေ့မာ စွပ်စွဲလေ့ မယ် ဆိုဇာတို့ ထန်ဂေ့နု။ နန်းနို့တို့ စွပ်စွဲမယ့်လူဟု နန်းနို့ မျှော်လင့်အားကိုးဟူ မောရှေ့ဘဲဖြစ်ဟယ်။

46 မောရှေ့ဟာ ငါ့ကြောန်းတို့ ရေးဟားဟူကြောန့် နန်း နို့ဟာ မောရှေ့တို့ ယောင်ကြည်ဟယ် ဆိုဟာ ငါ့တို့လည်း ယောင်ကြည်ဂေ့လေ့မယ်။

47 အယ်ဘေမဲ့ မောရှေ့ရေးဟားဟူ ကျမ်းစာလေတို့မှ ယောင်ကြည်ဟု ဆိုဟာ ငါ့စကားတော်လေတို့လည်း ဖယ် မျိုး ယောင်ကြည်နိုင်တို့နူး။”

ယေရှုဟု လူငါးထောင့်ကို ကျွေးမွေးတော်မူဟူကြော
 န်း

(မဿဲ ၁၄.၁၃-၂၁; မာကု ၆.၃၀-၄၄; လုကာ ၉.၁၀-
 ၁၇)

¹ အယ်ဘီးနု ယေရှုဟု ဂါလိလဲအိုင်ကို ကူးတော်မူဟု
 ယ်။ တိဗေရိအိုင် ဆိုဘီးလည်း ခေါ်ဝေဟွယ်။

² လူနာလေဟို နာပျော့-က်စေတော်မူဟူ နိမိတ်လတ်
 ခဏာလေဟို မြင်ဟွားဘီးကြောန့် လူအောက်ဂီးဟွာ
 နှော့-က်ဟို လိုက်ဝေဟွယ်။

³ ယေရှုဟု တောန်ထတ်ဟို တတ်ဟွားဘီး တမဲ့တော်
 လေနတူးဒု ထိုင်ဝေဟွယ်။

⁴ ခုခီဟု ယုဒလူလေရဲ့ ပသခါပွဲတော် နီးကပ်လာဟု
 ယ်။

⁵ ယေရှုဟု ပတ်စစ်မွဲကေလိုက်ဟူ ခီမာ သူနားဟို လူ
 အောက်ဂီးလာနေဇာဟို မြင်ဟွားဟွယ်။ အယ်ကြောန့် ဖိ
 လိပုပုဟို “အယ်လူလေဟို ကျွေးဟိုစားဇာ ဖယ်နေရာမာ
 ဝယ်ရမယ်နွဲ့” ဆိုဘီး မေးတော်မူလေဟွယ်။

⁶ ကိုယ်တော်ဟု ဖိလိပုပုဟို စမ်းသပ်ဟိုတွပ် မေးလို
 က်ဟွယ်။ ဖြားဖြစ်ကြောန့်နွဲ့ဆိုဟု ကိုယ်တော်ဟု ဖြားဇာ
 လောက်ရမယ် ဆိုဇာဟို သိတော်မူဟွားပီးဘီ။

⁷ ဖိလိပုပုဟု “သူနွဲ့ဟု စားဇာဒစ်သားစီ စားရဟိုတွပ်
 ငွေဒန်းဂါး*လေ ၂၀၀ ထတ် ပိုမှဘဲ လော့-က်အောန်ဝယ်

* 6:7 ၆.၇ ငွေဒန်းဂါး၊ ငွေဒန်းဂါးတလွားဟု ကျေးဝါမာနေဟူ
 လောက်သမား တယော့-က်ရဲ့ တနေ့လောက်အားခ ဖြစ်ဟွယ် (ရှု မ
 ၂၀.၂)။

နိုင်မယ်” ဆိုဘီး ပုလန်လျှော့-က်လေဟယ်။

⁸ တမဲ့တော်လေထဲဟု တယော့-က်ဖြစ်ဟူ ရှိမုန်ပေတရုရဲ့ညီ အနုဒြေဟု၊

⁹ “အယ်နေရာမာ မုယောမုငါးလောင်းန ငါးနှေ့ကောန်ရှိဟူ ကောန်သားတယော့-က်ရှိဟယ်။ အယ်ဘေမဲ့ အယ်မုန ငါးလေဟာ အယ်လူလေဘောင်ဂီးတွပ် လောင်းဝလော့-က်ဟို့ မူဟု” ဆိုဘီး လျှော့-က်လေဟယ်။

¹⁰ ယေရှုဟု “လူလေဟို့ ထိုင်ခိုင်းလိုက်” ဆိုဘီး မိန့်တော်မူဟယ်။ အယ်နေရာမာ ဖြစ်ပုလန်လေ ရှိဟယ်။ အယ်ကြောန့် ၅,၀၀၀ လော့-က်ရှိဟူ ယော့-က်ကျားလေဟာ ထိုင်ဂေ့ဟယ်။

¹¹ ယေရှုဟာ မဟို့ယူဘီးဟာ ဘုရားသခင်ဟို့ ကျေးဇူးတော် ချီးမွမ်းဘီးန ထိုင်နေဟူ လူလေဟို့ ဝီပေးလိုက်ဟယ်။ အယ်မျိုးဘဲ ငါးဟို့လည်း သူးနှိစားရှင်မျိုးစား†ဂေ့ဟို့တွပ် ဝီပေးလေဟယ်။

¹² သူးနှိလေ ဂူလောင်းဟာ ဗိုက်ဝဟားဟူ ခီမာ ကိုယ်တော်ဟု တမဲ့တော်လေဟို့ “တခုလည်း ပစ်စလတ်ခတ် ဖြစ်ဘဲနေအောန် ကျန်နေဟူ ပိုင်းစလေဟို့ စုသီးဂေ့” ဆိုဘီး ပြောဟယ်။

¹³ အယ်ကြောန့် တမဲ့တော်လေဟာ စုသီးလိုက်ဟူ ခီမာ လူလေစားဟားဟူ မုယောမုငါးလောင်းန ငါးနှေ့ကောန်ဟုနေ ကျန်နေဟူ ပိုင်းစလေဟာ ဆယ့်နှေ့တောန်းပုလဲ ရဂေ့

† 6:11 ၆.၁၁ သူးနှိလေဟာ ဗိုက်ပွဲအောန် စားဂေ့ဟယ်။

ဟုယ်။

¹⁴ အယ်နေရာမာရှိဟူ လူလေဟာ ယေရှုလောက်ဟူ အယ်နိမိတ်လတ်ခဏာဟို့ မြင်ဘီး “အယ်လူဟာ လောကဟို့ ရှေ့-က်လာမယ့် ပရောဖက်‡ စစ်မှန်ဖြစ်ဟယ်” ဆိုဘီး ပြောဂေဟယ်။

¹⁵ သူးနို့ဟာ မိမိဟို့ တင်းကြပ်ခေါ်ဆာန်ဟားဘီးဟာ မန်းဂီးလောက်ခိုင်းဟို့ ကြံနေဂေဟယ် ဆိုဇာဟို့ ယေရှုသိတော်မူကြောန့် နှော့-က်တခါ တောန်ထတ်ဟို့ တယော့-က်ဒဲ ထွပ်ဟားဟယ်။

ယေရှု ရေထတ်မာ လမ်းရှော့-က်ကြောန်း

(မသဲ ၁၄.၂၂-၃၃; မာကု ၆.၄၅-၅၂)

¹⁶ နေဒန်ဇာရှော့-က်လာခီမာ ယေရှုရဲ့ တမဲ့တော်လေဟာ ဂါလိလဲအိုင်ထဲဟို့ ဆင်းဟားဘီး၊

¹⁷ လှေထတ်ဟို့ တတ်ဘီး၊ အိုင်ဟို့ ဖြတ်ဘီး ကပေရနောင်မြို့ဟို့ ပုလန်ဟားဂေဟယ်။ ညဉ့်ခန်းဇာရှော့-က်လာလည်း ယေရှုဟာ သူးနို့နားဟို့ ရှော့-က်လာသေးဟု။

¹⁸ အယ်ခီမာ လေပြင်းတိုက်လာဘီး လှိုင်းကီးလာဟယ်။

¹⁹ အယ်ဘီးန တမဲ့တော်လေဟာ သောင်းလေးမိုင်လော့-က် လှော်ခတ်ဘီးခီမာ ယေရှုဟာ ရေထတ်မာ လမ်းရှော့-က်ဘီးဟာ လှေနားဟို့ လာနေဇာဟို့ မြင်ဟားဘီး ကြော့-က်လန်ဟားဂေဟယ်။

‡ 6:14 ၆.၁၄ ပရောဖက်၊ ရှု ၁.၂၁။

20 ယေရှုဟု “ကြော့-က်ဂေန်။ ငါဘဲဖြစ်ဟယ်” ဆိုဘီး သူးနို့ဟို မိန့်တော်မူလေဟယ်။

21 အယ်ဘီးန သူးနို့ဟာ ဝန်းသာအားရန ကိုယ်တော့်ဟို လှေထတ်ဟို ဆွဲဒန်ဘီးန လှေဟာ သူးနို့သွားမယ့် ကမ်း ခြေဟို ရှင်းရှင်းဘဲ ရှေ့-က်ဟားဟယ်။

ယေရှုဟို လူလေ လိုက်ရှာဟူကြောင်း

22 နတ်ကီးတိုင်ရှေ့-က်မှ အိုင်တဖတ်မာနေဟားဟူ လူ အောက်ဂီးဟာ အယ်နေရာမာ လှေတစင်းဘဲရှိနေဇာဟို ဒိထားမိဂေဟယ်။ အယ်လှေထဲမာ ယေရှုဟာ တမဲ့တော် လေနတူးဒု လိုက်ဟားဘဲန တမဲ့တော်လေဘဲ ထွပ်ဟားဇာ ဟို သူးနို့ဟာ သိဟားဂေဟယ်။

23 တိဗေရီမြို့ဟု တခြားလှေလေဟာ သခင်ဘုရား ကျေးဇူးတော် ချီးမွမ်းဘီးန လူအောက်ဂီး မုစားဟားဟူ ကမ်းခြေနီးဟို ရှေ့-က်လာဂေဟယ်။

24 လူအောက်ဂီးဟာ အယ်နေရာမာ ယေရှုန တမဲ့တော် လေရှိဟု ဆိုဇာဟို သိဟားဟူ ခီမာ အယ်လှေလေထဲဟို ဝမ်ဘီးန ကိုယ်တော့်ဟို ရှာဟိုတွပ် ကပေရနောင်မြို့ဟို သွားဂေဟယ်။

သတ်မုဖြစ်ဟူ ယေရှု

25 အိုင်တဖတ်ကမ်းမာ ကိုယ်တော့်ဟို လူလေတို့ဟူ ခီ မာ သူးနို့ဟု “ဆရာ၊ အယ်နေရာဟို ဖယ်ခီဒူးဟု ရှေ့-က် လာနူး” ဆိုဘီး ကိုယ်တော့်ဟို မေးလျှော့-က်လေဟယ်။

26 ယေရှုဟု “နန်းနို့ဟို ငါ မှန်တိုင်းပြောမယ်၊ နန်းနို့ ငါ့
ဟို လိုက်ရှာနေဇာဟာ ငါ့ရဲ့ နိမိတ်လတ်ခဏာလေဟို နား
လည်ဟူကြောနဲ့ မှဟု။ နန်းနို့ဟာ မုဟို စားရှင်မျိုးစားရ
ကြောနဲ့ ဖြစ်ဟယ်။

27 ပုပ်ပျစ်တတ်ဟူ စာတွပ် လောက်ဘဲန ထာဝရသတ်
တွပ် တည်မြဲဟူ စာဟို လောက်ဂေ။ အယ်မူဇာဟာ လူရဲ့
သားဟု နန်းနို့ဟို ပေးမယ့် စာဖြစ်ဟယ်။ ဖြားဖြစ်ကြော
နဲ့နူးဆိုဟာ ဖဘုရားသခင်ဟာ လူရဲ့သားဟို ဇီခတ်ဟား
တော်မူဟယ်” ဆိုဘီး ဖြေတော်မူလေဟယ်။

28 အယ်ကြောနဲ့ သူးနို့ဟု “ကျွန်တော့်ဟားလေဟာ
ဘုရားသခင် လိုရှင်ဟူ လောက်ဟို လောက်ဟိုတွပ် ကျွန်
တော့်ဟားလေဟု ဖြားဇာ လောက်ရဟိုနူး” ဆိုဘီး ကိုယ်
တော့်ဟို မေးလျှော့-က်ဂေဟယ်။

29 ယေရှုဟု “ဘုရားသခင် လောက်စေရှင်ဟူဇာဟု
ဘုရားသခင် စေလွှတ်လိုက်ဟူ သူဟို ယောင်ကြည်ဟိုဘဲ
ဖြစ်ဟယ်” ဆိုဘီး ဖြေတော်မူဟယ်။

30 သူးနို့ဟု “အယ်ဆိုဟာ ကျွန်တော့်ဟားလေ မြင်ဘီး
ကိုယ်တော့်ဟို ယောင်ကြည်ဟိုတွပ် ဖယ်မျိုး နိမိတ်လတ်
ခဏာဟို ကိုယ်တော်ဟု လောက်ပြမယ်နူး။ ကိုယ်တော်ဟု
ဖယ်မျိုး လောက်ပေးမယ်နူး။

31 ‘ကိုယ်တော်ဟာ ကောင်းဂန်ဟု မုဟို သူးနို့စားဟို ပေး
တော်မူဟယ်’ ဆိုဘီး ကျမ်းစာမာ ရေးဟားမျိုးဘဲ ကျွန်
တော့်ဟားလေရဲ့ ဘိုးဘေးလေဟု ကန္တာရမာ မနုနမုဟို

စားဂေဟယ်” ဆိုဘီး ပုလန်ဖြေဂေဟယ်။

³² ယေရှုဟု “နန်းနို့ဟို ငါ မှန်တိုင်းပြောမယ်၊ ကောန်းဂန်ဟု မဟို နန်းနို့ဟို ပေးဟူ သူဟာ မောရှေ မဟု။^၆ ငါ့ဖဟု ကောန်းဂန်ဟုနေ စစ်မှန်ဟူ မဟို နန်းနို့ဟို ပေးတော်မူဟယ်။

³³ ဘုရားသခင်ပေးဟူ မဟာ ကောန်းဂန်ဟုနေ ဆင်းလာဘီး လောကသားလေဟို သတ်ပေးဟူ သူဖြစ်ဟယ်” ဆိုဘီး မိန့်တော်မူဟယ်။

³⁴ သူးနို့ဟု “သခင်၊ အယ်မဟို ကျန်တော့်ဟားလေဟို မဲ့ဒမ်း ပေးပါ” ဆိုဘီး တောန်းလျှော့-က်ဂေဟယ်။

³⁵ ယေရှုဟု “ငါဟာ သတ်မူ ဖြစ်ဟယ်။ ငါ့နားဟို လာဟူလူလေဟာ လောင်းဝ ငတ်မွတ်လေ့မယ် မူဟု။ ငါ့ဟို ယောင်ကြည်ဟူ လူလေဟာလည်း လောင်းဝ ရေငတ်လေ့မယ် မူဟု။

³⁶ ခု နန်းနို့ဟာ ငါ့ဟို မြင်နေဘေမဲ့ ယောင်ကြည်လေ့ဟို မူဟု ဆိုဇာဟို နန်းနို့ဟို ငါပြောဟားဟယ်။

³⁷ ငါ့ဖဟု ငါ့ဟို ပေးဟားဟူ လူတိုင်းဟာ ငါ့နားဟို လာလေ့မယ်။ ငါ့နားလာဟူလူဟို ငါဟာ လောင်းဝ ပစ်ပယ်ဟို မူဟု။

³⁸ ဖြားဖြစ်ကြောန့်နူးဆိုဟာ ငါဟာ ငါလိုရှင်ဟူတိုင်း လောက်ဟိုမူဘဲ ငါ့ဟို စေလွတ်ဟူ သူရဲ့ လိုရှင်ဟူတိုင်း လောက်ဟိုတွပ် ကောန်းဂန်ဟုနေ ဆင်းလာဟယ်။

§ 6:32 ၆.၃၂ နန်းနို့ဟို ပေးဟူ သူဟာ မောရှေ မဟု၊ အယ်မျိုးမှတ်နေဟာ နန်းနို့ဟို မောရှေပေးဇာ မူဟု။

39 ငါ့ဟို့ စေလွတ်ဟူ သူရဲ့ လိုတော်ဟာ ငါ့ဟို့ ပေးအပ်ဟူးဟူ လူလေ ဂူလောင်း ဆောင်းရှောင်းစေဘဲနဲ့-က်ဆောင်းနေ့မာ သူးနို့လေ ဂူလောင်းဟာ ရှင်ပုလန်ထမြော့-က်စေဟို့တွပ် ဖြစ်ဟယ်။

40 ငါ့ဖလိုရှင်ဇာဟု သားတော်ဟို့ ဗြင်ဘီး ယောင်ကြည်လာဟူ လူလေဂူလောင်းဟာ ထာဝရသတ်ရဟို့ဖြစ်ဟယ်။ ငါဟုလည်း နေ့-က်ဆောင်းနေ့မာ သူးနို့ဟို့ ရှင်ပုလန်ထမြော့-က်စေမယ်” ဆိုဘီး မိန့်တော်မူလေဟယ်။

41 ကိုယ်တော်ဟု “ငါဟာ ကောန်းဂန်ဟုနေ ဆင်းလာဟူ မုဖြစ်ဟယ်” ဆိုဘီး မိန့်တော်မူလိုက်ဟူကြောန့် ယုဒလူလေဟာ ကိုယ်တော်ကြောန်းဟို့ စဘီးဟာ ဝေဖန်ဂေဟယ်။

42 အယ်ကြောန့် သူးနို့ဟု “အယ်လူဟာ ယောသပ်ရဲ့ သား ယေရှု မှဟုလော။ နို့လေဟာ သူရဲ့ မိဖဟို့ သိဟယ်။ အယ်ဆိုဟာ သူဟာ ကောန်းဂန်ဟုနေ ဆင်းလာဟယ် ဆိုဘီး ဖယ်မျိုးဖြစ်ကြောန့် ပြောနေရနူး” ဆိုဘီး ပြောနေဂေဟယ်။

43 ယေရှုဟု “နန်းနို့ရှင်းရှင်းထဲမာ ဝေဖန်နေဇာဟို့ ရပ်ဂေ။

44 ငါ့ဟို့ စေလွတ်ဟူ ဖဟု သူးနို့ဟို့ ဆွဲခေါ်ဟု ဆိုဟာ လူလေဟာ ငါနားဟို့ လာနိုင်ဂေဟု။ ငါနားဟို့ လာဟူလူလေဟို့ နေ့-က်ဆောင်းနေ့မာ ငါဟာ ရှင်ပုလန်ထမြော့-က်စေမယ်။

45 ပရောဖက်ကျမ်းလေမာ ‘လူတိုင်းဟာ ဘုရားသခင်

အားဖြင့် သွန်သန်ပေးဇာဟို ခံရလေ့မယ်’ ဆိုဘီး ရေးဟား ဟယ်။ ဖနားဟု ကြားရဘီး သန်ယူဟူ ဖယ်သူမဆို ငါနား ဟို လာဂေဟယ်။

⁴⁶ အယ်မျိုးဆိုဟာ ယော့-က်ယော့-က်ဟု ဖဟို မြင် ဖူးဟယ် ဆိုဘီး ပြောရှင်ဇာ မူဟု။ ဘုရားသခင်နားဟုနေ ရော့-က်လာဟူသူ တယော့-က်ဘွဲ ဖဟို မြင်ဖူးဟယ်။

⁴⁷ နန်းနို့ဟို ငါ မှန်တိုင်းပြောမယ်၊ ငါ့ဟို ယောင်ကြည် ဟူ လူဟာ ထာဝရသတ်ဟို ရဟယ်။

⁴⁸ ငါဟာ သတ်မု ဖြစ်ဟယ်။

⁴⁹ နန်းနို့ရဲ့ ဘိုးဘေလေဟာ ကန္တာရထဲမာ မနနမုဟို စား ရဘေမဲ့လည်း သေဟားဂေဟယ်။

⁵⁰ အယ်ဘေမဲ့ အယ်မုဟာ ကောန်းဂန်ဟုနေ ဆင်းလာ ဟူကြောန့် စားဟူလူတိုင်းဟာ သေရလေ့ဟို မူဟု။

⁵¹ ငါဟာ ကောန်းဂန်ဟုနေ ဆင်းလာဟူ သတ်မု ဖြစ်ဟယ်။ နန်းနို့ဟာ အယ်မုဟို စားမယ် ဆိုဟာ ထာဝရသတ် ရှင် လေ့မယ်။ လောကသားလေ သတ်ရှင်နိုင်ဟိုတွပ် ငါ ပေးဟူ မုဟာ ငါ့ရဲ့သား ဖြစ်ဟယ်” ဆိုဘီး မိန့်တော်မူလေ ဟယ်။

⁵² အယ်န ယုဒလူလေဟု “အယ်လူဟု သူ့ရဲ့သားဟို နို့ လေစားဟို ဖယ်မျိုးပေးနိုင်မယ်နူး” ဆိုဘီး သူးနို့ရှင်းရှင်း ဟာ စဘီး ငြင်းဂေလေဟယ်။

⁵³ ယေရှုဟု “နန်းနို့ဟို ငါ မှန်တိုင်းပြောမယ်၊ နန်းနို့ဟာ လူသားရဲ့ သားဟို စားဟု။ သူ့ရဲ့သွေးဟို သော့-က်ဟု ဆို

ဟာ နန်းနို့ရဲ့ထဲမှာ သတ်မေ့ဟို့ မှဟဟ။

54 ငါ့သားဟို့ စားဘီး ငါ့သွီးဟို့ သော့-က်ဟူသူလေဟာ ထာဝရသတ်ဟို့ ရဟယ်။ ငါဟာ သူးနို့ဟို့ နော့-က်ဆောင်း နေ့မာ ရှင်ပုလန်ထမြော့-က်စေမယ်။

55 ဖြားဖြစ်ကြောန့်နူးဆိုဟာ ငါ့သားဟာ စစ်မှန်ဟူ စား ဇာဖြစ်ဘီး ငါ့ရဲ့ သွီးဟာ စစ်မှန်ဟူ သော့-က်ဇာဖြစ်ဟယ်။

56 ငါ့ရဲ့ သားဟို့ စားဘီး ငါ့သွီးဟို့ သော့-က်ဟူ လူလေ ဟာ ငါ့ရဲ့ ထဲမှာ သတ်ရှင်နေဟယ်။ ငါဟာလည်း သူးနို့ရဲ့ ထဲမှာ သတ်ရှင်နေဟယ်။

57 သတ်ရှင်ဟူ ဖဟ ငါ့ဟို့ စေလွှတ်တော်မူဘီး ငါဟာ လည်း ဖအားဖြင့် သတ်ရှင်ဟယ်။ အယ်မျိုးဘွဲ့ ငါ့ဟို့ စား ဟူ လူတိုင်းဟာလည်း ငါ့အားဖြင့် သတ်ရှင်ရလေ့မယ်။

58 အယ်မျိုးဆိုဟာ အယ်မဟာ ကောင်းဂန်ဟုနေ ဆင်း လာဟူ မဖြစ်ဟယ်။ နန်းနို့ ဘိုးဘေးလေဟာ မနုနုမဟို့ စားဘီး သေဟားဂေ့ဟယ်။ အယ်ဘေမဲ့ အယ်မဟို့ စားဟူ လူတိုင်းဟာ ထာဝရ သတ်ရှင်လေ့မယ်” ဆိုဘီး သူးနို့ဟို့ မိန့်တော်မူလေဟယ်။

59 ယေရှုဟာ ကပေရနောင်မြို့ဟာ ဝါလယ်ဇရပ်မာ သွန် သန်ပေးဒူးဟာ အယ်မူဇာလေဟို့ မိန့်တော်မူလေဟယ်။

ထာဝရသတ်နုဆိုင်ဟူ စကားတော်လေ

60 ကိုယ်တော်ရဲ့ တမဲ့တော်လေ ဘောင်ဂီးဟာ အယ်မူ ဇာဟို့ ကြားဘီးန “အယ်မျိုး သွန်သန်ဇာဟာ ရရာတိုင်း ခ

တ်ဟယ်။ အယ်မူဇာဟို ဖယ်လူဟ နားထောန်နိုင်ဟိုနွဲ့” ဆို
ဘီး ပြောဂေဟယ်။

⁶¹ တမဲ့တော်လေဟာ အယ်ကြောန်းရာဟို ဝေဖန်နေဂေ
ဟယ် ဆိုဇာဟို ယေရှုဟ လိုလိုသိနေဟယ်။ အယ်ကြော
န့် ကိုယ်တော်ဟ “အယ်စကားကြောန့် နန်းနို့ စိပျစ်ဟားဘီ
လော။

⁶² အယ်ဆိုဟာ လူရဲ့သားဟ ရင်းရင်းဒူးဟ နေရာဟို ပု
လန်တတ်ကြွဇာဟို နန်းနို့လေ မြင်ရမယ် ဆိုဟာ ဖယ်မျိုး
ထန်ဂေမယ်နွဲ့။

⁶³ ဘုရားသခင်ရဲ့ ဝိညာဉ်ဟ သတ်ဟို ပေးဟယ်။ လူရဲ့
တဂိုးဟာ လောင်းဝ သောင်းဇားဟို ရဟ။ နန်းနို့ဟို ငါပြော
ဟ စကားလေဟာ သတ်ပေးဟ ဘုရားသခင်ရဲ့ ဝိညာဉ်
တော်န ဆိုင်ဟယ်။

⁶⁴ နန်းနို့ထဲဟ တချို့ဟာ ခုထိ ယောင်ကြည်ဂေဟ” ဆို
ဘီး သူးနို့ဟို မိန့်တော်မူဟယ်။ ဖယ်လူလေဟ ယောင်ကြ
ည်ဂေဟ။ ဖယ်လူဟ မိမိဟို သစ်စာဖော့-က်မယ် ဆိုဇာ
ဟို ယေရှုဟာ စစဒူးဟ သိနေဟယ်။

⁶⁵ အယ်ဘီးန ကိုယ်တော်ဟ “အယ်ကြောန်းကြောန့်
ဖဟ ခွမ်ပေးဟ ဆိုဟာ ဖယ်လူလည်း ငါနားဟို လာဂေ
ဟို မူဟ ဆိုဘီး နန်းနို့ဟို ငါပြောဟားဟယ်” ဆိုဘီး မိန့်
တော်မူလေဟယ်။

⁶⁶ အယ်ခီဟစဘီး ယေရှုရဲ့ တမဲ့တော်လေဘောင်ဂီး
ဟာ လှည့်ပုလန်ဟားဘီး နော့-က်ထပ် ကိုယ်တော်နတူးဒု
လိုက်ဂေဟယ်။

⁶⁷ အယ်ကြောန့် ယေရှုဟု တမဲ့တော်ဆယ့်နှေ့ပါးဟို့ “နန်းနို့လည်း ထွပ်ဟွားရှင်ဂေ့လော” ဆိုဘီး မေးတော်မူလေဟယ်။

⁶⁸ ရှိမုန်ပေတရုဟု ကိုယ်တော့်ဟို့ “သခင်၊ ကျွန်တော့်ဟွားလေဟု ဖယ်လူနားဟို့ သွားရဂေ့ဟို့နူး။ ထာဝရသတ်နဆိုင်ဟူ စကားတော်လေဟု ကိုယ်တော်မာဘဲ့ရှိဟယ်။

⁶⁹ အယ်ဘီးဟု ကိုယ်တော်ဟု ဘုရားသခင်နားဟုနေကြွလာဟူ သန်ရှင်းသူဖြစ်ဟယ် ဆိုဇာဟို့ ခု ကျွန်တော့်ဟွားလေ ယောင်ကြည်ဘီး သိဂေ့ဟယ်” ဆိုဘီး ဖြေတော်မူလေဟယ်။

⁷⁰ ယေရှုဟု “နန်းနို့ဆယ့်နှေ့ပါးဟို့ ငါဝီးကျော-က်ဟွားဟယ် မူဟုလော။ အယ်ဘေမဲ့ နန်းနို့ထဲဟု တယော-က်ဟု နတ်ဆိုးဖြစ်ဟယ်!” ဆိုဘီး ပုလန်မိန့်တော်မူလိုက်ဟယ်။

⁷¹ ကိုယ်တော်ဟု ရှိမုန်ရှကာရုတ်ရဲ့သား ယုဒကြောင်းဟို့ ပြောနေဇာဖြစ်ဟယ်။ ဖြားဖြစ်ကြောန့်နူးဆိုဟု ယုဒဟု တမဲ့တော်ဆယ့်နှေ့ပါးထဲဟု တပါးဖြစ်ဘေမဲ့လည်း ကိုယ်တော့်ဟို့ သစ်စာဖော့-က်မယ့်လူဖြစ်ဟယ်။

7

ယေရှုန သူညီလေကြောင်း

¹ အယ်ဘီးန ယေရှုဟု ဂါလိလဲနယ်ဟို့ လှည့်လည်တော်မူလေဟယ်။ အယ်နေရာမာရှိဟူ ယုဒအာဏာပိုင်

လေဟာ ကိုယ်တော့်ဟို သတ်ဟိုရှာနေဂေဟူကြောန့် ယုဒ
နယ်ဟို သွားရှင်ဟုမ်း။

² ယုဒလူလေရဲ့ သစ်ခတ်တဲပွဲ နီးလာဟူ ခီမာ၊

³ ယေရှုရဲ့ ညီလေဟာ ကိုယ်တော့်ဟို “နို့နောန် လောက်
နေဇာလေဟို နို့နောန်ရဲ့ တမဲ့တော်လေ မြင်ရဟိုတွပ် အယ်
နေရာဟု တွပ်ဟားဘီးဟာ ယုဒနယ်ဟို သွားပါ။

⁴ ပေါ်ရှင်ဟူလူလေဟာ သူးနို့ဖြားဇာဘဲလောက်လောက်
လှည့်ဝှက်ဘီးလောက်ဂေဟု။ နို့နောန်ဟာ အယ်မူဇာလေ
ဟို လောက်မယ် ဆိုဟာ နို့နောန်ကြောန်းဟို တလောက
လောင်း သိစေပါ!” ဆိုဘီး ပြောဂေဟယ်။

⁵ ကိုယ်တော်ရဲ့ ညီလေဟိုမှ ကိုယ်တော့်ဟို ယောင်ကြ
ညံဂေဟု။

⁶ ယေရှုဟာ သူးနို့ဟို “ငါ့ခီရော-က်သေးဟု။ နန်းနို့တွပ်
ခီတိုင်းဟာ ဆင်သင့်ဖြစ်ဟယ်။

⁷ လောကသားလေဟာ နန်းနို့ဟို မူးဂေဟု။ အယ်ဘေမဲ့
ငါ့ဟို မူးဂေဟယ်။ ဖြားဖြစ်ကြောန့်နူးဆိုဟာ သူးနို့ရဲ့ ကျင့်
လေဟု ဆိုးညစ်ဟယ် ဆိုဘီး ငါဟု သတ်သေခံဟယ်။

⁸ နန်းနို့ အယ်ပွဲတော်ဟို သွားဂေ။ ငါ့ခီပုလဲဇောင်သေး
ဘဲဟူကြောန့် အယ်ပွဲတော်ဟို ငါသွားဟု”* ဆိုဘီး မိန့်
တော်မူလေဟယ်။

⁹ အယ်မျိုးပြောဘီးန ကိုယ်တော်ဟာ ဂါလိလဲနယ်မာဘဲ
ဆစ်ဘီးနေလေဟယ်။

* 7:8 ၇.၈ ငါသွားဟု၊ တချို့ မူရင်းလတ်ရေးမူလေမာ ငါသွားဟိုမှသေးဟု၊
ဆိုဘီး ရှိဟယ်။

ယေရှုဟာ တဲတော်ပွဲဟို ကြွတော်မူဟူကြောန်း

10 ကိုယ်တော်ရဲ့ ညီလေဟာ ပွဲတော်ဟို သွားလိုက်ဘီးန
ယေရှုဟုလည်း တိတိဟား လိုက်ဟားဟယ်။

11 ယုဒအာဏာပိုင်လေဟာ အယ်ပွဲတော်မာ ကိုယ်တော်
ဟို ရှာဂေဟယ်။ သူးနို့ဟု “အယ်လူဟာ ဖယ်မာနူး” ဆိုဘီး
မေးဟယ်။

12 လူအောက်ဂီးထဲမာ ကိုယ်တော်ကြောန်းဟို တီးတိုး
ပြောနေဂေဟယ်။ လူတချို့ဟု “အယ်လူဟာ လူကောန်း
ဖြစ်ဟယ်” ဆိုဘီး ပြောဂေဟယ်။ လူတချို့ဟု “မူဟု။
အယ်လူဟာ လူလေဟို လှည့်ဇးနေဟယ်” ဆိုဘီး ပြော
ဂေဟယ်။

13 အယ်ဘေမဲ့ သူးနို့ဟာ ယုဒ အာဏာပိုင်လေဟို
ကြွ-က်ဂေဟူကြောန်း ဖယ်လူလည်း ကိုယ်တော်ကြော
န်းဟို ပွမ်ပွမ်လန်းလန်းဟား ပြောဂေဟယ်။

14 ပွဲတော်ကာလခီဟာ တဝပ်ကျော်လာဟူ ခီမာ ယေရှု
ဟာ ဗိမာန်တော်ဟို သွားဘီးဟာ စဘီးသွန်သန်လေဟယ်။

15 ယုဒအာဏာပိုင်လေဟာ ရရာတိုင်း အံ့ဩဟားဘီး
“အယ်လူဟာ ပညာသန်ဖူးဘွဲန အယ်ပညာလေ ဘောင်ဂီး
ဟို ဖယ်မျိုးသိနေရနူး” ဆိုဘီး မေးဂေဟယ်။

16 ယေရှုဟု “ငါ့သွန်သန်ချစ်ဟာ ငါ့ရဲ့ကိုယ်ပိုင် သွန်သန်
ချစ် မူဟု။ အယ်ဘေမဲ့ ငါ့ဟိုစေလွတ်ဟူ ဘုရားသခင်ရဲ့
သွန်သန်ချစ်ဖြစ်ဟယ်။

17 ဖယ်လူဘဲ ဖြစ်ဖြစ် ဘုရားသခင်ရဲ့ လိုတော်ဟို လောက်ရှင်ဟူ ဆန္ဒရှိမယ် ဆိုဟာ ငါ့သွန်သန်ချစ်ဟု ဘုရားသခင်နားဟုလာဇာလော၊ အယ်မျိုးမှုဘဲနေဟာ ငါ့ ရဲ့ကိုယ်ပိုင်ခွမ်အာဏာန ပြောနေဇာလော ဆိုဇာဟို သံလေ့ မယ်။

18 သူးနို့ရဲ့ ကိုယ်ပိုင် ခွမ်အာဏာန ပြောဟူလူလေဟာ သူးနို့တွပ် ဖောင်းသရေတော်ဟို့ဘဲ ရှာဂေဟယ်။ အယ် ဘေမဲ့ သူဟို စေလွှတ်ဟူသူရဲ့ ဖောင်းသရေတော်ဟို့ ရှာ ဟူလူဟာ ပြောန့်မှန်ဟူလူဖြစ်ဘီး သူမာ လီညာဇာ မေ့ဟူ။

19 မောရှေဟု နန်းနို့ဟို့ ပညတ်တရားဟို့ ပေးဟွားဟယ် မူဟုလော။ အယ်ဘေမဲ့ နန်းနို့ထဲမာ အယ်ပညတ်တရားဟို့ နားထောန်ဟူလူ ယော့-က်လည်း မေ့ဟူ။ ဖြားဖြစ်ကြောန့် ငါ့ဟို့ သတ်ဟို့ကြိုးစားနေဂေနူး” ဆိုဘီး မိန့်တော်မူလေဟယ်။

20 လူအောက်ဂီးဟု “နန်ထဲမာ နတ်ဆိုးတကောန် ရှိဟယ်! ဖယ်လူဟု နန်ဟို့ သတ်ဟို့ ကြိုးစားနေဂေနူး” ဆိုဘီး ပုလန်ပြောလေဟယ်။

21 ယေရှုဟု “နိုမိတ်လတ်ခဏာတခုဟို့ ငါလောက်ဟူ ခီမာ နန်းနို့လောင်းဟာ အံ့ဩဟွားဟယ်။

22 မောရှေဟု နန်းနို့ရဲ့ သားလေဟို့ ရေဖျားလှီးဟို့ နန်းနို့ဟို့ ခိုင်းဟွားဟူကြောန့် အယ်မူဇာဟို့ မောရှေဟု စပြုဟွားဇာ မူဟူ။ နန်းနို့ရဲ့ ဘိုးဘေးလေဟု စဟွားဟယ် နန်းနို့ဟာ ဒန်းနေမာလည်း သားဂန်းဟွားဟို့ ရေဖျားလှီးပေးဟယ်။

23 မောရှေရဲ့ ပညတ်တရားဟို့ ခုလိုးဖော့-က် ရာရော-က်ဘဲအောန် သားဂန်းတယော့-က်ဟို့ ဒန်းနေမာ ရေဖျားလိုးပေးဟယ် ဆိုဟာ ငါဟာ ဒန်းနေမာ လူတယော့-က်ဟို့ ကျန်းမာစေဟူကြောန် နန်းနို့ဟာ ငါဟို့ ဖြားဖြစ်ဟို့ မျစ်ဖြစ်ရန့။

24 ပြင်ပလတ်ခဏာအားဖြင့် စီရင်ဂေဘဲန မှန်းမှန်ကန်းကန်ဟား စီရင်ဂေ” ဆိုဘီး မိန့်တော်မူလေဟယ်။

အယ်လူဟာ မေရှိယဘဲလော

25 ယေရုရှလင် မြို့သား တချို့ဟ “အယ်လူဟို့ အာဏာပိုင်လေဟာ သတ်ဟို့ ရှာနေဂေဟယ် မူဟလော။

26 ကေ့ကေ့! အယ်လူဟာ လူဘောင်လယ်မာ ဟောပြောနေဇာဟို့ အာဏာပိုင်လေဟာ တားဂေဟမား! အယ်လူဟာ မေရှိယဖြစ်ဟယ် ဆိုဇာဟို့ သူးနို့ဟာ မှန်တိုင်း သိဟားဘီလော။

27 အယ်ဘေမဲ့ မေရှိယကြွလာဟူ ခီမာ ဖယ်နေရာဟနေလာဟယ် ဆိုဇာဟို့ ဖယ်သူလည်း သိဂေဟ။ အယ်လူဟာ ဖယ်ဟလာဟယ် ဆိုဇာဟို့ နို့လေအားလောင်း သိဂေဟယ်” ဆိုဘီး ပြောဂေဟယ်။

28 ယေရှုဟာ ဗိမာန်တော်ထဲမာ သွန်သန်ဟူ ခီမာ သံကုလယ်ဂီးန “နန်းနို့ဟာ ငါဟို့ တကယ်သိဘဲလော။ ငါဟာ ဖယ်ဟလာဟယ် ဆိုဇာဟို့ သိဘဲလော။ ငါဟာ ငါရဲ့ ဆန္ဒနလာဇာ မူဟ။ အယ်ဘေမဲ့ ငါဟို့ စေလွှတ်ဟူ လူဟာ သစ်စာန ပုလဲဇောင်လေဟယ်။ နန်းနို့ဟာ သူဟို့ သိဂေဟ။

29 အယ်ဘေမဲ့ ငါဟာ သူ့ဟို သိဟယ်။ ဖြားဖြစ်ကြောန့် နူးဆိုဟာ ငါဟာ သူနားဟုနေလာဘီး သူဟု ငါ့ဟို စေလွှတ် လိုက်ဟယ်” ဆိုဘီး မိန့်တော်မူလေဟယ်။

30 အယ်ကြောန့် သူးနို့ဟု ကိုယ်တော့်ဟို ဖမ်းဟို့ ကြိုးစား ဘေမဲ့ ကိုယ်တော်ရဲ့ခီ ရော့-က်သေးဘဲဟူကြောန့် ဖယ်သူ လည်း ကိုယ်တော့်ဟို ဖမ်းဂေဟု။

31 အယ်ဘေမဲ့ လူအောက်ထဲဟု များစုဟာ ကိုယ်တော့် ဟို ယောင်ကြည်ဂေဘီး “မေရိုယ ရော့-က်လာဟူ ခီမာ အယ်လူလောက်ဇာလေထတ် ပိုများဟူ နိမိတ်လတ်ခဏာ လေဟို ပြုတော်မူဟို့လော” ဆိုဘီး မေးဂေဟယ်။

ယေရှုဟို ဖမ်းဟို့တွပ် စောန့်လေဟို စေလွှတ်ကြောန့်

32 ယေရှုကြောန့်ဟို လူအောက်ဂီးဟု တီးတိုးပြောနေ ဇာလေဟို ဖာရိရှဲလေ ကြားဟူကြောန့် ယဇ်ပုရောဟိတ်ဂီး လေန ဖာရိရှဲလေဟာ ကိုယ်တော့်ဟို ဖမ်းဟို့တွပ် စောန့်တ ချို့ဟို စေလွှတ်ဂေဟယ်။

33 ယေရှုဟု “ငါဟာ နန်းနို့နတူးဒု ရှစ်ဟားနေဘီးဟာ ငါ့ ဟို စေလွှတ်တော်မူဟူ သူနားဟို သွားရမယ်။

34 နန်းနို့ဟာ ငါ့ဟို ရှာဘေမဲ့ တို့ဟို့ မူဟု။ ဖြားဖြစ်ကြော နူးဆိုဟာ ငါ့ရှိဟူ နေရာဟို နန်းနို့လာနိုင်ဂေဟု” ဆိုဘီး မိန့်တော်မူလေဟယ်။

35 ယုဒအာဏာပိုင်လေဟု “နို့လေရှာတို့ဘဲအောန် သူဟု ဖယ်နေရာဟို သွားဟို့နူး။ နို့လူမျိုးလေနေဟူ လူမျိုးခြား

လေနေဟူ ဗြို့ဟို့ သွားဘီး လူမျိုးခြားလေဟို့ သွန်သန်ဟို့ လော။

³⁶ နို့လေဟာ သူဟို့ လိုက်ရှာဘေမဲ့ ရှာတို့ဟို့ မဟု။ သူ ရှိဟူ နေရာဟို့ နို့လေ လာနိုင်ဟို့ မဟု ဆိုဘီး ပြောဇာဟု ဖြားခိပါယ်နူး” ဆိုဘီး ရှင်းရှင်း ပြောနေဂေဟယ်။

သတ်ပေးဟူ ရေခဲလောန်း

³⁷ ပွဲတော်ရဲ့ ရေးကီးဆောင်းနေဖြစ်ဟူ နှော-က်ဆောင်း နေ့မာ ယေရှုဟာ ထရပ်ဘီးဟာ “ရေငတ်ဟူ လူဟာ ငါနား ဟို့ လာဘီး သော့က်ဂေပါ။

³⁸ ငါ့ဟို့ ယောင်ကြည်ဟူ လူတိုင်းဟာ သော့-က်ရမယ်။ ကျမ်းစာမာ ပြောဟားမျိုးဘဲ ‘သတ်ဟို့ပေးဟူ ရေခဲလော န်းဟာ သူရဲ့ နှလောင်းထဲဟုနေ စီးထွပ်လာလေ့မယ်”[†] ဆို ဘီး သံကုလယ်ဂီး မိန့်တော်မူလေဟယ်။

³⁹ ကိုယ်တော့်ဟို့ ယောင်ကြည်ဟူ လူလေဟာ လတ် ခံရရှိမယ့် ဝိညာဉ်တော်ကြောန်းဟို့ မိန့်တော်မူလေဟယ်။ ယေရှုဟာ ဖောင်းသရေတော် ထန်ရှားဟို့တွပ် ထမြေ့-က် ရသေးဘဲကြောန် ဝိညာဉ်တော်ဟို့ ပေးတော်မူသေးဟု။

လူလေထဲမာ စိဝန်းကွဲဟားကြောန်း

[†] 7:38 **၃.၃၈** ခန်းငယ် ၃၇-၃၈ ထဲဟု ယေရှုရဲ့ စကားလေဟို့ “သတ်ရေထွပ်ဟူ စမ်းရေဒွမ်း ဖြစ်လေ့မယ်။ ၃၈ ကျမ်းစာမာ ပြောဟားမျိုးဘဲ ‘သတ်ဟို့ပေးဟူ ရေဆွန်းဟာ သူရဲ့ နှလောင်းထဲဟုနေ စီးထွပ် ဘာသာပွန်ဟားဟယ်။

40 လူအောက်ထဲမှာ တချို့ဟာ ကိုယ်တော်ရဲ့ စကားလေ
ဟို့ ကြားရဘီးန “အယ်လူဟာ ပရောဖက်‡ စစ်မှန် ဖြစ်ဟု
ယ်!” ဆိုဘီး ပြောဂေဟယ်။

41 တချို့ဟုလည်း “အယ်လူဟာ မေရှိယ ဖြစ်ဟယ်!”
ဆိုဘီး ပြောဂေဟယ်။

အယ်ဘေမဲ့ တချို့ဟု “မေရှိယဟာ ဂါလိလဲနယ်ဟုနေ
ပေါ်ထွပ်လာဟို့ မှဟု!

42 မေရှိယဟာ ဒါဝိဒ်မန်းဂီးရဲ့ မှလေးမှလစ်ဖြစ်ဘီး ဒါ
ဝိဒ်နေဖူးဟူ ဗက်လင်မြို့မှာ မွီးမယ် ဆိုဘီး ကျမ်းစာဟု
ပြောဟူးဟယ်” ဆိုဘီး ပြောဂေဟယ်။

43 အယ်ကြောန်၊ ယေရှုကြောန် လူအောက်ထဲမှာ စိဝန်း
ကွဲဟူးဂေဟယ်။

44 တချို့ဟု ကိုယ်တော့်ဟို့ ဖမ်းရှင်ဘေမဲ့ ဖယ်လူလည်း
ကိုယ်တော့်ဟို့ ဖမ်းဆီးဂေဟု။

ယောင်ကြည်ဘဲဟူ ယုဒအာဏာပိုင်လေကြောန်း

45 စောန်လေ ပုလန်ရော-က်လာဟူ ခီမာ ယဇ်ပုရောဟိ
တ်ဂီးလေန ဖာရိရှဲလေဟု “ဖြားဖြစ်ကြောန် သူဟို့ ခေါ်လာ
ဟုနူး” ဆိုဘီး သူးနို့ဟို့ မေးဂေဟယ်။

46 စောန်လေဟု “အယ်လူမျိုး ဖယ်လူလည်းပြောဖူး
ဟု!” ဆိုဘီး ပုလန်ဖြေဂေဟယ်။

47 ဖာရိရှဲလေဟု “နန်းနို့လည်း လှည့်ဇားခံရဂေ ဟူးဘီ
လော” ဆိုဘီး သူးနို့ဟို့ မေးဂေဟယ်။

‡ 7:40 ၇.၄၀ ပရောဖက်၊ ရှု ၁.၂၁။

48 “အာဏာပိုင်လေန ဖာရိရှဲလေထဲမလည်း သူ့တို့
ယောင်ကြည်ဟူလူ ယော့-က်ယော့-က်ရှိနေဘိလော။

49 အယ်လူအော့-က်ဟာ မောရှေရဲ့ ပညတ်တရားတို့ သိ
ဘဲကြောန့် သူးနို့ဟာ ကီဇာမိနေဟူ လူလေ ဖြစ်ဟယ်!”

50 ဖာရိရှဲလေထဲဟု တယော့-က်ဖြစ်ဘီး ရင်းရင်ဒူးဟု
ယေရှုနားတို့ လာဖူးဟူ နိကောဒင်ဟု

51 “နို့လေရဲ့ ပညတ်တရားဟာ လူလေနားဟု ကြားနာရ
သေးဘဲန လူလေ လောက်ဟားဇာလေတို့လည်း သိရသေး
ဘဲန စီရင်မယ်ဘဲလော” ဆိုဘီး တခြားလူလေတို့ မေးဟ
ယ်။

52 သူးနို့ဟု “အယ်မျိုးဆိုဟာ နန်ဟာလည်း ဂါလိလဲနယ်
သားဘဲလော။ ကျမ်းစာတို့ လေ့လာဂေ။ အယ်ဆိုဟာ ဂါ
လိလဲနယ်ဟုနေ ဖယ်ပရောဖက်လည်း ပေါ်ထွပ်ဂေဟုန ဆို
ဇာတို့ နန်းနို့သိလာဂေမယ်” ဆိုဘီး ဖြေဂေဟယ်။

အီထောန်ရေးဖော့-က်ပုလန်နေဟူ မီးမဟို့ ဖမ်းမိကြာ
နိုး

[
53 အယ်ဘီးန သူးနို့လေဟာ ကိုယ့်အီတို့ကိုယ် ပုလန်
ဟားဂေဘီး၊

8

1 ယေရှုဟာ သံလွင်တောန်တို့ ကြွတော်မူဟားဟယ်။

7:50 ၇.၅၀ ယော ၃.၁၂ § 7:52 ၇.၅၂ ဖယ်ပရောဖက်လည်း
ပေါ်ထွပ်ဂေဟု၊ မူရင်းလတ်ရေးမူ တခုမာ ပရောဖက်ဟာ ပေါ်ထွပ်လာတို့
မူဟု၊ ဆိုဘီး ရှိဟယ်။

² မိုးလန်းစောစောဂီးမာ ဗိမာန်တော်ဟို့ ပုလန်ကြွဟွားဟယ်။ လူလေ ဂူလောင်းဟာ ကိုယ်တော်နားမာ စုနေဂေဟယ်။ ကိုယ်တော်ဟာ ထိုင်ဘီး သူးနို့ဟို့ သွန်သန်တော်မူလေဟယ်။

³ ဖာရိရှဲလေန ကျမ်းတတ်ဆရာလေဟာ အီထောန်ရေးဖော့-က်ပုလန်နေဟူ ခီမာ ဖမ်းဟွားဟူ မီးမဟို့ ခေါ်လာဘီး သူးနို့လေ ဂူလောင်းရှေ့မာ အယ်မီးမဟို့ မတ်တတ်ရပ်ခိုင်းဟွားဟယ်။

⁴ သူးနို့လေဟု ယေရှုဟို့ “ဆရာ၊ အယ်မီးမဟို့ အီထောန်ရေးဖော့-က်ပုလန်နေဒူးမာ ဖမ်းမိဟယ်။

⁵ ကျွန်တော့်ဟွားလေရဲ့ ပညတ်တရားမာ မောရှေဟု အယ်မျိုးမီးမဟို့ ကုလော့-က်ခဲန သေအောန်ပစ်ရမယ်ဆိုဘီး ပညတ်ဟွားဟယ်။ အယ်ဆိုဟာ ဆရာဟု ဖယ်မျိုးပြောမယ်နူး” ဆိုဘီး မေးဂေဟယ်။

⁶ သူးနို့ဟာ ယေရှုဟို့ စွပ်စွဲရှင်ဟူကြောန့် ထောန်ချော့-က်ဆင်ဟို့ အယ်မျိုးပြောဂေဟယ်။

အယ်ဘေမဲ့ ကိုယ်တော်ဟာ ခေါန်းငေါက်ဘီး မုလေဂီးထတ်မာ လတ်ညိုန ရေးနေတော်မူလေဟယ်။

⁷ သူးနို့ဟာ အယ်နေရာ မာဘွဲ့ မတ်တတ်ရပ်နေဘီး မေးခွန်းလေ မေးနေဟူကြောန့် ကိုယ်တော်ဟာ မော့ကေ့ဘီး “နန်းနို့ထဲဟု ပြစ်မွေ့ဘဲလူဟာ ဦးဆောင်း အယ်မီးမဟို့ ကုလော့-က်ခဲနပစ်ဂေပါ” ဆိုဘီး မိန့်တော်မူလေဟယ်။

8 အယ်ဘီးန ကိုယ်တော်ဟာ ခေါင်းငေါက်ဘီး မှလေဂီး ထတ်မာ ပုလန်ဘီးရေးတော်မူလေဟယ်။

9 သူးနို့ဟာ အယ်မူစကားကြားရဟူ ခီမာ သတ်ကီးဟူ လူလေဟုစဘီး ယော့-က်ဘီးယော့-က် ထွပ်ဟားဂေလေ ဟယ်။ ယေရှုတပါးဒဲဘဲ အယ်နေရာမာ ရပ်နေဟူမီးမနတူး ဒူ ကျန်ရစ်ဟယ်။

10 ယေရှုဟာ မော့ကေဘီး အယ်မီးမဟို့ “သူးနို့ ဖယ် ရော့-က်ဟားဂေနူး။ နန့်ဟို့ ပြစ်စီရင်ဟို့ ယော့-က်လည်း မှော့ဟမ်းလော။” ဆိုဘီး မေးတော်မူလေဟယ်။

11 “ယော့-က်လည်းမှော့ဟမ်း။ ဆရာ” ဆိုဘီး အယ်မီးမ ဟု ပုလန်ဖြေလေဟယ်။

ယေရှုဟု “ငါလည်း နန့်ဟို့ ပြစ်စီရင်ဟု။ သွားလိုက်။ အယ်ဘေမဲ့ ပုလန်ဘီးပြစ်လောက်န” ဆိုဘီး မိန့်တော်မူဟယ်။*

ယေရှုဟာ အယ်လောကရဲ့ လန်းရောန်

12 ယေရှုဟု ဖာရိရှဲလေဟို့ “ငါဟာ လောကရဲ့ လန်း ရောန် ဖြစ်ဟယ်။ ငါ့ရဲ့ နှော့-က်လိုက်လေဟာ မှောန်ထဲမာ လောင်းဝရှော့-က်ရဘဲ သတ်ရဲ့ လန်းရောန်ဟို့ ရရှိမယ်” ဆိုဘီး ပုလန်မိန့်တော်မူဟယ်။

* 8:11 ၈.၁၁ မူရင်းလတ်ရေးမူလေ ဘောင်ဂီးန ရှေးဘာသာပွန်လေမာ အယ်စပိုဒ် (၇.၅၃-၈.၁-၁၁) ဟာ မှော့ဟု၊ တချို့ မူရင်းလတ်ရေးမူမာ အယ်စပိုဒ်ဟို့ ယော ၂၁.၂၄ နှော့-က်မာရှိဘီး၊ တချို့ မူရင်းလတ်ရေးမူမာ အယ်စပိုဒ်ဟို့ လု ၂၁.၃၈ နှော့-က်မာရှိဘီး မူရင်းလတ်ရေးမူ တခုမာဆို အယ်စပိုဒ်ဟာ ယော ၇.၃၆ နှော့-က်မာရှိဟယ်။ 8:12 ၈.၁၂ မ ၅.၁၄; ယော ၉.၅

13 ဖာရိရှဲလေဟု “ခု နန်ဟာ နန်ရဲ့ ကြောင်းဟို့ဘဲ သတ်သေခံနေဟယ်။ နန်ရဲ့ သတ်သေခံချစ်ဟာ မှန်ဟု” ဆိုဘီး ပြောဂေဟယ်။

14 ယေရှုဟု “ငါ့ကြောင်းဟို့ ငါ သတ်သေခံနေဘေမဲ့လည်း ငါပြောနေဇာလေဟာ တကယ်ဘဲဖြစ်ဟယ်။ ဖြားဖြစ်ကြောန့်နူးဆိုဟာ ငါဟာ ဖယ်နေရာဟုနေလာဘီး ဖယ်နေရာဟို့ သွားမယ် ဆိုဇာဟို့ ငါသိဟယ်။ နန်းနို့ဟု ငါဟာ ဖယ်နေရာဟုနေလာဘီး ဖယ်နေရာဟို့ သွားမယ် ဆိုဇာဟို့ သိဂေဟယ်။

15 နန်းနို့ဟာ လူရဲ့ စံနှုန်းတိုင်း စီရင်ဂေဟယ်။ ငါဟာ ဖယ်လူဟို့လည်း စီရင်ဟု။

16 အယ်ဘေမဲ့ ငါစီရင်မယ် ဆိုဟာလည်း ငါ့စီရင်ချစ်ဟာ မှန်ဟယ်။ ဖြားဖြစ်ကြောန့်နူးဆိုဟာ ငါ့ယော့-က်ဒဲ စီရင်ဇာ မှုဟု။ ငါ့ဟို့ စေလွတ်ဟူ ဖဟာ ငါနတူးဒူရိုနေဟယ်။

17 နန်းနို့ပညတ်တရားထဲမာ သတ်သေနေ့ ယော့-က်ဘောတူဟူ ခီမာ သူးနို့ဖြားဇာဘဲပြောပြော မှန်ဟယ်။

18 ငါဟာ ငါ့ကြောန့်ဟို့ သတ်သေခံဟယ်။ ငါ့ဟို့ စေလွတ်ဟူ ဖဟာလည်း ငါ့ကိုယ်စား သတ်သေခံဟယ်” ဆိုဘီး ပုလန်ဖြေတော်မူလေဟယ်။

19 သူးနို့ဟု “နန်ဖဟု ဖယ်မာနူး” ဆိုဘီး ကိုယ်တော့်ဟို့ မေးဂေဟယ်။

ယေရှုဟု “နန်းနို့ဟာ ငါ့ကို သိဂေဟမျိုးဘဲ ငါ့ဖဟိုလည်း သိဂေဟ။ နန်းနို့ဟာ ငါ့ကို သိမယ် ဆိုဟာ ငါ့ဖဟိုလည်း သိဂေမယ်” ဆိုဘီး ပုလန်ဖြေဟယ်။

20 ယေရှုဟာ ဗိမာန်တော်ထဲမှာ သွန်သန်တော်မူဒူးဟု အယ်စကားလေ ဂူလောင်းကို လှူခံသစ်တာနီးမှာ မိန့်တော်မူဟယ်။ ကိုယ်တော်ရဲ့ ခီရော့-က်သေးဘဲဟူကြောန့် ကိုယ်တော်ဟို ဖယ်လူလည်း ဖမ်းဂေဟ။

ငါသွားမယ့် နေရာဟို နန်းနို့လာနိုင်ဂေဟ

21 ယေရှုဟာ “ငါဝီးဟို သွားရလေ့မယ်။ နန်းနို့ဟာ ငါ့ဟို လိုက်ရှာဂေဘေမဲ့ နန်းနို့ရဲ့ ပြစ်ထဲမှာ သေလေ့မယ်။ ငါသွားဟိုနေရာဟို နန်းနို့လာနိုင်ဂေဟ” ဆိုဘီး မိန့်တော်မူလေဟယ်။

22 အယ်ကြောန့် ယုဒအာဏာပိုင်လေဟု “သူလာမယ့် နေရာဟို နန်းနို့လာနိုင်ဂေဟ ဆိုဘီး သူဟု ပြောဟယ်။ အယ်ဓိပါယ်ဟု သူ့ကိုယ်သူ သတ်သေဟို့လော” ဆိုဘီး ပြောဂေဟယ်။

23 ယေရှုဟု “နန်းနို့ဟာ အော့-က်ဘောင်သားလေ ဖြစ်ဂေဟယ်။ ငါဟု ထတ်ဘောင်ဟုနေ လာဟယ်။ နန်းနို့ဟာ အယ်လောကသားလေ ဖြစ်ဂေဟယ်။ ငါဟာ အယ်လောကသား မူဟယ်။

24 အယ်ကြောန့် နန်းနို့ဟာ နန်းနို့ရဲ့ ပြစ်ထဲမှာ သေရလေ့မယ် ဆိုဘီး ငါပြောဟားဟယ်။ ‘ငါဖြစ်ဟူတိုင်း ငါဖြစ်ဟု

ယ်’ ဆိုဇာဟို နန်းနို့ ယောင်ကြည်ဟု ဆိုဟာ နန်းနို့ဟာ နန်း
နို့ရဲ့ ပြစ်ထဲမာ သေရလေ့မယ်” ဆိုဘီး ဖြေတော်မူဟယ်။

²⁵ သူးနို့ဟု “နန်ဟု ဖယ်သူနူး” ဆိုဘီး ကိုယ်တော့်ဟို
မေးဂေဟယ်။

ယေရှုဟု “ငါဖယ်သူဖြစ်ဟယ် ဆိုဇာ နန်းနို့ဟို စစဒူးဟု
ငါပြောပီးဘိ။†

²⁶ ငါ့မာ နန်းနို့န ပတ်သတ်ဘီး ပြောဟို့ရော၊ စီရင်ဟို့
ရော ဘောင်ဂီးရှိဟယ်။ အယ်ဘေမဲ့ ငါ့ဟို့ စေလွှတ်ဟူသူ
ဟာ သစ်စာန ပုလဲဇောင်ဘီး ငါဟာ သူနားဟုနေ ကြား
ရဇာလေဟို့ဘဲ အယ်လောကဟို့ ပြောဟယ်” ဆိုဘီး ဖြေ
တော်မူလေဟယ်။

²⁷ ယေရှုဟု ဖဟို့ ရည်ညွှန်းဘီး ပြောနေဇာဟို့ သူးနို့ဟု
နားလည်ဂေဟယ်။

²⁸ အယ်ကြောန် ယေရှုဟု သူးနို့ဟို့ “နန်းနို့ဟု လူရဲ့သား
ဟို့ မှလော့-က်ဟားဟူ ခီမာ ‘ငါဖြစ်ဒဲတိုင်း ငါဖြစ်ဟယ်’
ဆိုဇာဟို့ရော၊ ငါဟာ ငါ့ကိုယ်ပိုင် ခွမ်အာဏာန ဖြားလည်း
လောက်ဟု ဆိုဇာဟို့ရော၊ ငါ့ဟို့ ဖဟု ညွှန်ကြားဟားဇာ
လေဟို့ဘဲ ငါပြောဟယ် ဆိုဇာဟို့ရော နန်းနို့လေ သိလေ
မယ်။

²⁹ ငါ့ဟို့ စေလွှတ်သူဟာ ငါ့နတူးဒူ ရှိဘီး ငါဟာ သူကြို
က်ဟူ ဇာလေဟို့ မြဲဒမ်း လောက်နေကြောန် သူဟာ ငါ့ဟို့

† 8:25 ၈.၂၅ ငါဖယ်သူဖြစ်ဟယ် ဆိုဇာ နန်းနို့ဟို့ စစဒူးဟု ငါပြောပီးဘိ၊
အယ်မျိုးမှဘဲနေဟာ ဖြားဖြစ်ကြောန် ငါဟု နန်းနို့ဟို့ အားလောင်း
ပြောပြရဟို့နူး။

တယော့-က်ဒဲ ပစ်ထားတော်မူဟဲ့” ဆိုဘီး မိန့်တော်မူလေဟယ်။

³⁰ အယ်မူဇာလေဟို့ ကြားရဟူ လူလေဟာ ယေရုဟို့ ယောင်ကြည်ဂေဟယ်။

သမ္မာတရားဟဲ့ နန်းနို့ဟို့ လွတ်မြော့-က်စေဟယ်

³¹ အယ်ကြောန် ယေရုဟဲ့ သူဟို့ ယောင်ကြည်ဟူ ယုဒလူလေဟို့ “နန်းနို့ဟဲ့ ငါ့ရဲ့ တရားစကားဟို့ နားထောန်မယ် ဆိုဟာ နန်းနို့ဟဲ့ ငါ့ရဲ့ တမဲ့တော်လေ မှန်ဘဲဖြစ်ဘီး

³² နန်းနို့ဟဲ့ သမ္မာတရားဟို့ သိရဘီးဟာ အယ်သမ္မာတရားဟဲ့ နန်းနို့ဟို့ လွတ်မြော့-က်စေလေမယ်” ဆိုဘီး မိန့်တော်မူလေဟယ်။

³³ သူးနို့ဟဲ့ “နို့လေဟာ အာဗြဟံရဲ့ မှလေးမှလစ်လေဖြစ်ဘီး နို့လေဟာ ဖယ်လူနားမာလည်း ကျွန်ခံဖူးဟဲ့။ အယ်ဆိုဟာ ‘နန်းနို့လေ လွတ်မြော့-က်လေမယ်’ ဆိုဘီး နန်ပြောနေဇာဟဲ့ ဖြားခိပါယ်နူး” ဆိုဘီး မေးဂေဟယ်။

³⁴ ယေရုဟဲ့ “နန်းနို့ဟို့ ငါ မှန်တိုင်းပြောမယ်၊ ပြစ်လောက်ဟဲ့ လူတိုင်းဟာ ပြစ်ရဲ့ကျွန် ဖြစ်ဟယ်။

³⁵ ကျွန်ဟာ အီမာ မြဲဒမ်းနေဇာ မူဟဲ့။ အယ်ဘေမဲ့ သားဟာ မြဲဒမ်း နေဟယ်။

³⁶ သားတော်ဟဲ့ နန်းနို့ဟို့ လွတ်ပေးမယ် ဆိုဟာ နန်းနို့ဟဲ့ မှန်ဘဲလွတ်ဂေလေမယ်။

37 နန်းနို့ဟာ အာဗြဟံရဲ့ မလေးမလစ်ဖြစ်ဟယ် ဆိုဇာ
ဟို့ ငါသိဟယ်။ နန်းနို့ဟာ ငါ့ရဲ့ သွန်သန်ချစ်ဟို့ လတ်ခံရှင်
ဘဲဟူကြောန့် ငါ့ဟို့ သတ်ဟို့ ကြိုးစားနေဂေဟယ်။

38 ငါဟာ ဖနားဟု မြင်ဟားဇာလေဟို့ဘဲ ပြောဟယ်။
နန်းနို့ဟာ နန်းနို့ဖ ပြောဟားဇာလေဟို့ လောက်ဂေဟယ်”
ဆိုဘီး သူးနို့ဟို့ မိန့်တော်မူလေဟယ်။

39 သူးနို့ဟာ “နို့လေရဲ့ ဖဟာ အာဗြဟံဖြစ်ဟယ်” ဆို
ဘီး ပုလန်ဖြေဂေဟယ်။

ယေရှုဟု “နန်းနို့ဟာ အာဗြဟံရဲ့ သားမီးလေ မှန်ဘဲ
ဖြစ်မယ် ဆိုဟာ အာဗြဟံလောက်မျိုးဘဲ လောက်ဂေလေ
မယ်။[‡]

40 ဘုရားသခင်နားဟုနေ ငါကြားဟားဟူ သမ္မာတရား
ဟို့ နန်းနို့ဟို့ ပြောဘေမဲ့လည်း နန်းနို့ဟု ငါ့ဟို့ သတ်ဟို့
ကြိုးစားဂေဟယ်။ အာဗြဟံဟာ အယ်မျိုးလောက်ဟု!

41 နန်းနို့ဟာ နန်းနို့ဖ လောက်ဟားမျိုး လောက်နေဂေဟ
ယ်” ဆိုဘီး ပုလန်မိန့်တော်မူလေဟယ်။

သူးနို့ဟု “ဘုရားသခင် ကိုယ်တိုင်ဟာ နို့လေရဲ့ တပါးဒဲ
ဟူ ဖဖြစ်ဘီး နို့လေဟာ မှားယွင်းမှုမဲ့ဘဲဟူ သားမီးလေ
ဖြစ်ဟယ်” ဆိုဘီး ဖြေဂေဟယ်။

42 ယေရှုဟာ သူးနို့ဟို့ “ဘုရားသခင်ဟု နန်းနို့ဖ မှန်ဘဲဖြ
စ်ဟယ် ဆိုဟာ နန်းနို့ဟာ ငါ့ဟို့ ရှစ်ဂေလေမယ်။ ဖြားဖြစ်

[‡] 8:39 **ဂ.၃၉** နန်းနို့ဟာ အာဗြဟံရဲ့ သားမီးလေ မှန်ဘဲဖြစ်မယ်
ဆိုဟာ အာဗြဟံလောက်မျိုးဘဲ လောက်ဂေလေမယ်၊ တချို့
မူရင်းလတ်ရေးမူလေမာ နန်းနို့ဟာ အာဗြဟံရဲ့ သားမီးလေဖြစ်မယ်
ဆိုဟာ အာဗြဟံလောက်မျိုးဘဲ လောက်ဂေလေမယ်၊ ဆိုဘီး ပါရှိဟယ်။

ကြောန့်နူးဆိုဟာ ငါဟာ ဘုရားသခင်နားဟု လာဘီး ခု ငါ အယ်မာရှိဟယ်။ ငါ့ကိုယ်ပိုင် ခွဲမဲ့အာဏာနု လာဇာ မှုဟု။ ကိုယ်တော်ဟု ငါ့ဟို့ စေလွှတ်တော်မူဟယ်။

⁴³ နန်းနို့ဟာ ငါပြောဇာဟို့ ဖြားဖြစ်ကြောန့် နားလည်ဂေဟုနူး။ နန်းနို့ဟာ ငါ့ရဲ့ တရားဟို့ နားထောန်နိုင်ဘဲကြောန့် ဖြစ်ဟယ်။

⁴⁴ နန်းနို့ဟာ နန်းနို့ဖ မာရ်နတ်ရဲ့ သားလေဖြစ်ဘီး နန်းနို့ဖရဲ့ လိုနော့-က်ဟို့ လိုက်ရှင်ဂေဟယ်။ စစဒူးဟု သူဟာ လူသတ်မားဖြစ်ဘီး သမ္မာတရား ဖတ်မာ မေ့ဟု။ ဖြားဖြစ် ကြောန့်နူးဆိုဟာ သူထဲမာ သမ္မာတရားလည်း မေ့ဟု။ သူဟာ လီညာသူဖြစ်ဘီး လီညာဇာ ဂူလောင်းရဲ့ ဖလည်းဖြစ် ဟူကြောန့် သူပင်ကိုစရိုက်တိုင်းဘဲ ပြောဆိုဟယ်။

⁴⁵ အယ်ဘေမဲ့ ငါဟာ သမ္မာတရားဟို့ ပြောဟူကြောန့် နန်းနို့ဟာ ငါ့ဟို့ ယောင်ကြည်ဂေဟု။

⁴⁶ ငါ့မာ ပြစ်ရှိဟယ် ဆိုဇာဟို့ နန်းနို့ထဲဟု ဖယ်လူတယော့-က် သတ်သေပြနိုင်မယ်နူး။ ငါဟာ သမ္မာတရားဟို့ ပြောဟယ် ဆိုဟာ ဖြားဖြစ်ကြောန့် နန်းနို့ဟာ ငါ့ဟို့ ယောင်ကြည်ဂေဟုနူး။

⁴⁷ ဘုရားသခင်နားဟု လာဟူလူဟာ ဘုရားသခင်ရဲ့ စကားလေဟို့ နားထောန်ဟယ်။ အယ်ဘေမဲ့လည်း နန်းနို့ဟု ဘုရားသခင်နားဟု လာဇာမူဘဲဟူကြောန့် နန်းနို့ဟာ နားထောန်ဂေဟု” ဆိုဘီး မိန့်တော်မူလေဟယ်။

ယေရှုနု အာဗြဟံ

48 ယုဒလူလေဟာ ယေရှုဟို “နန်ဟာ ရှမာရိလူ ဖြစ်ဘီးဟာ နန့်ထဲမာ နတ်ဆိုးရှိဟယ် ဆိုဘီး နို့လေပြောဇဟာ မှန်ဘဲကြောန့်လော” ဆိုဘီး မေးဂေဟယ်။

49 ယေရှုဟ “ငါမာ နတ်ဆိုး မေ့ဟု။ ငါဟာ ငါ့ဖဟို ချီးမြှော့-က်ဘေမဲ့ နန်းနို့ဟာ ငါဟို ချီးမြှော့-က်ဂေဟု။

50 ငါဟာ ငါ့တွပ် ဖောင်းသရေတော်ဟို ရှာဇာ မူဟု။ အယ်ဘေမဲ့ ငါ့ရဲ့ ဖောင်းသရေတော်ဟို ရှာဘီး ငါ့ဖတ်မာ စီရင်တော်မူဟူသူ ရှိဟယ်။

51 နန်းနို့ဟို ငါ မှန်တိုင်းပြောမယ်၊ ငါ့စကားဟို နာခံဟူ ဖယ်သူဘဲဖြစ်ဖြစ် ကာလစဉ်ဆစ် သေဘေးန ကြောင်ရဟို မူဟု” ဆိုဘီး မိန့်တော်မူလေဟယ်။

52 ယုဒလူလေဟာ ကိုယ်တော့်ဟို “နန့်မာ နတ်ဆိုးရှိဟယ် ဆိုဇဟို ခု နို့လေ တံကုလသံဟားဘီ! အာဗြဟံလည်း သေဟားဘီ။ ပရောဖက်လေလည်း သေဟားဘီ။ ခုထိ နန်ဟာ နန့်ရဲ့ စကားဟို နာခံဟူ ဖယ်လူဘဲဖြစ်ဖြစ် ကာလစဉ်ဆစ် သေရလေ့မယ် မူဟု ဆိုဘီး ပြောဟယ်။

53 နန်ဟာ သေဟားဟူ နို့လေရဲ့ဖ အာဗြဟံထတ် ကီး မြတ်လော။ သူဟာ သေဟားဘီ။ ပရောဖက်လေလည်း သေဟားဂေဘီ။ နန့်ကောန်နန် ဖယ်လူဖြစ်ဟယ် ဆိုဘီး ထန်နေနူး” ဆိုဘီး ပြောဂေဟယ်။

54 ယေရှုဟ “ငါဟာ ငါ့ကိုယ်ငါ ချီးမြှော့-က်မယ် ဆိုဟာ အယ်မျိုး ချီးမြှော့-က်ဇဟာ သောင်းဇာရဟို မူဟု။ ငါဟို ချီးမြှော့-က်ဟူ သူဟာ ငါ့ဖ ဖြစ်ဘီး နန်းနို့ပြောနေဟူ

နန်းနို့ရဲ့ ဘုရားသခင် ဖြစ်ဟယ်။

55 နန်းနို့ဟာ သူ့တို့ လောင်းဝ သိဂေ့ဘေမဲ့ ငါဟာ သူ့တို့ သိဟယ်။ သူ့တို့ ငါသိဟု ဆိုဘီး ပြောမယ် ဆိုဟာ ငါဟာ လည်း နန်းနို့မျိုးဘွဲ့ လီညာသူ ဖြစ်ဟူးလေ့မယ်။ အယ် ဘေမဲ့ ငါဟာ သူ့တို့ သိဘီး သူ့စကားတို့ နာခံဟယ်။

56 နန်းနို့ဖ အာဗြဟံဟာ ငါလာမယ့် ခိကာလတို့ မြင်ရ မယ် ဖြစ်ဟူကြောန့် ပျော်ရွှင်နေဘီး အယ်နေရစ်တို့ မြင် ဟူးဟူ ခီမာ ဝန်းသာလေဟယ်” ဆိုဘီး ပုလန်ဖြေတော်မူ လေဟယ်။

57 ယုဒလူလေဟာ ကိုယ်တော့်တို့ “နန်ဟာ သတ်ငါး ဆယ်မျှ ပုလဲသေးဘွဲ့န ဖယ်မျိုးလောက်ဘီး အာဗြဟံတို့ မြင်ဖူးဟူးဟယ်နူး” ဟု ဆိုဘီး မေးဂေ့ဟယ်။

58 ယေရှုဟာ “နန်းနို့တို့ ငါ မှန်တိုင်းပြောမယ်၊ အာဗြဟံ မွီးခန်ဂဒဲဟု ငါရှိဟယ်!” ဆိုဘီး ပုလန်ဖြေဟယ်။

59 အယ်န သူးနို့ဟာ ကိုယ်တော့်တို့ ပစ်တို့ ကုလော့-က်ခဲ လေတို့ ကော့-က်ဂေ့ဟယ်။ အယ်ဘေမဲ့ ယေရှုဟာ ဗိမာန် တော်ဟုနေ ရှောန်ထွပ်ဟူးတော်မူလေဟယ်။

9

ယေရှုဟာ မွီးဂဒဲဟု မျစ်စိကန်းနေဟူ လူတယော့-က် တို့ မြင်စေဟူကြောန်း

§ 8:57 **၈.၅၇** အာဗြဟံတို့ မြင်ဖူးဟူးဟယ်နူး၊ တချို့ မူရင်းလတ်ရေးမူလေမာ အာဗြဟံဟု နန်းတို့ မြင်ဖူးဘီးဘွဲ့လော၊ ဆိုဘီး ပါရှိဟယ်။

၁ ယေရှုဟာ လမ်းရှော-က်သွားနေဒူးမာ မွီးဂဒဲဟု မျစ်စိကန်းနေဟူ လူတယော့-က်ဟို့ တို့တော်မူဟယ်။

၂ ကိုယ်တော်ရဲ့ တမဲ့တော်လေဟု ကိုယ်တော့်ဟို့ “ဆရာ၊ အယ်လူဟာ မွီးဂဒဲဟု မျစ်စိကန်းနေဇာဟု ဖယ်လူရဲ့ ပြစ်ကြောန်နူး။ သူရဲ့ ပြစ်ကြောန်နဲ့လော။ သူမိဖရဲ့ ပြစ်ကြောန်နဲ့လော” ဆိုဘီး မေးဂေဟယ်။

၃ ယေရှုဟု “သူရဲ့ ပြစ်ကြောန်လည်း မူဟု။ သူမိဖရဲ့ ပြစ်ကြောန်လည်း မူဟု။ သူမာ ဘုရားသခင်ရဲ့ တဂိုးတော်ဟု ထန်ရှားစေဟို့တွပ်ဖြစ်ဟယ်။

၄ နို့လေဟာ ငါ့ဟို့ စေလွှတ်ဟူသူရဲ့ မူတော်ဟို့ နေခီမာ လောက်ဆောန်ရမယ်။ ဖယ်လူလည်း လောက်နိုင်ဘဲဟူ ညဉ့်ခီ ရော-က်လာလေမယ်။

၅ ငါဟာ လောကမာ ရှိနေဟူ ခီမာ ငါဟာ လောကတွပ်လန်းရောန်ဖြစ်ဟယ်” ဆိုဘီး ပြေတော်မူလေဟယ်။

၆ ယေရှုဟာ အယ်မျိုး မိန့်တော်မူဘီးန မုလေဂီးထတ်ဟို့ ထိုးရယ်န ထိုးဘီးဟာ အယ်ထိုးရယ်န ဗယ်ဟို့ နယ်လိုက်ဟယ်။ ကိုယ်တော်ဟာ အယ်လူရဲ့ မျစ်စိလေဟို့ ဗယ်နလူးပေးလိုက်ဘီး

၇ သူဟို့ “ရှိလောင်ရေကန်မာ သွားဘီးဆေးလိုက်” ဆိုဘီး မိန့်တော်မူလေဟယ်။ ရှိလောင် နာမယ်ဟာ “စေလွှတ်ဟယ်” ဆိုဘီး ဓိပါယ်ရဟယ်။ အယ်ကြောန် အယ်လူဟာ သွားဘီး သူမျစ်နှာဟို့ ဆေးလိုက်ဟူ ခီမာ မျစ်စိမြင်ဟား

ဘီး ပုလန်လာလေဟယ်။

⁸ အိဇနီးရှင်းလေန ရင်းရင်ဒူးဟု တောင်းဇေးနေဟူ သူ့
ဟို့ မြင်ဖူးဟူလူလေဟု “အယ်လူဟာ ထိုင်ဘီးတောင်းဇေး
နေဟူလူ မှဟုလော” ဆိုဘီး မေးဂေဟယ်။

⁹ တချို့ဟု “အယ်လူဘဲ ဖြစ်ဟယ်” ဆိုဘီး ပြောဂေဟ
ယ်။ အယ်ဘေမဲ့ တချို့ဟု “အယ်လူ မှဟု။ အယ်လူန တူ
ဇာဖြစ်ဟယ်” ဆိုဘီး ပြောဂေဟယ်။

အယ်ကြောန့် အယ်လူကိုယ်တိုင်ဟု “အယ်လူဟာ ငါဘဲ
ဖြစ်ဟယ်” ဆိုဘီး ပြောဟယ်။

¹⁰ သူးနို့ဟု “နန်ဟု ဖယ်မျိုးဖြစ်ကြောန့် မျစ်စိမြင်ဟူး
နူး” ဆိုဘီး မေးဂေဟယ်။

¹¹ သူဟု “ယေရှု ဆိုဘီး ခေါ်ဟူလူဟု ဗယ်ဟို့ လောက်
ဘီး ကျွန်တော်ရဲ့မျစ်စိဟို့ ဗယ်နလူးပေးဘီးဟာ ရှိလောင်
ရေကန်ဟို့ သွားဘီးဆေးဟို့ပြောဟယ်။ အယ်ကြောန့် ကျွန်
တော်ဟာ သွားဘီးငါ့မျစ်နှာဟို့ ဆေးလိုက်ဟူန မျစ်စိမြင်
ဟူးလေဟယ်” ဆိုဘီး ဖြေလေဟယ်။

¹² သူးနို့ဟု “အယ်လူဟာ ဖယ်နားမာနူး” ဆိုဘီး မေးဂေ
ဟယ်။

သူဟု “ကျွန်တော်သိဟု” ဆိုဘီး ဖြေလေဟယ်။

ဇာရိရှဲလေဟု မျစ်စိမြင်ဟူးဇာဟို့ စစ်ဆေးဟူကြော
န့်

¹³ အယ်ဘီးန သူးနို့ဟာ မျစ်စိကန်းဖြစ်ဖူးဟူလူဟို့ ဇာရိ
ရှဲလေနားဟို့ ခေါ်ဟူးဂေဟယ်။

14 ယေရှုဟာ ဗယ်ဟိုနယ်ဘီး အယ်လူရဲ့ မျစ်စိဟို မြင်စေတော်မူဟူနေဟာ ဒန်းနေဖြစ်ဟယ်။

15 အယ်ကြောန် ဖာရိရှဲလေဟာ အယ်လူဟို ဖယ်မျိုး မျစ်စိမြင်ဟားဟယ် ဆိုဘီး ပုလန်မေးဂေဟယ်။ အယ်လူဟု “သူဟာ ကျွန်တော့်မျစ်စိဟို ဗယ်နလူးပေးဟယ်။ ကျွန်တော်ဟာ မျစ်နှာဟို ဆေးလိုက်ဟူ ခီမာ မျစ်စိမြင်ဟားလေဟယ်” ဆိုဘီး သူးနို့ဟို ပြောပြဟယ်။

16 ဖာရိရှဲတချို့ဟု “အယ်လူဟာ ဒန်းနေဟို ဖော့-က်ဖျစ်ဟူကြောန် ဘုရားသခင်နားဟု လာဟူလူ မူဟု” ဆိုဘီး ပြောဂေဟယ်။

တချို့ဟု လည်း “ပြစ်သား ဖြစ်ဟူလူဟာ ဖယ်မျိုးလောက်ဘီးဟာ အယ်မျိုး နိမိတ် လတ်ခဏာလေဟို ပြနိုင်ဟို့နူး” ဆိုဘီး ပြောဂေဟယ်။ အယ်ဘီးန သူးနို့ထဲမာလည်း စိဝန်းကွဲဟားဂေဟယ်။

17 အယ်ကြောန် ဖာရိရှဲလေဟာ အယ်လူဟို “နန်ဟို မျစ်စိမြင်စေဟူ လူရဲ့ကြောန်းဟို နန်ဖယ်မျိုးပြောမယ်နူး” ဆိုဘီး နော့-က်တခါ ပုလန်မေးဂေဟယ်။

အယ်လူဟု “သူဟာ ပရောဖက်ဖြစ်ဟယ်” ဆိုဘီး ပုလန်ဖြေလေဟယ်။

18 အယ်ဘေမဲ့လည်း ယုဒအာဏာပိုင်လေဟု သူဟာ ရင်းရင်ဒူးဟု မျစ်စိကန်းဖြစ်ဘီး ခု မြင်နေဟယ် ဆိုဇာဟို ယောင်ကြည်ဘဲကြောန် သူးနို့ဟာ သူ့မိဖလေဟို ခေါ်ဘီးန၊

19 သူ့နှို့ဟို “အယ်လူဟာ နန်းနှို့ရဲ့ သားဘဲလော။ သူဟာ မွီးဂဒဲဟ ကန်းနေဟယ် ဆိုဘီး နန်းနှို့ပြောဂေဟယ်။ အယ် ဆိုဟာ ခု ဖယ်မျိုးဖြစ်ဟူကြောန့် မြင်နေရနွဲ့” ဆိုဘီး မေးဂေဟယ်။

20 သူ့မိဖလေဟ “သူဟာ နို့လေရဲ့ သားဖြစ်ဟယ် ဆိုဇာ ဟို နို့လေ သိဂေဟယ်။ သူဟာ မွီးဂဒဲဟ ကန်းနေဟယ် ဆိုဇာဟိုလည်း နို့လေသိဂေဟယ်။

21 အယ်ဘေမဲ့ ခု ဖယ်မျိုးလောက်ဘီး မြင်ဟူးဟယ် ဆိုဇာဟို နို့လေသိဂေဟ။ သူ့ဟို မြင်အောန်ကုသပေးဟူ သူဟိုလည်း နို့လေသိဂေဟ။ သူ့ဟိုဘဲ မေးကေ။ သူဟာ ရွယ်ရော-က်နော့။ သူ့ကြောန်းဟို သူကိုယ်တိုင်ဘဲ ဖြေနိုင်မယ်!” ဆိုဘီး ဖြေဂေဟယ်။

22 သူ့မိဖလေဟာ ယုဒအာဏာပိုင်လေဟို ကြော-က်ဟူ ကြောန့် အယ်မျိုး ပြောလိုက်ဂေဟယ်။ ယုဒအာဏာပိုင်လေဟာ ဖယ်လူဘဲဖြစ်ဖြစ် ယေရှုဟာ မေရှိယဖြစ်ဟယ် ဆိုဘီး ဝန်ခံမယ် ဆိုဟာ ဝါလယ်ဇရပ်ဟနေ နှန်ထုဟို့တွပ်ဘောတူဟူးဟယ်။

23 အယ်ကြောန့်ဘဲ သူ့မိဖလေဟ “သူဟာ ရွယ်ရော-က်နော့။ သူ့ဟိုဘဲ မေးကေ!” ဆိုဘီး ပြောလိုက်ဂေဟယ်။

24 သူ့နှို့ဟာ မွီးဂဒဲဟ ကန်းနေဟူလူဟို ဒုတိယခါ ပုလန်ခေါ်ဘီး “မှန်တိုင်းပြောဇာအားဖြင့် ဘုရားသခင်ဟို ချီးမွမ်းပါ! နန်းဟို ကုသပေးဟူလူဟာ ပြစ်သားတယော့-က် ဖြစ်ဟယ် ဆိုဇာဟို နို့လေသိဂေဟယ်” ဆိုဘီး သူ့ဟို ပြောဂေ

ဟုယ်။

25 အယ်လူဟု “သူဟာ ပြစ်သားဖြစ်ဟယ်၊ ဖြစ်ဟု ဆိုဇာဟို ကျွန်တော်သိဟု။ ကျွန်တော်သိဇာတခုဟု ရင်းရင်ဒူးဟု ကျွန်တော်ဟာ မျစ်ကန်းဖြစ်ဘီး ခု မြင်ဟားဘီ” ဆိုဘီး ပုလန်ဖြေလေဟယ်။

26 အယ်လူလေဟု “သူဟု နန့်ဟို ဖြားလေ လောက်ပေးဟယ်နူး။ နန့်ရဲ့ မျစ်စိဟို ဖယ်မျိုး မြင်စေဟယ်နူး” ဆိုဘီး မေးဂေဟယ်။

27 သူဟု “ခန်ဗျားလေဟို ကျွန်တော်ပြောပီးဘီ။ ခန်ဗျားလေ နားထောန်ဂေဟု။ ဖြားဖြစ်ကြောန့် ခန်ဗျားလေဟု ပုလန်ဘီးကြားရှင်နေရနူး။ ခန်ဗျားလေလည်း သူတဗွဲ ဖြစ်ရှင်ကြောန့်လော” ဆိုဘီး ပုလန်ပြောလေဟယ်။

28 သူးနို့ဟု “နန်ဘဲအယ်လူရဲ့ တဗွဲဖြစ်ဟယ်။ နို့လေဟု မောရှေရဲ့ တဗွဲလေ ဖြစ်ဟယ်။

29 ဘုရားသခင်ဟာ မောရှေဟို ပြောဟားဇာလေဟို နို့လေသိဂေဟယ်။ အယ်ဘေမဲ့ အယ်လူဟာ ဖယ်ဟုနေလာဟယ် ဆိုဇာဟို နို့လေသိဂေဟု!” ဆိုဘီး သူဟို ပြစ်တန်ဘီး ပြောဂေဟယ်။

30 အယ်လူဟု “သူဟာ ကျွန်တော့်မျစ်စိဟို မြင်စေဟယ်။ အယ်ဘေမဲ့ ခန်ဗျားလေဟု အယ်လူဖယ်ဟုနေ လာဟယ် ဆိုဇာဟို သိဂေဟု ဆိုဇာ ရရာတိုင်း အံဇာကောန်းဟယ်!

31 ဘုရားသခင်ဟာ ပြစ်သားလေရဲ့ စကားကို နားထောင်ဟန်ဟဲ့။ ဘုရားသခင်ဟို့ကြော့-က်ဘီး ကိုယ်တော် လိုရှင်ဇာဟို့ လောက်ဟူလူလေရဲ့ စကားဟို့ဘဲ နားထောင်ဟယ် ဆိုဇာဟို့ ကျွန်တော့်ဟားလေသိဟယ်။

32 မွီးဂဒဲဟဲ့ ကန်းနေဟူ လူတယော့-က်ဟာ မျစ်စိမြင်ဟားဟယ် ဆိုဇာဟို့ ရှေးခေတ်ကာလဟဲ့ ယော့-က်လည်းကြားဖူးဂေဟဲ့။

33 အယ်လူဟာ ဘုရားသခင်နားဟဲ့နေ လာဟဲ့ ဆိုဟာ ဖြားတခုလည်း လောက်နိုင်ဟို့ မူဟဲ့” ဆိုဘီး ပုလန်ဖြေလေဟယ်။

34 သူးနို့ဟဲ့ “နန်ဟာ မွီးဂဒဲဟဲ့ ပြစ်န ကီးလာဟူ လူဖြစ်ဘီးဟာ နို့လေဟို့ သွန်သန်ပေးဟို့လော” ဆိုဘီး မေးဂေဟယ်။ အယ်ဘီးန သူဟို့ ဝါလယ်ဇရပ်ဟဲ့နေ နန်ထုလိုက်ဂေဟယ်။

ဝိညာဉ်မျစ်စိကန်းနေဟူကြောန်း

35 အယ်မျိုး နန်ထုလိုက်ဟယ် ဆိုဇာဟို့ ယေရှုဟာ ကြားဟားဟူ ခီမာ အယ်လူဟို့ တို့လိုက်ဟူန “နန်ဟာ လူရဲ့သားဟို့ ယောင်ကြည်ဘဲလော” ဆိုဘီး မေးတော်မူလေဟယ်။

36 အယ်လူဟဲ့ “ဆရာ၊ လူရဲ့သားဟဲ့ ဖယ်သူနူး။ ကျွန်တော်ဟာ သူဟို့ ယောင်ကြည်နိုင်ဟို့တွပ် ပြောပြပါလား” ဆိုဘီး မေးတော်မူလေဟယ်။

37 ယေရှုဟု “နန်ဟာ သူ့တို့ မြင်ဖူးပီးဘီ။ ခု နန်န စကားပြောနေဟူ လူဘဲ ဖြစ်ဟယ်” ဆိုဘီး သူ့တို့ မိန့်တော် မူဟယ်။

38 အယ်လူဟု “သခင်၊ ကျွန်တော် ယောင်ကြည်ပါဟယ်” ဆိုဘီး လျှော့-က်လိုက်ဘီးဟာ ယေရှုတို့ ရှိခိုးလေဟယ်။

39 ယေရှုဟု “ငါဟာ ကန်းနေဟူ လူလေဟို့ မြင်စေဘီး မြင်နေဟူလူလေဟို့ ကန်းစေဟို့တွပ်န တရားစီရင်ဟို့တွပ် အယ်လောကဟို့ ကြွလာဟယ်” ဆိုဘီး မိန့်တော်မူဟယ်။

40 ကိုယ်တော်နတူးဒူ ရှိနေဟူ ဖာရိရှဲတချို့ဟာ အယ် မျိုးပြောဇာဟို့ ကြားရဟူကြောန့် ကိုယ်တော်ဟို့ “ဖြားနူး။ နို့လေလည်း မျစ်ကန်းဖြစ်ဟယ်လော။” ဆိုဘီး မေးဂေဟယ်။

41 ယေရှုဟု “နန်းနို့ဟာ မျစ်ကန်းဖြစ်မယ် ဆိုဟာ နန်းနို့မာ ပြစ် မေ့ဟု။ အယ်ဘေမဲ့ နန်းနို့ဟု မြင်ဟယ် ဆိုဘီး ပြောနေဟူကြောန့် နန်းနို့မာ ပြစ်ရှိဟယ်” ဆိုဘီး ဖြေတော်မူဟယ်။

10

သိုးထီးမားရဲ့ ပေါင်ဥပမာ

1 ယေရှုဟု “နန်းနို့ဟို့ ငါ မှန်တိုင်ပြောမယ်။ သိုးခြံထဲဟို့ ခွဗော့-က်ဟုနေ ဝမ်ဘဲန တခြားနည်းလမ်းန ကျော်ဝမ်ဟူ လူဟာ ခိုးမုလ ဖြစ်ဟယ်။

2 ခွဗော့-က်ဟုနေ ဝမ်ဟူလူဟာ သိုးထီးမားဖြစ်ဟယ်။

³ သိုးထီးမားဟို့ ခွဗော့-က်စောန်ဟာ ခွဗော့-က်ဖွမ်ပေးဟယ်။ သိုးလေဟလည်း သူရဲသံဟို့ နားထောန်ဂေဟယ်။ သူဟာ သူရဲသိုးလေဟို့ နာမယ်န ထုဆောန်တတ်ဟယ်။

⁴ သူသိုးလေဟို့ ထုဆောန်ဟားခီမာ သိုးလေရှေ့ဟုနေသွားဟယ်။ သိုးလေဟလည်း သူရဲသံဟို့ သိဟူကြောန် သူနော့-က်လိုက်ဂေဟယ်။

⁵ သိုးလေဟာ လူဇီးနော့-က်လိုက်မယံစား အယ်လူရဲသံဟို့ သိဘဲဟူကြောန် အယ်လူနားဟုနေ ထွပ်ပုလေးဂေလေ့မယ်” ဆိုဘီး မိန့်တော်မူဟယ်။

⁶ ယေရှုဟာ ဖာရိရှဲလေဟို့ အယ်ပေါင်ဥပမာဟို့ ပြောပြဘေမဲ့လည်း အယ်ပေါင်ဥပမာရဲ ဓိပါယ်ဟို့ နားလည်ဂေဟယ်။

ကောန်းမြတ်ဟူ သိုးထီးမား ယေရှု

⁷ အယ်ကြောန် ယေရှုဟာ “နန်းနို့ဟို့ ငါ မှန်တိုင်ပြောမယ်။ ငါဟာ သိုးလေဝမ်ဟူ ခွဗော့-က်ဖြစ်ဟယ်။

⁸ ငါ့ရှေ့ဟာ ရော့-က်လာဟူ လူလေ ဂူလောင်းဟာ ခိုးမဲ့လလေ ဖြစ်ဂေဟယ်။ အယ်ကြောန် သိုးလေဟာ သူးနို့ရဲသံဟို့ နားထောန်ဂေဟယ်။

⁹ ငါဟာ ခွဗော့-က်ဖြစ်ဟယ်။ ငါ့အားဖြင့်ဝမ်ဟူလူလေဟာ ကယ်တန်ခံရလေ့မယ်။ သူးနို့ဟာ ထွပ်ဝမ်ဘီး စားကျက်ဟို့ တွံလေ့မယ်။

¹⁰ ခိုးဟာ ခိုးဟို့၊ သတ်ဟို့၊ ဖျစ်ဆီးဟို့လာဟယ်။ ငါဟာ နန်းနို့ဟို့ သတ်ရရောင်မျှ မူဟာ သတ်န ပုလဲဇောင်စေဟို့

တွပ် လာဟယ်။”

11 “ငါဟာ ကောန်းဟူ သိုးထီးမား ဖြစ်ဟယ်။ ကောန်းဟူ သိုးထီးမားဟာ သိုးလေတွပ် သူသတ်ဟို့ စွန့်တတ်ဟယ်။

12 သိုးထီးမားလည်း မှုဘဲဟူ၊ သိုးလေရဲ့ ဇရင်လည်း မှုဘဲဟူ လူငှားဟာ ဝံပုလွေလာနေဇာဟို့ မြင်ဟူ ခီမာ သိုးလေဟို့ ထားရစ်ဘီး ထွပ်ပုလေးဟားတတ်ဟယ်။ အယ်ကြောန့် ဝံပုလွေဟာ သိုးလေဟို့ ကိုက်ဖမ်းဘီး ဖုလဲဖုလဲစင် ဖြစ်ဟားစေဟယ်။

13 လူငှားဟာ လူငှားဘဲ ဖြစ်ဟူကြောန့် သိုးလေဟို့ ဂရုစိုက်ဘဲန ထွပ်ပုလေးဟားလေဟယ်။

14 ငါဟာ ကောန်းမြတ်ဟူ သိုးထီးမားဖြစ်ဟယ်။ ဖဟာ ငါ့ဟို့ သိတော်မူဘီး ငါဟာလည်း ဖဟို့ သိမျိုးဘဲ ငါ့သိုးလေဟို့လည်း ငါသိဘီး ငါ့သိုးလေဟာလည်း ငါ့ဟို့သိဟယ်။

15 ငါဟာ သိုးလေတွပ် ငါသတ်ဟို့ စွန့်ဟယ်။

16 အယ်သိုးခြံထဲဟို့ ဝမ်ဘဲဟူ တခြားသိုးလေဟို့လည်း ငါပိုင်သေးဟယ်။ အယ်သိုးလေဟို့လည်း ငါခေါ်သွမ်းရအူးမယ်။ သူးနို့ဟာ ငါသံဟို့ နားထောန်ဟူကြောန့် သိုးစုတစုဒဲ၊ သိုးထီးမား တယော့-က်ဒဲ ဖြစ်လာလေ့မယ်။*

10:14 ၁၀.၁၄-၁၅ မ ၁၁.၂၇: လု ၁၀.၂၂ * 10:16 ၁၀.၁၆
သူးနို့ဟာ ငါသံဟို့ နားထောန်ဟူကြောန့် သိုးစုတစုဒဲ၊ သိုးထီးမား တယော့-က်ဒဲ ဖြစ်လာလေ့မယ်။ တချို့ မူရင်းလတ်ရေးမူလမာ သူးနို့ဟာ သိုးထီးမားတယော့-က်ဒဲ၊ သိုးစုတစုဒဲ ဖြစ်ဟားလေ့မယ်။ ဆိုဘီး ပါရှိဟယ်။

17 “ငါဟာ သတ်တို့ ပုလန်ရရှိစေတို့ ငါ့သတ်တို့ စွန့်ရှင် ဟူကြောင့် ဖဟ ငါ့တို့ ရှစ်တော်မူဟယ်။

18 ဖယ်လူလည်း ငါ့သတ်တို့ ငါ့နားဟုနေ နယူတို့ ရဂေ ဟု။ ငါ့ရဲ့ ဆန္ဒတိုင်းဘဲ ငါ့သတ်တို့ ငါ့စွန့်ဟယ်။ ငါ့မာ ငါ့ သတ်တို့ စွန့်တို့တွင် ခွဲခွဲရှိဘီး ငါ့သတ်တို့ ပုလန်ယူတို့တွင် လည်း ခွဲခွဲရှိဟယ်။ အယ်စေခိုင်းချစ်တို့ ငါ့ဟာ ငါ့ဖနားဟု ရရှိဟယ်” ဆိုဘီး ထပ်ဘီး မိန့်တော်မူလေဟယ်။

19 အယ်စကားလေကြောင့် ယုဒလူလေထဲမာ ထပ်ဘီး စိဝန်းကွဲဟားဟယ်။

20 သူးနို့လေဟု “သူးမာ နတ်ဆိုးရှိဟယ်! သူဟာ ရူးဖြစ် ဟယ်! ပြားဖြစ်ကြောင့် နန်းနို့ဟု သူစကားတို့ နားထောက် နေနှူး” ဆိုဘီး ပြောနေဂေဟယ်။

21 အယ်ဘေမဲ့ တချို့ဟု “နတ်ဆိုးရှိဟု လူဟာ အယ် မျိုးပြောနိုင် မဟု! နတ်ဆိုးဟု မျစ်စိကန်းနေဟု လူလေတို့ ဖယ်မျိုးမြင်အော်န် လောက်ပေးနိုင်မယ်နှူး” ဆိုဘီး ပြော နေဂေဟယ်။

ယေရှုတို့ ငြင်းပယ်ဟူကြောင့်

22 ယေရှုရှလင်မြို့မာ ဗိမာန်တော် ဆစ်ကပ် ပွဲတော် ကျင်းပနေဟယ်။ အယ်ခီဟု ဆောင်းကာလ ဖြစ်ဟယ်။

23 ယေရှုဟာ ဗိမာန်တော်ထဲဟု ရှောလမုန်ရဲ့ မုခ်ဦးဆော် န်ထဲမာ လမ်းရှော-က်နေဘီး၊

24 ယုဒလူလေဟာ ကိုယ်တော်နားတို့ ဝိုင်းအောင်လာဘီး န “နန်ဟာ ဖယ်ခီထိ နို့လေရဲ့ စိတို့ ဒွိဟဖြစ်စေတို့နှူး။ နို့

လေဟို့ မှန်တိုင်း ရှင်းရှင်းလန်းလန်းဟား ပြောပြပါ။ နန်ဟာ မေရှိယဘွဲ့လော” ဆိုဘီး မေးဂေဟယ်။

²⁵ ယေရှုဟာ “နန်းနို့ဟို့ ငါပြောပြဟားဘေမဲ့လည်း နန်းနို့ဟာ ယောင်ကြည်ဂေဟု။ နို့ဖရဲ့ ခွမ်န ငါလောက်ဟူ မူလေဟာ ငါ့ကြောန်းဟို့ သတ်သေခံနေဟယ်။

²⁶ အယ်ဘေမဲ့ နန်းနို့ယောင်ကြည်ဂေဟု။ နန်းနို့ဟာ ငါ့သိုးလေမှုဘဲကြောန့် ဖြစ်ဟယ်။

²⁷ ငါ့သိုးလေဟာ ငါ့သံဟို့ နားထောန်ဂေဟယ်။ ငါဟုလည်း သူးနို့ဟို့ သိဘီး သူးနို့ဟာ ငါ့နော့-က်လိုက်ဂေဟယ်။

²⁸ ထာဝရသတ်ဟို့လည်း ငါပေးဟယ်။ အယ်သိုးလေဟာ လောင်းဝ သေရလေ့ဟို့ မူဟု။ ဖယ်လူလည်း သူးနို့ဟို့ ငါ့နားဟုနေ လုယူနိုင်ဂေဟု။

²⁹ သူးနို့ဟို့ ငါ့နားမာ အပ်ပေးဟားဟူ နို့ဖဟာ ရှိမျှဂူလောင်းထတ် ကီးမြတ်တော်မူဟယ်။† ဖယ်လူလည်း သူးနို့ဟို့ ဖလတ်ဟုနေ လုယူနိုင်ဂေဟု။

³⁰ ငါ့ဖန ငါဟာ တလောင်းတဝဒဲ ဖြစ်ဟယ်” ဆိုဘီး ဖြေတော်မူလေဟယ်။

³¹ ယုဒလူလေဟာ ကိုယ်တော့်ဟို့ ပစ်ဟို့တွပ် ကုလော့-က်ခဲလေဟို့ ပုလန်ဘီး ကော့-က်ယူဂေဟယ်။

† 10:29 **၁၀.၂၉** သူးနို့ဟို့ ငါ့နားမာ အပ်ပေးဟားဟူ နို့ဖဟာ ရှိမျှဂူလောင်းထတ် ကီးမြတ်တော်မူဟယ်၊ တချို့ မူရင်းလတ်ရေးမူလေမာ ငါ့ဟို့ ပေးဟားဟူ သူးနို့လေရဲ့ ဖဟာ ရှိမျှဂူလောင်းထတ် ကီးဟယ်၊ ဆိုဘီး ရှိဟယ်။

32 ယေရှုဟာ “ငါဟာ ဖနားဟု ကောင်းမြတ်ဇာလေ
ဘောင်ဂီးဟို့ နန်းနို့ရှေ့မာ လောက်ပြပီးဘီ။ အယ်မူလေ
ထဲဟု ပြားမှုတွပ်ကြောန့် ငါ့ဟို့ ကုလော့-က်ခဲန ပစ်ရှင်ဂေ
နူး” ဆိုဘီး သူးနို့ဟို့ မိန့်တော်မူလေဟယ်။

33 ယုဒလူလေဟု “ကောင်းဟူ ကျင့်တခုခုကြောန့် နို့လေ
ဟာ နန်ဟို့ ကုလော့-က်ခဲန ပစ်ရှင်ဇာ မူဟု။ နန်ဟာ လူဖြစ်
ဘေမဲ့လည်း နန့်ကောန်နန် ဘုရားဖြစ်ဟယ် ဆိုဘီး ဘုရား
သခင်ဟို့ စော်ကားဟယ်!” ဆိုဘီး ဖြေဂေဟယ်။

34 ယေရှုဟု “နန်းနို့ရဲ့ ပညတ်တရားမာ ‘နန်းနို့ဟာ ဘုရား
လေ ဖြစ်ဟယ်’ ဆိုဘီး ရေးဟားဟယ်။

35 ကျမ်းစာမာ ဖော်ပြဟားဟူ ဇာဟာ မြဲဒမ်း မှန်ဟယ်
ဆိုဇာဟို့ နို့လေသိဂေဟယ်။ ဘုရားသခင်ဟု သူရဲ့ စကား
တော်ဟို့ ကြားရဟူလူလေဟို့ ‘ဘုရားလေ’ ဆိုဘီး ခေါ်လေ
ဟယ်။

36 ဖဟာ ငါ့ဟို့ ဝီးကော့-က်ဘီး အယ်လောကထဲဟို့
စေလွှတ်တော်မူဟယ်။ ငါဟာ ဘုရားသခင်ရဲ့ သားတော်
ဖြစ်ဟယ် ဆိုဘီး ပြောဟူကြောန့် ငါဟာ ဘုရားသခင်ဟို့
စော်ကားဟယ် ဆိုဘီး ဖယ်မျိုးကြောန့် နန်းနို့ပြောနိုင်ဂေ
ဟယ်နူး။

37 ငါဟာ ငါ့ဖရဲ့ မူတော်လေဟို့ ဆောန်ရွက်ဟု ဆိုဟာ
ငါ့ဟို့ ယောင်ကြည်ဂေန။

38 အယ်ဘေမဲ့ ငါဟာ အယ်မူလေဟို့ လောက်ဆောန်ဟု
ယ် ဆိုဟာ ငါ့ဟို့ ယောင်ကြည်ဘဲဟို့မူ ငါ့ရဲ့ လောက်ဆောန်

ချစ်လေဟို့ ယောင်ကြည်ဂေ။ အယ်မျိုးယောင်ကြည်မယ်
ဆိုဟာ ဖဟာ ငါ့ထဲမာ ရှိတော်မူဘီး ငါဟာလည်း ဖထဲမာ
ရှိတော်မူဟယ် ဆိုဇာဟို့ နန်းနို့သိဂေလေမယ်” ဆိုဘီး ဖြေ
တော်မူဟယ်။

³⁹ နှော-က်တခါ သူးနို့ဟာ ယေရှုဟို့ ဖမ်းဟို့ ကြိုးစား
ဂေဟယ်။ အယ်ဘေမဲ့ ကိုယ်တော်ဟာ သူးနို့လတ်ဟုနေ
လွတ်မြောက်ဟားလေဟယ်။

⁴⁰ အယ်ဘီးန ယေရှုဟာ ယော်ဒန်မှလစ်ဟို့ ဖြတ်ဘီး
ပထမဦးဆောင်း ယောဟန်ဗတုတိဇိပေးဟူ နေရာဟို့ တ
ခါပုလန်ကြွဟားဘီး အယ်နေရာမာ နေတော်မူလေဟယ်။

⁴¹ လူလေဘောင်ဂီးဟာ ကိုယ်တော်နားဟို့ လာဂေဟ
ယ်။ သူးနို့ဟ “ယောဟန်ဟာ ဖြားနိမိတ်လတ်ခဏာလေ
လည်း လောက်ဟု။ အယ်ဘေမဲ့လည်း အယ်လူကြောန်း
ဟို့ သူပြောဇာလေ ဂူလောင်းဟာ မှန်ဟယ်” ဆိုဘီး ပြော
ဂေဟယ်။

⁴² အယ်နေရာမာရှိဟူ လူလေဘောင်ဂီးဟာ ယေရှုဟို့
ယောင်ကြည်ဂေလေဟယ်။

11

လာဇရုသေဟူကြောန်း

¹ ဗေသနိဝါမာနေဟူ လာဇရုဟာ နေကောန်းဘဲဖြစ်နေ
ဟယ်။ ဗေသနိဝါမာ ညီအေးမလေဖြစ်ဂေဟူ မာရိန မာသ
ဟာ နေထိုင်ဂေဟယ်။

² အယ်မာရိဟာ သခင်ဘုရားရဲ့ ခေတော်ထတ်ဟို့ ဆီမီး လောင်းခဲလဘီး ခေတော်ဟို့ ဆားဗန်န သုပေးဟူသူဖြစ် ဟယ်။ နေကောန်းဘဲဖြစ်နေဟူ လာဇရုဟာ သူ့ရဲ့မောင်ဖြစ် ဟယ်။

³ ညီအေးမနေ့ ယော့-က်ဟာ ယေရှုနားဟို့ “သခင်၊ ကိုယ်တော်ရှစ်ဟူလူဟာ နေကောန်းဘဲ ဖြစ်နေဟယ်” ဆိုဘီး ဒန်းစကားပို့လိုက်ဂေဟယ်။

⁴ အယ်ဒန်းဟို့ ယေရှု ကြားလိုက်ခီမာ “အယ်နာဟာ လာဇရုဟို့ သေဟို့မုဘဲ ဘုရားသခင်ရဲ့ ဖောင်းသရေတော် ဟို့ ထန်ရှားစေဘီး ဘုရားသခင်ရဲ့ သားတော်ဟာလည်း ဖောင်းသရေတော် ထန်ရှားလေ့မယ်” ဆိုဘီး မိန့်တော်မူ လေဟယ်။

⁵ ယေရှုဟာ မာသဟို့ရော၊ သူ့မရဲ့ ညီမဟို့ရော၊ လာဇရု ဟို့ရော ရှစ်တော်မူဟယ်။

⁶ ကိုယ်တော်ဟာ လာဇရုရဲ့ဒန်းဟို့ ကြားဘေမဲ့လည်း အယ်နေရာမာ နှေ့ရစ်နေနေသေးဟယ်။

⁷ အယ်ဘီးန ကိုယ်တော်ဟာ တမဲ့တော်လေဟို့ “ယုဒနယ်ဟို့ ပုလန်ဂေဇို” ဆိုဘီး မိန့်တော်မူလေဟယ်။

⁸ တမဲ့တော်လေဟ “ဆရာ၊ ယုဒလူလေဟာ ဆရာဟို့ စ ဖူးဟဘဲသေး ကုလော့-က်ခဲနပစ်ဟို့ လောက်နေဂေဟယ်။ အယ်နေရာဟို့ဘဲ ပုလန်ဘီးကြွတော်မူအူးလော” ဆိုဘီး မေးလျှော့-က်ဂေဟယ်။

9 ယေရှုဟု “တနေ့မှာ ဆယ့်နှစ်နှာရီ ရှိဟုယ် မူဟုလော။ အယ်ကြောန့် နေ့ခီမာ သွားလာဟူ လူလေဟာ ခလောက် တိုက်မိဂေဟု။ ဖြားဖြစ်ကြောန့်နူးဆိုဟာ သူးနို့ဟု လောက ရဲ့ လန်းရောန်ဟို့ ဗြင်ရဟယ်။

10 အယ်ဘေမဲ့ ညဉ့်မိုက်ဇာမာ သွားလာဟူ လူလေဟာ ခလောက်တိုက်မိဂေဟယ်။ ဖြားဖြစ်ကြောန့်နူးဆိုဟာ သူး နို့မာ လန်းရောန်မေဟု” ဆိုဘီး ဖြေတော်မူလေဟယ်။

11 ယေရှုဟာ အယ်မျိုး မိန့်တော်မူဘီးန “နို့လေရဲ့ မိဆွေ လာဇရုဟာ အိမ့်ဟားဘီ။ သူ့ဟို့ နှိုးဟို့ ငါသွားမယ်” ဆို ဘီး မိန့်တော်မူလေဟယ်။

12 တမဲ့တော်လေဟု “သခင်၊ သူဟာ အိမ့်နေဟယ် ဆို ဟာ ကျန်းမာလာလေ့မယ်” ဆိုဘီး ဖြေဂေဟယ်။

13 ယေရှုဟာ လာဇရုသေဟားကြောန်းဟို့ မိန့်တော်မူနေ ဘေမဲ့လည်း အိမ့်နေဇာဟို့ဘဲ မိန့်တော်မူနေဟယ် ဆိုဘီး သူးနို့ထန်နေဂေဟယ်။

14 အယ်ကြောန့် ယေရှုဟာ သူးနို့ဟို့ “လာဇရု သေဟား ဘီ။

15 အယ်ဘေမဲ့ နန်းနို့လေ ယောင်ကြည်လာဟို့တွပ်ကြော န့် အယ်နေရာမာ ငါမေ့ဘဲဇာဟာ နန်းနို့တွပ် ငါဝန်းသာဟယ်။ သူနားဟို့ သွားဂေဇို့” ဆိုဘီး ပွမ်ပွမ်လန်းလန်းဟား မိန့်တော်မူလေဟယ်။

16 မြာဘုလူး ဆိုဘီး ခေါ်ဟူ သောမဟာ သူရဲ့ဖော်လေ ဟို့ “နို့လေအားလောင်း ဆရာနတူးဒု သေခံဟို့ လိုက်ဟား

ဂေဇိုဇ်” ဆိုဘီး ပြောလေဟယ်။

သတ်ရှင်ဟူန ရှင်ပုလန်ထမြော့-က်ဟူ ယေရှုကြောန်း

17 ယေရှု ရော့-က်လာတော်မူခီမာ လာဇရုဟို့ သန်းခဲ လိုင်းဂူမာ သံဂြိုဟ်ဟားဇာ လေးရစ်ရှိနေဘီ ဆိုဇာဟို့ တွဲ ဟားတော်မူဟယ်။

18 ဗေသနိဝါဟာ ယေရှုရှလင်မြို့ဟုနေ နေ့မိုင်လော့-က် ဘွဲ ဝီးဟယ်။

19 ယုဒလူဘောင်ဂီးဟာ မာသန မာရီရဲ့မောင် သေဟား ဟူကြောန်း သူးနို့ဟို့ နှစ်သိမ့်ဟို့ လာဂေဟယ်။

20 မာသဟာ ယေရှုကြွလာဟယ် ဆိုဇာဟို့ ကြားဟူ ခီမာ ကိုယ်တော်ဟို့ ကြိုဆိုဟို့ ထွပ်ဟားလေဟယ်။ မာရီဟာ အီ မာဘွဲ နေရစ်ဟယ်။

21 မာသဟာ ယေရှုဟို့ “သခင်၊ ကိုယ်တော်ဟာ အယ် နေရာမာရှိနေမယ် ဆိုဟာ ကျွန်မမောင် သေဟို့ မူဟု!

22 အယ်ဘေမဲ့ ခု ကိုယ်တော်ဟာ ဘုရားသခင်နားမာ တောင်းတော်မူသမျှဟို့ ဘုရားသခင် ပေးတော်မူမယ် ဆို ဇာဟို့ ကျွန်မသိဟယ်” ဆိုဘီး လျော့-က်လေဟယ်။

23 ယေရှုဟု “နန့်မောင်ဟာ သတ်ပုလန်ရှင်လေ့မယ်” ဆို ဘီး သူဟို့ မိန့်တော်မူလိုက်ဟယ်။

24 မာသဟု “သူဟာ နော့-က်ဆောင်းဟူ နေ့မာ ရှင်ပု လန်ထမြော့-က်လေ့မယ် ဆိုဇာဟို့ ကျွန်မသိပါဟယ်” ဆို ဘီး ပုလန်လျော့-က်ဟယ်။

25 ယေရှုဟာ သူ့တို့ “ငါဟာ ရှင်ပုလန်ထမြော့-က်ရှင်း ဖြစ်ဟယ်။ သတ်လည်း ဖြစ်ဟယ်။ ငါတို့ ယောင်ကြည်ဟူ လူလေဟာ သေဟူးဘေမဲ့လည်း ပုလန်ရှင်လေ့မယ်။

26 ငါတို့ ယောင်ကြည်ဘီး သတ်ရှင်နေဟူ လူလေဟာ ကာလစဉ်ဆစ် သေရလေ့တို့ မှဟု။ အယ်မူဇာတို့ နန် ယောင်ကြည်ဘဲလော” ဆိုဘီး မေးတော်မူလေဟယ်။

27 သူဟု “ယောင်ကြည်ပါဟယ်။ သခင်! ကိုယ်တော် ဟာ လောကတို့ ကြွလာတော်မူဟူ ဘုရားသခင်ရဲ့ သား တော်၊ မေရှိယ ဖြစ်ဟယ် ဆိုဇာတို့ ကျွန်မ ယောင်ကြည်ပါ ဟယ်” ဆိုဘီး ပုလန်လျှော့-က်လေဟယ်။

ယေရှု ငိုတော်မူကြောင်း

28 မာသဟာ အယ်မျိုး လျှော့-က်လိုက်ဘီးန အီဟို ပုလန်ဟူးဘီး ညီမမာရီတို့ တိတိဟူးခေါ်လိုက်ဟယ်။ “ဆရာ ကြွလာတော်မူဘိ နန့်တို့ မေးနေဟယ်” ဆိုဘီး ပြောလိုက် ဟယ်။

29 မာရီဟာ အယ်မျိုးကြားလိုက်ခီမာ မြန်းမြန်ဟူး ထွပ် ဟူးဘီးဟာ ကိုယ်တော်နားတို့ သွားလေဟယ်။

30 အယ်ခီမာ ယေရှုဟာ ဝါထဲတို့ ရှေး-က်သေးဘဲ မာသ လာတို့ဟူနေရာမာဘဲ ရှိနေသေးဟယ်။

31 မာရီတို့ နှစ်သိမ့်ပေးတို့ အီမာရီနေဟူ ယုဒလူလေဟာ မြန်းမြန်ဟူးထွပ်ဟူးဟူ မာရီတို့ မြင်လိုက်ဟယ်။ သူးနို့ ဟု ငိုတို့တွပ် သန်းခလိုင်ဂူတို့ ထွပ်ဟူးဟယ် ဆိုဘီး ထန် နေဂေဟယ်။

32 မာရိဟာ ယေရှုရှိနေဟူ နေရာဟို့ ရော့-က်ဟားဘီး ကိုယ်တော်ဟို့ တို့ဟူန ခေတော်ရင်းမာ ဒူးထော့-က်လေ ဟယ်။ “သခင်၊ ကိုယ်တော်ဟာ အယ်နေရာမာ ရှိနေမယ် ဆိုဟာ ကျွန်မမောင် သေဟို့ မှဟု!” ဆိုဘီး လျှော့-က်လေ ဟယ်။

33 ယေရှုဟာ မာရိသိုနေဇာဟို့ရော၊ သူနတူးဒလိုက်လာ ဟူ ယုဒလူလေ ငိုနေဇာဟို့ရော မြင်ဟူ ခီမာ ကိုယ်တော် ဟာ ရရာတိုင်း စံကောန်းဘဲ ဖြစ်ဟားဟယ်။

34 ကိုယ်တော်ဟ “သူဟို့ ဖယ်မာ သံဂြိုဟ်ဟားဂေဇူး” ဆိုဘီး သူးနို့ဟို့ မေးတော်မူလေဟယ်။

သူးနို့ဟ “သခင်၊ ကြွဘီးကေတော်မူပါ” ဆိုဘီး ပုလန် ဖြေတော်မူဂေဟယ်။

35 ယေရှုဟာ ငိုတော်မူလေဟယ်။

36 အယ်ကြောန် ယုဒလူလေဟ “ကေပါအူး၊ လာဇရုဟို့ ရရာတိုင်း ရှစ်ဇမား!” ဆိုဘီး ပြောနေဂေဟယ်။

37 အယ်ဘေမဲ့ သူးနို့ထဲဟ တချို့ဟ “မျစ်စိကန်းနေ ဟူ လူဟို့ မျစ်စိပုလန်မြင်အေန် လောက်ပေးဟယ် မှဟု လော။ လာဇရုဟို့လည်း သေဘဲအေန် လောက်ပေးနိုင်ဟု လော” ဆိုဘီး ပြောဂေဟယ်။

လာဇရုဟို့ သတ်ပုလန်ရှင် စေတော်မူကြောင်း

38 နော့-က်ထပ်တခါ ဝန်းနဲလာဘီး ယေရှုဟာ သန်းခဲ လိုင်းဂူဟို့ ကြွဟားလေဟယ်။ အယ်သန်းခဲလိုင်းဂူဟို့ ကု လော့-က်န ပိဟားဟယ်။

39 ယေရှုဟု “ကုလော့-က်ဟို ဖယ်ထုလိုက်!” ဆိုဘီး မိန့်တော်မူလေဟယ်။

သေဟားလူရဲ့မယ်ဖြစ်ဟူ မာသဟု “သခင်၊ ခုဆိုဟာ နံနေလေ့မယ်။ သူ့ဟို သံဂြိုဟ်ဟားဇာ လေးရစ်ရှိဟားဘိ!” ဆိုဘီး ပုလန်ဖြေလေဟယ်။

40 ယေ ရှု ဟာ “နန် ယောင် ကြည် မယ် ဆို ဟာ ဘုရားသခင် ရဲ့ ဖောင်းသရေတော်ဟို မြင်ရလေ့မယ် ဆိုဇာ နန်ဟို ငါပြောဟားပီးဘိ မူဟုလော” ဆိုဘီး သူ့ဟို မိန့်တော်မူလေဟယ်။

41 သူးနို့ဟာ ကုလော့-က်ဟို ဖယ်ထုလိုက်ဟယ်။ ယေ ရှုဟာ မော့ကော့ဘီး “ဗ၊ ကျွန်တော့်ရဲ့ စကားဟို နားထောန်ဟူကြောန့် ကျေးဇူးတန်ဟယ်။

42 ဖဟာ ကျွန်တော့်ရဲ့ စကားဟို မြဲဒမ်း နားထောန်ဟယ် ဆိုဇာ နို့သိဟယ်။ အယ်ဘေမဲ့ ကျွန်တော် အယ်မျိုးပြောဇာဟု ဖဟာ ကျွန်တော့်ဟို စေလွှတ်တော်မူဟယ် ဆိုဇာဟို အယ်နေရာမာ ရှိနေဟူ လူလေဟို သူးနို့ရဲ့ ကျိုးဟို ကော့ဘီး ယောင်ကြည်လာစေဟို့ဘဲ ဖြစ်ဟယ်” ဆိုဘီး ပြောလေဟယ်။

43 ကိုယ်တော်ဟာ အယ်မျိုးပြောဘီးန သံကြမ်းကြမ်းန “လာဇရု၊ ထွပ်လာဟား!” ဆိုဘီး ခေါ်ထုလိုက်ဟယ်။

44 သေဟားဟူလူဟာ လတ်ခေလေမာ ဝတ်ကြိုးန ခယ်ဟားဘီး မျစ်နှာမာလည်း ဝတ်န ပတ်ဟားဘီး ထွပ်လာဟယ်။ ယေရှုဟု “သူ့ဟို ကြိုးဖြေပေးဂေ” ဆိုဘီး သူးနို့ဟို

မိန့်တော်မူလေဟယ်။

ယေရှုဟို သတ်ဟို့တွပ် ကြံစည်ဟူကြောန်း

(မသဲ ၂၆.၁-၅; မာကု ၁၄.၁,၂; လုကာ ၂၂.၁,၂)

⁴⁵ မာရိနားဟို လာဟူယုဒလူလေ ဘောင်ဂီးဟာ ယေရှု ပြုတော်မူဇာလေဟို မြင်ဘီး ကိုယ်တော့်ဟို ယောင်ကြည် ဂေဟယ်။

⁴⁶ အယ်ဘေမဲ့ သူးနို့လေထဲဟု တချို့ဟာ ဖာရိရှဲလေ နားဟို ပုလန်လာဘီးဟာ ယေရှုပြုတော်မူဇာလေဟို ပြော ပြဂေဟယ်။

⁴⁷ အယ်ကြောန့် ဖာရိရှဲလေန ယဇ်ပုရောဟိတ်ဂီးလေ ဟာ ယုဒတရားလွတ်တော်မာ တို့ဆောင်ဘီး “နို့လေဖြား မျိုးလောက်ရမယ်နူး။ အယ်လူဟာ နိမိတ်လတ်ခဏာလေ ဘောင်ဂီး ပြုလောက်နေဟယ်!

⁴⁸ အယ်လူဟို အယ်မျိုးခွမ်ပေးဟားမယ် ဆိုဟာ လူ တိုင်းဟာ သူ့ဟို ယောင်ကြည်ဟားလေ့မယ်။ အယ်ဆိုဟာ ရောမအာဏာပိုင်လေဟု နို့လေရဲ့ ဗိမာန်တော်န နို့လေရဲ့ လူမျိုးဟို ဖျစ်ဆီးပစ်လေ့မယ်!” ဆိုဘီး ပြောဂေဟယ်။

⁴⁹ သူးနို့လေထဲဟု အယ်နှစ်မာ ယဇ်ပုရောဟိတ်မန်း ဖြစ် လာဟူ ကယာဖဟု “နန်းနို့လေဟာ ရူးလေဘဲ့!

⁵⁰ လူမျိုးတမျိုးလောင်း သေကျေပျစ်စီးရဟို့ထတ် လူ တယော့-က်ဟု လူလေတွပ် သေရဇာဟု ရရာတိုင်း ကော န်းဟယ် ဆိုဇာဟို နန်းနို့လေ နားလည်ဂေဟလော” ဆိုဘီး ပြောလေဟယ်။

51 အယ်မျိုးပြောနေဇာဟာ သူ့ရဲ့ ကိုယ်ပိုင်ဉာဏ်နဲ့ ပြောနေဇာ မူဟာ။ သူဟာ အယ်နှစ်မာ ယဇ်ပုရောဟိတ်မန်း ဖြစ်လာဟူကြောင့် ယုဒလူလေတွပ် ယေရှု သေခံပေးတော်မူမယ် ဆိုဇာဟို ပရောဖက်ပြုနေဇာဖြစ်ဟယ်။

52 အယ်လူမျိုး တွပ် ဘဲ မူ ဘဲ န ဖု လဲ ဖု လဲ စင် နေ ဟူ ဘုရားသခင်ရဲ့ လူလေလည်းဘဲ ခန္ဓာတခုထဲမာ စုဝီးလာဟို့တွပ် ဖြစ်ဟယ်။

53 အယ်နေဟုစဘီး ယုဒအာဏာပိုင်လေဟာ ယေရှုဟို့ သတ်ဟို့တွပ် ကြံစည်ဂေဟယ်။

54 အယ်ကြောင့် ယေရှုဟာ ယုဒနယ်မာ ထန်းထန်းရှားရှားဟား သွားလာဟမ်း။ အယ်ဘေမဲ့ တောကန္တာရနားဟု ဖေရိမ်နာမယ်ရှိဟူ မြို့ဟို့ ကြွဟားဘီး တဗဲ့တော်လေနတူးဒု နေတော်မူလေဟယ်။

55 ယုဒလူလေရဲ့ ပသခါပွဲတော်ခီ နီးလာဟူ ခီမာ တောဝါဟု လူလေဘောင်ဂီးဟာ ဘာသာရေးစဉ်လာတိုင်း စင်ကြယ်ဇာလောက်ဟို့ ပွဲတော်လောက်ခန်မာ ယေရှုရှုလင်မြို့ဟို့ တတ်လာဂေဟယ်။

56 သူးနို့လေဟာ ယေရှုဟို့ လိုက်ရှာနေဂေဟယ်။ သူးနို့ဟာ ဗိမာန်တော်ထဲမာ စုရောင်းမိဟူ ခီမာ “နန်းနို့လေ ဖယ်မျိုးထန်ဂေနှူး။ သူဟာ အယ်ပွဲတော်ဟို့ လာဟို့တွပ် သေချာဘဲလော” ဆိုဘီး သူးနို့ရှင်းရှင်း မေးနေဂေဟယ်။

57 ယဇ်ပုရောဟိတ်ဂီးလေန ဖာရိရှဲလေဟု ဖယ်သူဘဲ ဖြစ်ဖြစ် ယေရှုရှိဟူနေရာဟို့ သိမယ် ဆိုဟာ သူဟို့ ဖမ်း

ဆီးဟို့တွပ် ကြောင်းကြားရမယ် ဆိုဘီး ညွှန်ကြားဟူးဂေဟယ်။

12

ယေရှုဟာ ဗေသနီဝါမာ ဘိသိက်ခံဟူကြောင်း
(မသဲ ၂၆.၆-၁၃; မာကု ၁၄.၃-၉)

¹ ပသခါပွဲတော်တိုင်ခန် ခြွေ-က်ရစ်ဘဲလိုဟူ ခီမာ သေဘီးန ပုလန်ရှင်လာဟူ လာဇရုနေထိုင်ဟူ ဗေသနီဝါဟို့ ယေရှုဟာ ကြွေတော်မူလေဟယ်။

² သူးနို့ဟာ ကိုယ်တော်တွပ် ညဉ့်ခန်းဇာဟို့ ပြင်ဆင်ဘီးန မာသဟ လောက်ကျွေးပြုလေဟယ်။ ယေရှုနတူးဒူ ဗွဲမာထိုင်နေဟူ လူလေထဲမာ လာဇရုလည်း ရှိနေလေဟယ်။

³ အယ်ခီမာ မာရိဟာ ရာရတိုင်း ဖိုးကီးဟူ နာဒုဆီမွီးစစ်စစ် ဖူးဝပ်ဟို့ ယူဘီး ယေရှုရဲ့ ခေတော်ထတ်ဟို့ လောင်းခလဘီးန သူရဲ့ ဆားဗန်န သုပေးလေဟယ်။ အယ်ဆီမွီးရဲ့ နံဟာ တအီလောင်းဟို့ မွီးကြိုင်ဟူးလေဟယ်။

⁴ ယေရှုရဲ့ တဗွဲတော်တပါးဖြစ်ဟူ ကိုယ်တော့ဟို့ သစ်စာဖော့-က်မယ့်လူဖြစ်ဟူ ယုဒရှုကာရုတ်ဟ

⁵ “ဖြားဖြစ်ကြောန့် အယ်ဆီမွီးဟို့ ငွေဒန်းဂါး* ၃၀၀ န ရောင်းလိုက်ဘီးဟူး ဆင်းရဲသားလေဟို့ ပေးဘဲနေရနူး” ဆိုဘီး မေးလေဟယ်။

12:3 ၁၂.၃ လု ၇.၃၇.၃၈ * 12:5 ၁၂.၅ ငွေဒန်းဂါး၊ ရှု ၆.၇။

⁶ သူဟာ အယ်မျိုးပြောနေဇာဟု ဆင်းရဲသားလေဟို သနားကြောန့်မှဘဲန သူခိုးတယော့-က် ဖြစ်ကြောန့်ဖြစ် ဟယ်။ သူဟာ ကပ်အိဟို လွယ်ရသူဖြစ်ဘီး ကပ်လေဟို နှိုက်ယူတတ်ဟယ်။

⁷ အယ်ဘေမဲ့ ယေရှုဟု “အယ်မီးမဟို နှော့-က်ယှစ်ဂေ နု! သူဟာ ငါ့ဟို သဂြိုဟ်မယ့်နေတွပ် အယ်ဆီမွီးဟို သီး ဟားဇာဖြစ်ဟယ်။

⁸ ဆင်းရဲသားလေဟာ နန်းနို့တူးဒူ မြဲဒမ်း ရှိဂေဟယ်။ ငါဟု နန်းနို့တူးဒူ မြဲဒမ်း ရှိနေဟို မူဟု” ဆိုဘီး မိန့်တော် မူလေဟယ်။

လာဇရုဟို သတ်ဟို့တွပ် ကြံစည်ဟူကြောန်း

⁹ ဗေသနိဝါမာ ယေရှုရှိတော်မူဟယ် ဆိုဇာဟို ကြားလို က်ဟူ ယုဒလူလေဘောင်ဂီးဟာ အယ်ဝါဟို လိုက်ဟားဂေ ဟယ်။ သူးနို့ဟာ ယေရှုဟို တို့ရှင်ရောင်မျှမက သေရာဟု နေ ပုလန်ရှင်လာဟူ လာဇရုဟိုလည်း တို့ရှင်ဂေဟယ်။

¹⁰ အယ်ကြောန့် ယဇ်ပုရောဟိတ်ဂီးလေဟာ လာဇရုဟို လည်း သတ်ဟို့တွပ် ကြံစည်ဂေဟယ်။

¹¹ ဖြူးဖြစ်ကြောန့်နူးဆိုဟာ ယုဒလူဘောင်ဂီးဟာ လာ ဇရုကြောန့် သူးနို့ဟို ငြင်းပယ်ဘီး ယေရှုဟို ယောင်ကြည် လာဂေဟယ်။

အောန်မွဲခံဘီး ယေရှုရှလင်မြို့ဟို ဝမ်တော်မူဟူကြော

န်း

(မသဲ ၂၁.၁-၁၁; မာကု ၁၁.၁-၁၁; လုကာ ၁၉.၂၈-၄၀)

¹² နော့-က်နေမာ ပသခါပွဲတော်ဟို့ လာဟူ လူအောက်
ဂီးဟာ ယေရုရှလင်မြို့ဟို့ ယေရုကြွလာတော်မူကြောင်းဟို့
ကြားလိုက်ဟယ်။

¹³ အယ်ကြောန့် သူးနို့ဟာ စွန်ပလုံခတ်လေဟို့ ယူဘီး
ကိုယ်တော့်ဟို့ ကြိုဆိုဟို့သွားဂေဘီး “ဟောရှုဏှဏှ!
ဘုရားသခင်ရဲ့ နာမန ကြွလာဟူ သခင်ဟာ မင်္ဂလာရှိတော်
မူဟယ်! ကူသရေလမန်းဂီးဟာ မင်္ဂလာရှိတော်မူဟယ်!”
ဆိုဘီး ကြွေးကြော်ဂေလေဟယ်။

¹⁴ ယေရုဟာ မြည်းသားဂန်းဟို့ တွံဟားဘီး စီးတော်မူ
လေဟယ်။

¹⁵ အယ်မူဇာဟု “ဇိအုန်မြို့ စိုးရိမ်န!

နန်းနို့ရဲ့ မန်းဂီးဟာ

မြည်းသားဂန်းဟားဟို့ စီးဘီးဟာ ကြွလာတော်မူဘိ”

ဆိုဘီး ကျမ်းစာမာ အယ်မျိုး ပြောဟားလေဟယ်။

¹⁶ တဗွဲတော်လေဟာ အယ်ခိဒူးဟု အယ်ကျမ်းစာဟို့ နား
လည်ဂေဟု။ အယ်ဘေမဲ့ ယေရုဟာ ဖောင်းသရေတော်
တွပ် ပုလန်ရှင်လာဟူ ခီမာ အယ်ကျမ်းစာဟု ကိုယ်တော်
ကြောန်းဟို့ ရေးဟားဇာဖြစ်ဟယ် ဆိုဇာန ကိုယ်တော်
ဟို့ အယ်မျိုး လောက်ဇာဖြစ်ဟယ် ဆိုဇာလေဟို့ ပုလန်
အော့-က်မေ့လာဂေဟယ်။

၁၇ ယေရှုနတူးဒူရှိနေဟူ လူလေဟာ လာဇရုဟို့ သန်းခဲ လိုင်းဂူဟုနေ ခေါ်ထုလိုက်ဘီး သေရာဟုနေ ပုလန်ရှင်စေ ဟူကြောင်းဟို့ သတ်သေခံဂေဟယ်။

၁၈ ဖြားကြောန်ဟို့ လူအောက်ဟာ ကိုယ်တော့်ဟို့ ကြုံဆို ဂေဇာဟာ သူးနို့ဟာ အယ်မျိုး နိမိတ်လတ်ခဏာလေဟို့ ပြတော်မူကြောင်းဟို့ ကြားဟူးဂေဟယ်။

၁၉ အယ်ကြောန် ဖာရိရှဲလေဟာ “နို့လေဟာ လောက်ဝ အောန်မြင်နိုင်ဟု! ကေ့ကေ့။ တလောကလောင်းဟာ အယ် လူနော့-က်ဟို့ လိုက်ဟူးဂေဘီ!” ဆိုဘီး သူးနို့ရှင်းရှင်း ပြောနေဂေဟယ်။

လူမျိုးခြားတချို့ ယေရှုဟို့ လိုက်ရှာဟူကြောင်း

၂၀ ပွဲတော်မာ ကိုးကွယ်ဟို့တွပ် ယေရှုရှလင်မြို့ ဟို့ ရော့-က်လာဟူ လူလေထဲမာ လူမျိုးခြားတချို့လည်းပါ ဟယ်။

၂၁ သူးနို့ဟာ ဂါလိလဲနယ် ဗက်ဇဲဒမြို့သားဖြစ်ဟူ ဖိလိ ပုပုနားဟို့ သွားဘီး “ဆရာ၊ ကျွန်တော့်ဟူးလေ ယေရှုဟို့ မြင်ရှင်ဟယ်” ဆိုဘီး တောန်းလျှော့-က်ဂေဟယ်။

၂၂ ဖိလိပုပုဟာ အနုဒြေနားဟို့ သွားပြောပြဘီးဟာ သူးနို့ နှေ့ယော့-က်ဟာ ယေရှုနားဟို့ သွားဘီး လျှော့-က်ဂေဟယ်။

၂၃ ယေရှုဟာ သူးနို့ဟို့ “လူရဲသားဟာ ရရာတိုင်း ကီးမား ဟူ ဖောင်းသရေတော်ဟို့ လတ်ခံဟို့ ခီဟာ ခုဘဲရော့-က် နေဘီ။

24 နန်းနို့ဟို့ ငါ မှန်တိုင်းပြောမယ်၊ ရျောင်စေ့တစေ့ဟာ မှလေဂီးထဲဟို့ ကုလဘီး ပျစ်စီးဟု ဆိုဟာ တစေ့ဒဲဘဲ ရှိနေလေ့မယ်။ အယ်စေ့ဟာ ပျစ်စီးဟူးမယ် ဆိုဟာ သီးလေ ဘောင်ဂီး ဖြစ်ဟူးဟယ်။

25 ကိုယ့်သတ်ဟို့ ရှစ်ဟူ လူလေဟာ သတ်ဆောင်းရှောင်း လေ့မယ်။ အယ်လောကမာ ကိုယ့်သတ်ဟို့ မူးဟူ လူလေဟာ ကိုယ့်သတ်ဟို့ ထာဝရ စောန့်ရှေး-က်ရလေ့မယ်။

26 ငါ့မူတော်ဟို့ လောက်ဆောန်ဟူ လူတိုင်းဟာ ငါ့နော့-က်ဟို့ လိုက်ရမယ်။ အယ်ဆိုဟာ ငါရှိဟူ နေရာမာ ငါ့မူဆောန်ဟာ ငါ့တူးဒူရှိ လေ့မယ်။ ငါ့ဖဟုလည်း ငါ့ရဲ့မူဆောန်ဟို့ ချီးမြှော့-က်လေ့မယ်။

ယေရှုဟု သေခံဟို့တွပ် ပြောဟူကြောင်း

27 “ခု ငါ့ရဲ့ စိန်လောင်း ပူလောန်နေဟယ်။ ငါ ဖယ်မျိုးပြောရဟို့နူး။ ငါဟု ‘ဖ၊ ကျွန်တော်ထတ်ဟို့ ကုလရော့-က်လာမယ့် အယ်ခီနာရီဟုနေ ကယ်မပါ’ ဆိုဘီး ပြောရဟို့လော။ အယ်ဘေမဲ့ ငါဟာ အယ်ဒေါက်ခဝေဒနာခံဟို့တွပ်ဘဲ့ ရော့-က်လာဟယ်။

28 ဖ၊ ဖရဲ့နာမတော်ဟာ ဖောင်းသရေတော် ထန်ရှားစေတော်မူပါ!” ဆိုဘီး မိန့်တော်မူလေဟယ်။

အယ်ဘီးန ကောင်းဂန်ထတ်ဟုနေ သံတော်ဟု “ငါဟာ ဖောင်းသရေတော် ထန်ရှားစေပီးဘီ။ နော့-က်တခါလည်း

ထန်ရှားစေအူးမယ်” ဆိုဘီး မိန့်တော်မူလေဟယ်။

29 အယ်နေရာမာ ရပ်နေဂေဟူ လူအောက်ဟာ သံတော်
ဟို ကြားလိုက်ရဘီး သူးနို့ထဲဟု တချို့ဟု မိုးကြိုးသံဖြစ်
ဟယ် ဆိုဘီး ပြောဂေဟယ်။ တချို့ဟု “ကောန်းဂန်တမန်
ဟာ ကိုယ်တော့်ဟို စကားပြောဟယ်!” ဆိုဘီး ပြောဂေဟ
ယ်။

30 အယ်ဘေမဲ့ ယေရှုဟာ သူးနို့ဟို “အယ်သံတော်ဟာ
ငါ့တွပ် မူဟု။ နန်းနို့တွပ် ဖြစ်ဟယ်။

31 အယ်လောကဟာ ခုဘဲ့ တရားစီရင်ခံရမယ်။ အယ်
လောကဟို အောက်ချောက်မားဟာ ခုဘဲ့ နှန်ထုဇာခံရလေ့
မယ်။

32 ငါဟာ မလေဂီးဟုနေ မလော့-က်ဟားဇာဟို ခံရဟူ
ခီမာ လူတိုင်းဟို ငါနားဟို ဆွဲခေါ်မယ်” ဆိုဘီး မိန့်တော်မူ
လေဟယ်။

33 အယ်မျိုးမိန့်တော်မူဇာဟု ကိုယ်တော်ဟာ ဖယ်မျိုး
သေနည်းနု သေခံတော်မူရမယ် ဆိုဇာဟို ဖော်ပြဇာဖြစ်ဟ
ယ်။

34 လူအောက်ဂီးဟု “မေရှိယဟာ ထာဝရသတ်ရှင်လေ့
မယ် ဆိုဘီး ကျွန်တော့်ဟားလေရဲ့ ပညတ်တော်မာ ပြော
ဟားဟယ်။ အယ်ဆိုဟာ လူရဲ့သားဟာ မလေဂီးဟုနေ မ
လော့-က်ဟားခံရမယ် ဆိုဘီး ဖြားဖြစ်ကြောန့် ပြောနိုင်
နူး။ အယ်လူရဲ့သားဟု ဖယ်လူနူး” ဆိုဘီး မေးဂေဟယ်။

35 ယေရှုဟု “လန်းရောန်ဟာ နန်းနို့ထဲမာ ရှစ်ဟားဘဲ့ ရှိ
နေလေ့မယ်။ အယ်ကြောန့် နန်းနို့ဟို မှောန်ဖောင်းခန် လန်း

ရောက်ရှိနေဒူးမာ သွားလာဂေ။ ဖြားဖြစ်ကြောန်းနူးဆိုဟာ မှောက်ထဲမာ သွားလာလူဟာ ဖယ်နေရာဟို သွားနေဟယ် ဆိုဇာဟို သိဟ။

³⁶ အယ်မူကြောန်းဟို လန်းရောက်ဟာ နန်းနို့ရိုနေဒူးမာ လန်းရောက်ဟို ယောင်ကြည်ဂေ။ အယ်ဆိုဟာ နန်းနို့ဟာ လန်းရောက်ရဲ့ သားမီးလေ ဖြစ်လေ့မယ်” ဆိုဘီး ပုလန်ဖြေ တော်မူဟယ်။

ယောင်ကြည်ဘဲဟူ လူလေကြောန်း

ယေရှုဟာ အယ်မျိုးမိန့်တော်မူဘီးန ထွပ်ကြွဟားဘီး သူးနို့ဟို တီးရောက်ဟားလေဟယ်။

³⁷ ကိုယ်တော်ဟာ သူးနို့မျစ်စိရှေ့မာ အယ်နိမိတ်လတ် ခဏာလေ ဂူလောင်းဟို ပြဘေမဲ့ သူးနို့ဟာ ကိုယ်တော့်ဟို ယောင်ကြည်ဂေဟ။

³⁸ အယ်ကြောန်း

“အို၊ ဘုရားသခင် ကျွန်တော့်ဟားလေဟောပြောဟူ အယ် ဒန်းကောန်းဟို ဖယ်သူလေ ယောင်ကြည်ကြောန်း နူး။

သခင်ဘုရားရဲ့ တဂိုးတော်ဟာ ဖယ်လူဟို ထန်ရှား ဟို့နူး။” ဆိုဘီး ပရောဖက်ဟေရှာယ ဟောဟားဇာ ဟာ မှန်ဘဲဖြစ်လာဟယ်။

³⁹ အယ်ဘီးဟာ သူးနို့လေ ယောင်ကြည်နိုင်ဘဲကြောန်း ဟေရှာယဟ

⁴⁰ “ဘုရားသခင်ဟာ သူးနို့ရဲ့ မျစ်စိဟို ကန်းစေဟားဘီး

သူးနှိရဲ့ စိန်လောင်းဟို့ ပိစေဟူးဟယ်။
 အယ်ကြောန့် သူးနှိရဲ့ မျစ်စိဟာ မြင်ဂေဟာ။
 အယ်ဘီးဟာ သူးနှိရဲ့ စိန်လောင်းဟို့ မာကျောစေဟာ
 ယ့်။
 အယ်ဘီးဟာ သူးနှိဟာ ငါနားဟို့ ပုလန်လာဂေဟာ။
 ဖြားဖြစ်ကြောန့်နူးဆိုဟာ သူးနှိဟာ ငါနားဟို့ ပုလန်
 လာမယ် ဆိုဟာ နာပျော့-က်လေ့မယ်” ဆိုဘီး
 ဘုရားသခင်ဟု ပြောဟူးဟယ်။

⁴¹ ဟေရှာယဟာ ယေရှုရဲ့ ဖောင်းသရေတော်ဟို့ မြင်
 ဟူးဟူကြောန့် အယ်မျိုးပြောဆိုဘီး ကိုယ်တော်ကြောန့်
 ဟို့ ပြောနေလေဟယ်။

⁴² ဖယ်မျိုးဘဲဖြစ်ဖြစ် ယုဒအာဏာပိုင်လေ ဘောင်ဂီး
 ဟာ ယေရှုဟို့ ယောင်ကြည်လာဂေဟယ်။ အယ်ဘေမဲ့ သူး
 နှိဟာ ဖာရိရှဲလေကြောန့် ဝါလယ်ဇရပ်ဟုနေ နှိထုခံရမာ
 ဟို့ စိုးရိမ်ဘီး ပွမ်ပွမ်လန်းလန်းဟူး ပြောဂေဟာ။

⁴³ သူးနှိဟာ ဘုရားသခင်ရဲ့ ချီးမွမ်းဇာထတ် လူလေရဲ့
 ချီးမွမ်းဇာဟို့ နှစ်သက်ဂေဟယ်။

ယေရှုရဲ့ စကားတော်ကြောန့် တရားစီရင်ဟူကြောန့်

⁴⁴ ယေရှုဟာ “ငါဟို့ ယောင်ကြည်ဟူလူဟာ ငါဟို့ဘဲ
 ယောင်ကြည်ဇာ မူဟာ။ ငါဟို့ စေလွှတ်တော်မူဟူ သခင်ဟို့
 လည်း ယောင်ကြည်ဟယ်။

⁴⁵ ငါဟို့ မြင်ဟူလူဟာ ငါဟို့ စေလွှတ်တော်မူဟူ သခင်
 ဟို့လည်း မြင်ဟယ်။

46 ငါဟာ လန်းရောန်ဖြစ်န လောကထဲဟို့ ကြွလာဟယ်။ အယ်ကြောန် ငါဟို့ ယောင်ကြည်ဟူ လူတိုင်းဟာ မှောန်ထဲ မာ နေရဟယ်။

47 လူလေဟာ ငါ့ရဲ့စကားဟို့ ကြားဘီး နာခံဟု ဆိုဟာ သူးနို့ဟို့ ငါစီရင်လေ့မယ် မူဟု။ ဖြားဖြစ်ကြောန်နူးဆိုဟာ ငါလာဇာဟု အယ်လောကဟို့ စီရင်ဟို့လာဇာ မူဟု။ အယ် လောကဟို့ ကယ်တန်ဟို့လာဟယ်။

48 ငါ့စကားဟို့ လတ်ခံဘဲန ငြင်းပယ်ဟူ လူလေဟို့ စီရင် မယ့်သုရှိဟယ်။ ငါပြောဟူ စကားလေဟုဘဲ နော-က်ဆော င်းဟူ နေ့မာ အယ်လူလေဟို့ စီရင်လေ့မယ်!

49 အယ်စကားဟာ သမ္မာတရား ဖြစ်ဟယ်။ ဖြားဖြစ် ကြောန်နူးဆိုဟာ ငါဟာ ကိုယ်ပိုင် ခွမ်အာဏာန ပြောနေ ဇာ မူဟု။ အယ်ဘေမဲ့ ငါဟို့ စေလွှတ်တော်မူဟူ ဖဟာ ဖယ် မျိုးပြောရမယ် ဆိုဇာဟို့ ငါဟို့ ညွှန်ကြားတော်မူဘီ။

50 အယ်ဘီးဟာ ဖရဲ့မိန့်တော်ဟာ ထာဝရသတ် ဖြစ်ဟု ယ် ဆိုဇာဟို့ ငါသိဟယ်။ ငါပြောနေဇာလေဟာ ဖဟု ငါဟို့ စေခိုင်းတော်မူဟားတိုင်း ငါဟောပြောဟယ်” ဆိုဘီး သံ ကုလယ်ဂီးန မိန့်တော်မူလေဟယ်။

13

ယေရှုဟာ တမဲ့တော်လေရဲ့ခေဟို့ ဆေးတော်မူဟူ ကြောန်နူး

၁ ပသခါပွဲတော် လောက်ခန့် တနေ့မှာ ဖြစ်ဟုယ်။ ယေရှုဟာ အယ်လောကဟု ထွပ်ခါဘီး ဖနားဟို့ ကြွတ်တော်မူဟို့ ခိ ရော့-က်လာဘီ ဆိုဇာဟို့ သိတော်မူဟုယ်။ ကိုယ်တော်ဟာ အယ်လောကမာရှိနေဟူ မိမိလူလေဟို့ ရှစ်တော်မူဘီး ဆောင်းထိ ရှစ်တော်မူလေဟုယ်။

၂ ယေရှုန တဗွဲတော်လေဟာ ညဉ့်ဇာစားနေဂေဟုယ်။ မာရ်နတ်ဟာ ရှိမုန်ရှကာရုတ်သား ယုဒရဲ့ စိန်လောင်းထဲမာ ကိုယ်တော့်ဟို့ သစ်စာဖော့-က်ဟို့ ကြံစည်ဟို့ ထဲပေးဟူးပီးဘီ။*

၃ ဖဟု သူဟို့ အာဏာလေ အားလောင်း ပေးဟူးဟုယ် ဆိုဇာဟို့ရော၊ ဘုရားသခင်နားဟုနေ ကြွလာတော်မူဟုယ် ဆိုဇာရော၊ ဘုရားသခင်နားဟို့ ပုလန်ကြွတ်တော်မူရမယ် ဆိုဇာဟို့ရော ယေရှုဟာ သိတော်မူဟုယ်။

၄ အယ်ကြောန့် ကိုယ်တော်ဟာ စားဗွဲဟုနေ ထတော်မူဘီး ပုလန်ဝတ်ဟို့ ခလွတ်တော်မူဘီး မျစ်နှာသုပိုင်းဟို့ ကိုယ်တော်ရဲ့ခါးမာ ပတ်တော်မူလေဟုယ်။

၅ အယ်ဘီးန ကိုယ်တော်ဟာ ရေအန်ဒုန်ထဲဟို့ ရေလောန်းထဲဘီး စဘီးဟာ တဗွဲတော်လေရဲ့ ခေဟို့ ဆေးပေးဘီးဟာ ခါးမာပတ်ဟူးဟူ မျစ်နှာသုပိုင်းန သုတော်မူလေဟုယ်။

* 13:2 **၁၃.၂** မာရ်နတ်ဟာ ရှိမုန်ရှကာရုတ်သား ယုဒရဲ့ စိန်လောင်းထဲမာ ကိုယ်တော့်ဟို့ သစ်စာဖော့-က်ဟို့ ကြံစည်ဟို့ ထဲပေးဟူးပီးဘီ။ အယ်မျိုးမူဘဲနေဟာမာရ်နတ်ဟာ ရှိမုန်ရှကာရုတ်သား ယုဒဟို့ ယေရှုရဲ့ သစ်စာဖော့-က်ဟို့ ဆောင်းဖြတ်ဟူးပီးဘီ။

6 ကိုယ်တော်ဟု ရှိမုန်ပေတရုန်းဟို့ ရော့-က်ဟူ ခီမာ ပေတရုဟု “သခင်၊ ကိုယ်တော်ဟု ကျွန်တော့်ခေဟို့ ဆေးပေးဟို့လော” ဆိုဘီး ကိုယ်တော်ဟို့ လျှော့-က်လေဟယ်။

7 ယေရှုဟု သူဟို့ “ငါလောက်ဇာလေဟို့ ခု နန်နားလည်ဟို့ မဟု။ အယ်ဘောမဲ့ နော့-က်ဆိုဟု နားလည်လာလေမယ်” ဆိုဘီး ဖြေတော်မူဟယ်။

8 ပေတရုဟု “ကိုယ်တော်ဟု ကျွန်တော့်ရဲ့ ခေဟို့ လောင်းဝ ဆေးပေးတော်မူနု!” ဆိုဘီး လျှော့-က်လေဟယ်။

ယေရှုဟု “နန်ရဲ့ခေဟို့ ငါဆေးပေးရဘဲဟု ဆိုဟု နန်ဟု ငါ့တမဲ့တော် ဖြစ်ဟို့ မဟု” ဆိုဘီး ဖြေတော်မူလေဟယ်။

9 ရှိမုန်ပေတရုဟု “သခင်၊ အယ်မျိုးဆိုဟု ကျွန်တော့်ရဲ့ ခေဟို့ဘဲဆေးနု! ကျွန်တော့်ရဲ့လတ်လေန ခေါင်းဟို့လည်း ဆေးပေးပါ!” ဆိုဘီး လျှော့-က်လေဟယ်။

10 ယေရှုဟု “ရေချိုးဘီးသားလူလေဟု တကိုယ်လောင်း စင်ကြယ်ဟူးဘိဖြစ်ဟူကြောန့် သူးနို့ရဲ့ ခေဟို့ဘဲ ဆေးဟို့လိုဟယ်။† နန်းနို့ဂူလောင်းဟု စင်ကြယ်ဟူးဘိ။ အယ်ဘောမဲ့ တယော့-က်ဘဲ စင်ကြယ်ဟု” ဆိုဘီး မိန့်တော်မူလေဟယ်။

11 ယေရှုဟု သူဟို့ သစ်စာဖော့-က်မယ့်လူဟို့ သိဟူးဘီးဟူကြောန့် “နန်းနို့လေ ဂူလောင်းထဲမာ စင်ကြယ်ဘဲဟူ

† 13:10 ၁၃.၁၀ တချို့ မူရင်းလတ်ရေးမူလေမာ သူးနို့ရဲ့ ခေဟို့ဘဲ ဆေးဟို့လိုဟယ် ဆိုဇာဟု မေ့ဟု။

လူတယော့-က်ရှိနေဟယ်” ဆိုဘီး မိန့်တော်မူလေဟယ်။

12 ယေရှုဟာ သူးနို့ရဲ့ ခေလေဟို ဆေးပေးဘီးန ပုလန်
ဝတ်ဟို ပုလန်ဝတ်လိုက်ဘီး စားမွဲမာ ပုလန်ထိုင်တော်မူ
လေဟယ်။ ကိုယ်တော်ဟ “နန်းနို့ဟို ငါပြုလောက်ဇာလေ
ဟို နားလည်ဂေဘွဲလော” ဆိုဘီး မေးတော်မူလေဟယ်။

13 “နန်းနို့ဟ ငါ့ဟို သခင်ဆိုဘီးရော၊ ဆရာဆိုဘီးရော
ခေါ်ဂေဟယ်။ ငါလည်း အယ်တိုင်းဘွဲဖြစ်ဟူကြောန့် နန်း
နို့ခေါ်ဇာဟာ မှန်ဟယ်။

14 နန်းနို့ရဲ့ ဆရာ၊ နန်းနို့ရဲ့ သခင်ဖြစ်ဟူ ငါဟာ နန်းနို့ရဲ့ ခေ
လေဟို ဆေးပေးဟယ်။ အယ်ဆိုဟာ နန်းနို့လည်း ရှင်းရှင်း
လေရဲ့ ခေဟို ဆေးပေးရမယ်။

15 နန်းနို့ဟို ငါပြုတော်မူမျိုးဘွဲ နန်းနို့လည်းဘွဲ အယ်
မျိုးပြုလောက်ဟို စံနမူနာဟို ငါပြဟားပီးဘီ။

16 နန်းနို့ဟို ငါ မှန်တိုင်းပြောမယ်၊ ကျွန်ဟာ သူးနို့သခင်
ထတ် ကီးမြတ်ဟု။ စေတမန်ဟာ သူ့ဟို စေလွတ်သူထတ်
ကီးမြတ်ဟု။

17 အယ်သမ္မာတရားဟို နန်းနို့ ခု သိဟားဘီ။ အယ်မူ
တိုင်းလောက်မယ် ဆိုဟာ နန်းနို့ဟာ ရရာတိုင်း ပျော်ရွှင်ရ
လေ့မယ်!

18 “ငါဟာ နန်းနို့လေ ဂူလောင်းဟို ပြောဇာ မူဟု။ ငါ
ဝီးကော့-က်ဟားဟူ လူလေဟို ငါသိဟယ်။ အယ်ဘေ
မွဲ ကျမ်းစာဟ ‘ငါ့ရဲ့မဟို စားဟူလူဟာ ငါ့ဟို ပုလန်ဘီး

ဆန့်ကျင်လေဘိ’ ဆိုဘီး ပြောဟားဇာဟာ မှန်ဘဲဖြစ်လာဟယ်။

¹⁹ အယ်ကြောန့် အယ်မူဇာလေ ဖြစ်လာခန်မာ ‘ငါဖြစ်မျိုးဘဲ ငါဖြစ်ဟယ်’ ဆိုဇာဟို နန်းနို့ဟာ ယောင်ကြည်လာစေဟို ခုဘဲ နန်းနို့ဟို ငါပြောဟယ်။

²⁰ နန်းနို့ဟို ငါ မှန်တိုင်းပြောမယ်၊ ငါစေလွှတ်ဟူ သူဟို လတ်ခံဟူ သူဟာ ငါ့ဟို လတ်ခံဟယ်။ ငါ့ဟို လတ်ခံဟူ သူဟာ ငါ့ဟို စေလွှတ်လိုက်ဟူ သူဟိုလည်း လတ်ခံဟယ်” ဆိုဘီး မိန့်တော်မူလေဟယ်။

ယေရှုဟာ သစ်စာဖော့-က်ခံရမယ် ဆိုဇာဟို ကြိုတန်ပြောဟူကြောန်း

(မသဲ ၂၆.၂၀-၂၅; မာကု ၁၄.၁၇-၂၁; လုကာ ၂၂.၂၁-၂၃)

²¹ ယေရှုဟာ အယ်မျိုးမိန့်တော်မူဘီးန ရရာတိုင်း စိပူဘန်ဟားဘီး “နန်းနို့ဟို ငါ မှန်တိုင်းပြောမယ်၊ နန်းနို့ထဲဟု တယော့-က်ဟာ ငါ့ဟို သစ်စာဖော့-က်လေ့မယ်” ဆိုဘီး ပွင့်ပွင့်လန်းလန်းဟား သတ်သေခံဘီး မိန့်တော်မူလေဟယ်။

²² ကိုယ်တော်ဟာ ဖယ်လူကြောန်းဟို ပြောနေဟယ် ဆိုဇာဟို တမဲ့တော်လေဟာ လောင်းဝ နားလည်ဂေဘဲဟူ ကြောန့် ယော့-က်နယော့-က် ကော့နေဂေဟယ်။

23 ယေရှုရှစ်တော်မူဟူ တမဲ့တော်လေထဲဟု တယော့-က်
ဟာ ယေရှုဘေးမာ ထိုင်နေဟယ်။

24 ရှိမုန်ပေတရုဟာ သူ့ဟို့ “ကိုယ်တော်ဟာ ဖယ်သူ
ကြောန်းဟို့ ပြောနေဟယ် ဆိုဇာဟို့ မေးကေ့” ဆိုဘီး မျစ်
ရိပြဘီး ပြောဟယ်။

25 အယ်ကြောန့် အယ်တမဲ့တော်ဟာ ယေရှုနားဟို့ တိုး
ကပ်ဟားဘီး “သခင်၊ အယ်လူဟာ ဖယ်သူနူး” ဆိုဘီး မေး
လျှော့-က်လေဟယ်။

26 ယေရှုဟာ “အယ်မုဟို့ ဟန်းဇးထဲမာ နှစ်လိုက်ဘီး ငါ
ပေးလိုက်ဟူ လူဘဲဖြစ်ဟယ်” ဆိုဘီး ဖြေတော်မူလေဟ
ယ်။ အယ်ကြောန့် ကိုယ်တော်ဟာ မုတဖဲ့ဟို့ ဟန်းဇးထဲ
မာ နှစ်လိုက်ဘီး ရှိမုန်ရှကာရုတ်ရဲသား ယုဒဟို့ ပေးလေ
ဟယ်။

27 ယုဒဟာ အယ်မုဟို့ ယူဘီးန ရှင်းရှင်းဘဲ စာတန်ဟာ
သူထဲဟို့ ဝမ်လေဟယ်။ ယေရှုဟာ သူ့ဟို့ “နန်လောက်ဇာ
ရှိဇာဟို့ ဗြန်းဗြန်ဟားလောက်ပါ!” ဆိုဘီး မိန့်တော်မူလေ
ဟယ်။

28 ဖြးဖြစ်ကြောန့် ယေရှုဟာ ယုဒဟို့ အယ်မျိုးမိန့်တော်
မူဟယ် ဆိုဇာဟို့ စားမဲ့မာ ထိုင်နေဟူ လူယော့-က်လည်း
နားလည်ဂေဟယ်။

29 ယုဒဟာ ကပ်အိကိုင်ရဟူ သူဖြစ်ဟူကြောန့် ယေရှုဟ
ပွဲတော်တွပ် လိုအပ်ဇာလေဟို့ ဝယ်ခိုင်းလိုက်ဟယ်။ အယ်
မျိုးမုဘဲနေဟာ ဆင်းရဲသားလေဟို့ တခုခုသွားပေးခိုင်းလို

က်ဟယ် ဆိုဘီး တဗဲတော်တချို့ဟာ ထန်နေဂေဟယ်။

³⁰ ယုဒဟာ မဟို ခံယူဘီးန ရှစ်ရှင်းထွပ်ဟားလေဟယ်။
အယ်ခီဟာ ညဉ့်ခန်းဖတ်ဖြစ်ဟယ်။

ပညတ်တော်သစ်

³¹ ယုဒထွပ်ဟားဘီးန ယေရှုဟာ “ခု လူ့ရဲ့သားဟာ
ဖောင်းသရေတော် ထန်ရှားတော်မူဘီ။ ခု ဘုရားသခင်ဟာ
လူ့ရဲ့သားအားဖြင့် ဖောင်းသရေတော် ထန်ရှားတော်မူဘီ။

³² ဘုရားသခင်ဟာ လူ့ရဲ့သားအားဖြင့် ဖောင်းသရေ
တော် ထန်ရှားတော်မူဟယ် ဆိုဟာ ဘုရားသခင် ကိုယ်တိုင်
အားဖြင့် လူ့ရဲ့သားဟို ဖောင်းသရေတော် ထန်ရှားတော်မူ
ဘီး အယ်ဖောင်းသရေတော်ဟို ရှစ်ရှင်း ထန်ရှားတော်မူ
လေ့မယ်။

³³ ရှစ်ရဟူ သားမီးလေ၊ ငါဟာ နန်းနို့တူးဒူ ရှစ်ဟားဘဲ
နေရလေ့မယ်။ နန်းနို့ဟာ ငါ့ဟို လိုက်ရှာလေ့မယ်။ အယ်
ဘေမဲ့ ယုဒအာဏာပိုင်လေဟို ပြောဟားမျိုးဘဲ ‘ငါသွား
မယ့်နေရာဟို နန်းနို့လာနိုင်ဂေဟ’ ဆိုဘီး နန်းနို့ဟို ခု ငါ
ပြောဟယ်။

³⁴ ခု နန်းနို့ဟို ငါပေးဟူ ပညတ်တော်သစ်ဟာ ရှင်းရှင်းရှစ်
ဂေ။ နန်းနို့ဟို ငါရှစ်မျိုးဘဲ ရှင်းရှင်းရှစ်ရမယ်။

³⁵ နန်းနို့ရှင်းရှင်း ရှစ်ဂေမယ် ဆိုဟာ နန်းနို့ဟာ ငါတဗဲ
တော် ဖြစ်ဂေဟယ် ဆိုဇာဟို လူတိုင်း သိဂေလေ့မယ်” ဆို
ဘီး မိန့်တော်မူလေဟယ်။

ယေရှုဟာ ပေတရုရဲ့ ငြင်းပယ်ဇာတို့ ကြိုတန်ဖော်ပြ
ဟူကြောင်း

(မဿဲ ၂၆.၃၁-၃၅၊ မာကု ၁၄.၂၇-၃၁၊ လုကာ ၂၂.၃၁-
၃၄)

³⁶ ရှိမှန်ပေတရုဟာ “သခင်၊ ကိုယ်တော်ဟု ဖယ်နေရာတို့
သွားတို့နဲ့” ဆိုဘီး ကိုယ်တော့်တို့ မေးလျှော့-က်လေဟု
ယ်။

ယေရှုဟာ “ငါသွားတို့နေရာတို့ ခု နန်လိုက်နိုင်တို့ မှဟု။
အယ်ဘောမဲ့ နှော့-က်ဆိုဟာ လိုက်ရလေ့မယ်” ဆိုဘီး ဖြေ
တော်မူလေဟယ်။

³⁷ ပေတရုဟာ “သခင်၊ ဖြားဖြစ်ကြောန့် ခုဟု ကိုယ်တော်
နှော့-က်တို့ လိုက်နိုင်ရဟုနဲ့။ ကိုယ်တော်တွပ်ဆို ကျွန်
တော့်သတ်တို့ စွန့်တို့ ဆင်သင့်ဘဲ့!” ဆိုဘီး မေးလျှော့-က်
လေဟယ်။

³⁸ ယေရှုဟာ “နန်ဟု ငါတွပ် နန်ရဲ့ သတ်တို့ စွန့်တို့ ဆင်
သင့်ဘဲ့လော။ နန်တို့ ငါ မှန်တိုင်းပြောမယ်၊ ကြစ်တွန်ခန်
မာ နန်ဟာ ငါတို့ သိဟု ဆိုဘီး သောင်းခါ ငြင်းပယ်လေ
မယ်” ဆိုဘီး ဖြေတော်မူလေဟယ်။

14

ယေရှုဟာ ဖနားတို့ သွားဟူလမ်းဖြစ်ဟူကြောင်း

¹ ယေရှုဟာ သူးနို့တို့ “နန်းနို့လေ စိပူဂေန။ ဘုရားသခ
င်တို့ ယောင်ကြည်ဂေ။* ငါတို့လည်း ယောင်ကြည်ပါ။

* 14:1 ၁၄.၁ ယောင်ကြည်ဂေ၊ အယ်မျိုးမှတော့ နန်းနို့
ယောင်ကြည်ဂေ။

၂ ငါ့ဖရဲ့ အိတော်မာ ခန်းလေ ဘောင်ဂီးရှိဟယ်။ နန်းနို့တွပ် နေရာဟို့ ပြင်ဆင်ဟို့တွပ် ငါသွားရမယ်။ ခန်းလေမေ့ဟု ဆိုဟာ နန်းနို့ဟို့ အယ်မျိုး ပြောဟို့ မှဟု။[†]

၃ နန်းနို့တွပ် နေရာဟို့ သွားပြင်ဆင်ဘီးန ငါပုလန်လာဘီး ငါရှိဟူနေရာမာ နန်းနို့ရှိနေဟို့တွပ် နန်းနို့ဟို့ ငါနားဟို့ ခေါ်ဆောန်မယ်။

၄ ငါသွားမယ့်နေရာဟို့ ရှေး-ကံနိုင်ဟူလမ်းဟို့ နန်းနို့သိဂေ့ဟယ်” ဆိုဘီး မိန့်တော်မူလေဟယ်။

၅ သောမဟာ ကိုယ်တော့်ဟို့ “သခင်၊ ကိုယ်တော်ဟာ ဖယ်နေရာဟို့ သွားမယ် ဆိုဇာ ကျွန်တော့်ဟားလေ သိဂေ့ဟု။ အယ်ဆိုဟာ ကျွန်တော့်ဟားလေဟု အယ်နေရာဟို့ ရှေး-ကံနိုင်မယ့်လမ်းဟို့ ဖယ်မျိုး သိနိုင်ဟို့နူး” ဆိုဘီး မေးလျှော့-ကံလေဟယ်။

၆ ယေရှုဟာ သူ့ဟို့ “ငါဟာ လမ်း၊ သမ္မာတရားန သတ်ဖြစ်ဟယ်။ ငါအားဖြင့် မှဟု ဆိုဟာ ဖယ်လူလည်း ဖနားဟို့ သွားနိုင်ဂေ့ဟု။

၇ ခု နန်းနို့ဟာ ငါ့ဟို့ သိဟားဘီ။ အယ်ဆိုဟာ နန်းနို့လေဟာ[‡] ငါ့ဖဟို့လည်း သိဂေ့လေ့မယ်။ ခုဟုစဘီး နန်းနို့ဟာ

[†] **14:2 ၁၄.၂** ငါ့ဖရဲ့ အိတော်မာ ခန်းလေ ဘောင်ဂီးရှိဟယ်။ နန်းနို့တွပ် နေရာဟို့ ပြင်ဆင်ဟို့တွပ် ငါသွားရမယ်။ ခန်းလေမေ့ဟု ဆိုဟာ နန်းနို့ဟို့ အယ်မျိုး ပြောဟို့ မှဟု။ အယ်မျိုးမှဘဲနေဟာ ငါ့ဖရဲ့ အိတော်မာ ခန်းလေဘောင်ဂီးရှိဟယ်။ အယ်နေရာမာ ခန်းလေမေ့ဟု ဆိုဟာ နန်းနို့တွပ် နေရာဟို့ ပြင်ဆင်ဟို့ ငါသွားရမယ် ဆိုဘီး ပြောနေရအူးလော။ [‡] **14:7**

၁၄.၇ ခု နန်းနို့ဟာ ငါ့ဟို့ သိဟားဘီ။ တချို့ မူရင်းလတ်ရေးမူလေမာ နန်းနို့ဟာ ငါ့ဟို့ သိဟားဘီး ဆိုဟာ ငါ့ဖဟို့လည်း နန်းနို့သိရလေ့မယ်။ ဆိုဘီး ပါရှိဟယ်။

ဖဟို သိမြင်ဂေဘီ” ဆိုဘီး မိန့်တော်မူလေဟယ်။

⁸ ဖိလိပ္ပဟ ကိုယ်တော့်ဟို “သခင်၊ ဖဟို ကျွန်တော့် ဟားလေဟို ပြတော်မူပါ။ အယ်မူဇာဟို ကျွန်တော့်ဟား လေ အားလောင်း လိုရှင်ဂေဟယ်” ဆိုဘီး လျှော့-က်လေ ဟယ်။

⁹ ယေရှုဟ “ဖိလိပ္ပ၊ ငါဟာ နန်းနို့လေ ဂူလောင်းနတူး ဒု ခိကြာဂီး ရှိနေဟိုမှ ငါ့ဟို သိဂေသေးဟလော။ ငါ့ဟို မြင်ဟူလူဟာ ငါ့ဖဟို မြင်ရဟယ်။ အယ်ဆိုဟာ ‘ဖဟို ကျွန်တော့်ဟားလေဟို ပြပါ’ ဆိုဘီး ဖြားဖြစ်ကြောန့် နန်းနို့ ပြောနေရနူး။

¹⁰ ဖိလိပ္ပ၊ ငါဟာ ဖထဲမာရှိဘီး ဖဟုလည်း ငါထဲမာရှိဟယ် ဆိုဇာဟို နန်ယောင်ကြည်ဟလော။ နန်းနို့ဟို ငါပြောနေဟူ စကားလေဟာ ငါထဲဟုနေ ထွပ်လာဇာ မူဟူ။ ငါထဲမာရှိနေဟူ ဖကိုယ်တိုင်ဟု သူရဲ့ မူဟို ပြုတော်မူဟယ်။

¹¹ ငါဟာ ဖထဲမာ ရှိနေဘီး ဖဟုလည်း ငါထဲမာ ရှိနေဟယ် ဆိုဘီး ပြောနေဟူ ခီမာ ငါ့ဟို ယောင်ကြည်ဂေ။ ယောင်ကြည်ဘဲဟု ဆိုဟာ ငါလောက်နေဇာလေဟို ယောင်ကြည်ဂေ။

¹² နန်းနို့ဟို ငါ မှန်တိုင်းပြောမယ်၊ ငါ့ဟို ယောင်ကြည်ဟူ လူဟာ ငါလောက်ဇာလေဟို လောက်လေ့မယ်။ အယ်ထတ်ကီးဟူ ဇာလေဟိုလည်း လောက်လေ့မယ်။ ဖြားဖြစ်ကြောန့်နူးဆိုဟာ ငါဟာ ဖနားဟို သွားရဟိုတွပ် ဖြစ်ဟယ်။

¹³ ဖရဲ့ ဖောင်းသရေတော်ဟာ သားတော်အားဖြင့် ထန်ရှားဟိုတွပ် ငါနာမန နန်းနို့တောင်းဇာမှန်မျှ ငါလောက်

မယ်။

¹⁴ နန်းနို့ဟာ ငါ့နာမနဲ့ တခုခုဟို့ ငါ့နားမာ် တောင်းမယ် ဆိုဟာ အယ်တိုင်း ငါပြုမယ်။

သန်ရှင်းဟူဝိညာဉ်တော်ဟို့ ပေးဟို့တွပ် ဂဒိတော်ကြော
နိုး

¹⁵ “နန်းနို့ဟာ ငါ့ဟို့ ရှစ်ဟယ် ဆိုဟာ ငါ့ပညတ်တော် လေဟို့ လိုက်နာဂေ့လေ့မယ်။

¹⁶ ငါဟာ ဖဟို့ တောင်းလေ့ဉာ-က် လိုက်ဟူကြောန့် နန်းနို့ နတူးဒု ထာဝရနေထိုင်ဟူ ကူညီမဇသူ တပါးဟို့ ပေးတော် မူလေ့မယ်။

¹⁷ သူဟာ ဘုရားသခင်နဆိုင်ဟူ သမ္မာတရားဟို့ ဖွမ်ပြ ပေးဟူ ဝိညာဉ်တော်ဖြစ်ဟယ်။ အယ်လောကဟာ အယ် ဝိညာဉ်တော်ဟို့ မြင်ဂေ့ဟု။ သိဂေ့ဘဲဟူကြောန့် အယ် ဝိညာဉ်တော်ဟို့ လတ်ခံဂေ့ဟု။ အယ်ဘေမဲ့ နန်းနို့ဟာ အယ်ဝိညာဉ်တော်ဟို့ သိဂေ့ဟယ်။ ဖြားဖြစ်ကြောန့်နူးဆို ဟာ သူဟာ နန်းနို့နတူးဒူး နေတော်မူနေဘီး နန်းနို့ထဲမာ ရှိ နေတော်မူဟယ်။*

¹⁸ “ငါဟာ နန်းနို့ဂူလောင်းဟို့ ခိုကိုးရာမဲ့ ထားရစ်ဇာ မူ ဟု။ ငါဟာ နန်းနို့နားဟို့ ပုလန်လာရအူးမယ်။

¹⁹ ရှစ်ဟား ကြာဘီး ဟာ အယ်လောကဟာ ငါ့ဟို့ နှော-က်တခါ မြင်ရလေ့ဟို့မူဘီ။ အယ်ဘေမဲ့ နန်းနို့ဟာ

§ 14:14 ၁၄.၁၄ တချို့ မူရင်းလတ်ရေးမူလေမာ ငါ့နားမာ၊ ဆိုဇာဟာ မှေ့ဟု။ * 14:17 ၁၄.၁၇ ရှိနေတော်မူဟယ်၊ တချို့ မူရင်းလတ်ရေးမူလေမာ ရှိလေ့မယ်၊ ဆိုဘီး ပါရှိဟယ်။

ငါ့ကို မြင်ရလေ့မယ်။ ငါသတ်ရှင်ဟူကြောင့် နန်းနို့လည်း သတ်ရှင်ရလေ့မယ်။

20 အယ်နေရစ် ရော့-က်လာဟူ ခီမာ ငါဟာ ဖထဲမာ ရှိနေဟယ် ဆိုဇာဟိုရော၊ နန်းနို့ဟာ ငါ့ထဲမာ ရှိနေဟယ် ဆိုဇာဟိုရော၊ ငါဟာ နန်းနို့ထဲမာ ရှိနေဟယ် ဆိုဇာဟိုရော နန်းနို့သိရလေ့မယ်။

21 “ငါ့ပညတ်တော်လေဟို လတ်ခံဘီး လိုက်နာဟူလူလေဟာ ငါ့ကို ရှစ်ဟူလူလေ ဖြစ်ဟယ်။ ငါ့ကို ရှစ်ဟူလူလေဟို ငါ့ဖဟုလည်း ရှစ်တော်မူဟယ်။ ငါဟုလည်း သူးနို့ဟို ရှစ်ဟူကြောင့် ငါကိုယ်တိုင် သူးနို့ဟို ဖွမ့်ပြမယ်” ဆိုဘီး ဖြေတော်မူဟယ်။

22 ယုဒရှုကာရုတ်မူဘဲဟူ ယုဒဟု “သခင်၊ ကျွန်တော့်ဟားလေဟို ကိုယ်တော်ကိုယ်တိုင် ထန်ရှားတော်မူဘီးဟာ လောကသားလေဟို ထန်ရှားပြဘဲဇာဟု ဖယ်မျိုးနူး” ဆိုဘီး မေးလျှော့-က်လေဟယ်။

23 ယေရှုဟာ “ငါ့ကို ရှစ်ဟူလူလေဟာ ငါ့သွန်သန်ဇာလေဟို လိုက်နာလေ့မယ်။ ငါ့ဖဟုလည်း သူးနို့ဟို ရှစ်လေ့မယ်။ ငါ့ဖန ငါဟာ သူးနို့နားဟို ကြွလာဘီး သူးနို့နတူးဒုနေတော်မူမယ်။

24 ငါ့ကို ရှစ်ဘဲဟူ လူလေဟာ ငါ့သွန်သန်ဇာလေဟို လိုက်နာဂေ့ မူဟု။ နန်းနို့ကြားရဟူ သွန်သန်ဇာလေဟာ ငါ့သွန်သန်ဇာလေ မူဟု။ အယ်ဘေမဲ့ ငါ့ကို စေလွှတ်တော်မူဟူ ဖရဲ့ သွန်သန်ဇာလေဘဲ ဖြစ်ဟယ်။”

25 “နန်းနို့တူးဒု ရှိနေဒူးမာ အယ်မူဇာဟို ငါပြောဟူးဟယ်။

26 ဖဟာ ငါနာမကြောန့် စေလွှတ်ပေးမယ့် ကူညီမဇသူ ဖြစ်ဟူ သန်ရှင်းဟူဝိညာဉ်တော်ဟာ နန်းနို့ဟို ဂူလောင်းဟို သွန်သန်ပေးဘီးဟာ ငါပြောဟူးဇာလေ ဂူလောင်းဟို မှတ်မိလာအောန် လောက်ပေးလေ့မယ်။”

27 “ငြိသတ်မူဟို နန်းနို့တူးဒု ငါထားဟူးဘီ။ ငါငြိသတ်မူဟိုလည်း နန်းနို့ဟို ငါပေးဟူးဟယ်။ လောကသားလေဟို ပေးဟူးမျိုး ငါပေးဟူးဇာ မူဟု။ နန်းနို့လေစိုးရိမ်ပူဘန်ဂေန။ ကြော့-က်ဂေန။

28 ‘ငါ သွားလိုက်ဘေမဲ့ နန်းနို့နားဟို ပုလန်လာအူးမယ်’ ဆိုဘီး ငါပြောဟူးဇာဟို နန်းနို့ကြားဟူးပီးဘီ။ နန်းနို့ဟာ ငါ့ဟို ရှစ်ဟယ် ဆိုဟာ ဖနားဟို ငါသွားဟူကြောန့် နန်းနို့ဝန်းသာရလေ့မယ်။ ဖြားဖြစ်ကြောန်ဆိုဟာ ဖဟာ ငါထတ်ကီးမြတ်တော်မူဟယ်။

29 အယ်မူဇာလေဖြစ်လာဟူ ခီမာ နန်းနို့ ယောင်ကြည်ဂေဟိုတွပ် အယ်မူဇာလေအားလောင်း ဖြစ်ခန်ဂဒဲဟု နန်းနို့ဟို ခု ငါပြောဟူးဟယ်။

30 ငါဟာ နန်းနို့ဟို ဘောင်ဂီးပြောနိုင်ဟိုမူဘီ။ ဖြားဖြစ်ကြောန့်နူးဆိုဟာ အယ်လောကဟို အောက်ချောက်မားဟာ လာနေဘီ။ သူဟာ ငါထတ်မာ ဖြားခွမ့်အာဏာလည်း မှေဟု။

31 အယ်ဘေမဲ့ ငါဟာ ဖဟို ရှစ်ဟယ် ဆိုဇာဟို အယ်

လောကဟို့ သိစေဟို့တွပ် ဖပညတ်ဟူးတိုင်း ငါလောက်
ဟယ်။”

“လာဂေ။ အယ်နေရာဟုနေ နို့လေသွားဂေဇို” ဆိုဘီး သူ
ဟို့ မိန့်တော်မူလေဟယ်။

15

စပျစ်နွယ်ဗန်စစ်စစ်ဖြစ်ဟူ ယေရှုကြောင်း

¹ “ငါဟာ စစ်မှန်ဟူ စပျစ်နွယ်ဗန် ဖြစ်ဟယ်။ ငါ့ဖဟာ
ဥယျာဉ်မှူးဖြစ်ဟယ်။

² ငါ့ထဲမာ သီးသီးဘဲဟူ ခတ်လေဟို့ ဖဟာ ခွတ်ပစ်
မယ်။ သီးသီးဟူ ခတ်လေဟို့လည်း ပိုဘီး သီးစေဟို့တွပ်
ရှင်းလန်းလေ့မယ်။

³ ငါဟောပြောဟူ တရားစကားအားဖြင့် ခု နန်းနို့ဟာ
သန်ရှင်းဟူးဘီ။

⁴ ငါ့နှိုက် ရှိနေဂေ။ အယ်ဆိုဟာ ငါဟုလည်း နန်းနို့ထဲ
မာ ရှိနေလေ့မယ်။ ခတ်ဟာ သူ့ကိုယ်သူ သီးသီးနိုင်ဟူ။ စ
ပျစ်နွယ်ဗန်မာရှိနေမယ် ဆိုဟာ အယ်ခတ်ဟာ သီးသီးနိုင်
ဟယ်။ အယ်မျိုးဘဲ နန်းနို့ဟာ ငါ့နှိုက်မေ့ဟု ဆိုဟာ သီး
သီးနိုင်ဂေဟူ။”

⁵ “ငါဟာ စပျစ်နွယ်ဗန်ဖြစ်ဟယ်။ နန်းနို့ဟာ ခတ်လေ
ဖြစ်ဟယ်။ ငါ့နှိုက် နန်းနို့ရှိနေဘီး နန်းနို့နှိုက် ငါ့ရှိနေ
မယ် ဆိုဟာ နန်းနို့လေဟာ သီးလေဘောင်ဂီး သီးဂေလေ့
မယ်။ နန်းနို့ဟာ ငါ့နှိုက်မေ့ဟု ဆိုဟာ နန်းနို့ ပြားဇာလည်း
လောက်နိုင်ဂေ မူဟူ။

6 ငါ့နှိုက် မေ့ဘဲဟူ လူလေဟာ ပုလန်ဟို ပစ်လိုက်ဟူ သစ်ခတ်ခြွေ-က်မျိုးဘဲ ဖြစ်ဟယ်။ အယ်ခတ်ခြွေ-က် လေဟို စုသီးဘီးဟာ မီးထဲဟို ပစ်ခုလလိုက်ဟူကြောန် လောန်ကျွမ်းဟားဂေ့ဟယ်။

7 နန်းနို့ဟာ ငါ့နှိုက်ရှိနေဘီး ငါ့စကားတော်လေဟာ လည်း နန်းနို့နှိုက်ရှိနေမယ် ဆိုဟာ နန်းနို့ တောင်းဇာဂူလော င်းဟို ရလေ့မယ်။

8 နန်းနို့ဟာ သီးလေဘောင်ဂီးဟို သီးဟူအားဖြင့် ငါ့ဖရဲ့ ဖောင်းသရေတော်ဟို ထန်ရှားစေဘီး အယ်နည်းလမ်း အားဖြင့် ငါ့တပွဲတော်လေ ဖြစ်လာဂေ့ဟယ်။

9 ဖဟာ ငါ့ဟို ရှစ်မျိုးဘဲ နန်းနို့ဟိုလည်း ငါ့ရှစ်ဟယ်။ အယ်ကြောန် ငါ့ရဲ့မြစ်တာထဲမာရှိဂေ့ပါ။

10 ငါဟာ ဖရဲ့ ပညတ်တော်လေဟို လိုက်နာဘီး ဖရဲ့ မြစ်တာထဲမာရှိနေမျိုးဘဲ နန်းနို့ဟာလည်း ငါ့ရဲ့ ပညတ်တော် လေဟို လိုက်နာမယ် ဆိုဟာ ငါ့ရဲ့ မြစ်တာထဲမာ ရှိလေ့မယ်။”

11 “နန်းနို့ထဲမာ ငါ့ရဲ့ ဝန်းသာမှုလေ ရှိနေဘီး နန်းနို့ရဲ့ ဝန်းသာမှုလေ ပုလဲဇောင်လာဟိုတွပ် အယ်မူဇာဟို နန်းနို့ ဟို ငါ့ပြောဟယ်။

12 ငါ့ပညတ်ဟာ နန်းနို့ဟို ငါ့ရှစ်မျိုးဘဲ နန်းနို့ရှင်းရှင်း ရှစ်ဂေ့။

13 မိမိရဲ့ မိဆွေလေတွပ် နန်းနို့ရဲ့ သတ်ဟို ပေးလိုက်ဇာ

ဟာ ကီးမားဆောင်းဟူ မြစ်တာဖြစ်ဟယ်။

¹⁴ နန်းနို့ဟာ ငါ့ပညတ်ဟူးဇာလေဟို့ လောက်မယ် ဆို
ဟာ နန်းနို့ဟာ ငါ့ရဲ့မိဆွေလေဖြစ်ဟယ်။

¹⁵ ငါဟာ နန်းနို့ဟို့ စေခံ ဆိုဘီး ခေါ်ဟို့မူဘီ။ ဖြားဖြစ်
ကြောန့်နူးဆိုဟာ စေခံဟာ သူးနို့သခင် လောက်ဇာလေဟို့
သိရဂေဟူ။ ငါ့ဖနားဟုနေ ကြားဟူးဇာလေ ဂူလောင်းဟို့
နန်းနို့ဟို့ ငါ့ပြောပြနေဟူကြောန့် နန်းနို့ဟို့ မိဆွေလေ ဆို
ဘီး ငါခေါ်ဟယ်။

¹⁶ နန်းနို့ဟာ ငါ့ဟို့ ဝီးကော့-က်ဟူးဇာ မူဟူ။ သွားဘီး
ဟာ တည်မြဲဟူသီးလေ ဘောင်ဂီးသီးဟို့တွပ် နန်းနို့ဟို့ ဝီး
ကော့-က်ဘီး ခန့်အပ်ဟူးဟယ်။ အယ်ကြောန့် ငါ့နာမ
အားဖြင့် နန်းနို့တောန်းဇာလေ ဂူလောင်းဟို့ ဖဟု ပေးတော်
မူလေ့မယ်။

¹⁷ အယ်ကြောန့်ဘဲ နန်းနို့ရှင်းရှင်း ရှစ်ဂေ ဆိုဘီး ငါပည
တ်ဟူးဟယ်။”

လောကသားလေရဲ့ မူးတီးမှုကြောန်း

¹⁸ “လောကသားလေဟာ နန်းနို့ဟို့ မူးတီးဂေမယ် ဆို
ဟာ နန်းနို့ဟို့ မူးတီးခန်မာ ငါ့ဟို့ ရင်ဦးဆောင်း မူးတီးဂေ
ဟယ် ဆိုဇာဟို့ သိမှတ်ဂေ။

¹⁹ နန်း နို့ ဟာ အယ် လောက န ဆိုင် မယ် ဆို ဟာ
လောကသားလေဟာ သူးနို့နဆိုင်ဟူ နန်းနို့ဟို့ ရှစ်လေ့
မယ်။ အယ်ဘေမဲ့ ငါဟာ နန်းနို့ဟို့ အယ်လောကထဲဟုနေ
ဝီးကော့-က်ဟူးဟူကြောန့် နန်းနို့ဟာ အယ်လောကနဆို

င်ဟု။ အယ်ကြောန့် လောကသားလေဟာ နန်းနို့ဟို မူးတီး
ဂေဟယ်။

20 ‘ကျွန်လေဟာ သူးနို့သခင်ထတ် ကီးမြတ်ဟု’ ဆိုဘီး
နန်းနို့ဟို ငါပြောဟားဇာလေဟို မှတ်ဟားဂေ။ လူလေဟာ
ငါ့ဟို ညှဉ်းဆဲဂေမယ် ဆိုဟာ နန်းနို့ဟိုလည်း ညှဉ်းဆဲဂေ
လေမယ်။ သူးနို့ဟာ ငါ့ရဲ့သွန်သန်ချစ်ဟို လိုက်နာမယ် ဆို
ဟာ နန်းနို့သွန်သန်ချစ်ဟိုလည်း လိုက်နာဂေလေမယ်။

21 အယ်ဘေမဲ့ သူးနို့ဟာ ငါ့ဟို စေလွှတ်ဟူသူဟို သိဘဲ
ဟူတွပ် ငါ့နာမကြောန့် နန်းနို့ဟို ညှဉ်းဆဲဂေလေမယ်။

22 ငါဟာ လာဘီး သူးနို့ဟို ပြောဟုဆိုဟာ သူးနို့မာ ပြစ်
မေ့ဟု။ အယ်ဘေမဲ့ ခု သူးနို့ဟာ သူးနို့ရဲ့ ပြစ်တွပ် ကြော
န့်ပြဇာမေ့ဘိ။

23 ဖယ်လူဘဲဖြစ်ဖြစ် ငါ့ဟို မူးတီးမယ် ဆိုဟာ ငါ့ဖဟို
လည်း မူးတီးလေဟယ်။

24 ငါဟာ တခြားလူလေ လောက်ဖူးဘဲဟူဇာလေဟို သူး
နို့ရှေ့မာ ပြုလောက်ဟု ဆိုဟာ သူးနို့မာ ပြစ်ရှိလေမယ် မူ
ဟု။ ခုဆိုဟာ ငါပြုလောက်ဇာလေဟို သူးနို့မြင်ဟားဘီး
ဟူကြောန့် ငါ့ ငါ့ဖဟို မူးတီးဂေဘိ။

25 အယ်မျိုး ဖြစ်လာရဇာဟု သူးနို့ရဲ့ ပညတ်တော်မာ
‘သူးနို့ဟာ ကြောန့်ပြချစ်မေ့ဘဲန ငါ့ဟို မူးတီးဂေဟယ်’”
ဆိုဘီး ရေးဟားဇာဟာ ပုလဲဇောင်စေဟိုဖြစ်ဟယ်။

26 “ဖနားဟုနေ ကြွလာတော်မူဘီး ဘုရားသခင်န ဆို

င်ဟူ သမ္မာတရားဟို့ ဖွမ်ပြပေးဟို့တွပ် ကူညီမဇသူဖြစ်
ဟူ သန်ရှင်းဟူဝိညာဉ်တော် ကြွလာလေ့မယ်။ ငါ့ဖနားဟု
နေ နန်းနို့နားဟို့ သူဟို့ ငါစေလွှတ်ပေးလိုက်ဘီး သူဟာ ငါ့
ကြောန်းဟို့ သတ်သေခံလေ့မယ်။

²⁷ နန်းနို့လည်းဘဲ ရင်ဂဒဲဟု ငါနတူးဒူရှိနေဟူကြောန့် ငါ့
ကြောန်းဟို့ သတ်သေခံလေ့မယ်။”

16

¹ “နန်းနို့ရဲ့ ယောင်ကြည်ရှင်း ပျစ်ပြားဘဲဟို့တွပ် အယ်
မူကြောန်းဟို့ ငါပြောဟားဟယ်။

² နန်းနို့ဟို့ ဝါလယ်ဇရပ်ဟုနေ နှန်ထုဂေ့လေ့မယ်။ နန်း
နို့ဟို့ သတ်ဟူလူလေဟု ဘုရားသခင်ဟို့ ဝတ်ပြုဟယ် ဆို
ဘီး ထန်မှတ်ဟူ ခီကုလရော့-က်လာလေ့မယ်။

³ လူလေဟာ ငါ့ဟို့လည်း သိဂေ့ဟု။ ဖဟို့လည်း သိ
ဂေ့ဘဲဟူကြောန့် နန်းနို့ဟို့ အယ်မူဇာလေဟို့ လောက်လေ့
မယ်။

⁴ အယ်ခီ ရော့-က်လာဟူ ခီမာ နန်းနို့ဟို့ ငါပြောဟားဘီး
ဇာဟို့ နန်းနို့ပုလန်ဘီး အော့-က်မေ့စေဟို့တွပ် ခု ငါပြော
နေဟယ်။”

သန်ရှင်းဟူဝိညာဉ်တော်ရဲ့ လောက်ဆောန်မူကြောန်း

“ငါဟာ နန်းနို့နတူးဒူ ရှိနေဟူကြောန့် နန်းနို့ဟို့ အယ်မူဇာ
လေဟို့ ရင်းရင်ဒူးဟု ငါပြောဟု။

⁵ ခု ငါ့ကို စေလွှတ်သူနားကို ငါသွားဝေါ့မယ်။ အယ်ဘေမဲ့ ဖယ်နေရာကို သွားတို့နဲ့ ဆိုဘီး နန်းနို့ထဲဟု ယော့-က်လည်း ငါ့ကို မေးဂေဟမ်းမား။

⁶ ခု နန်းနို့ကို အယ်မျိုး ပြောလိုက်ဟူကြောန့် နန်းနို့ရဲ့ စိနှလောင်းထဲမှာ ရရာတိုင်း ဝန်းနဲနေဂေဟယ်။

⁷ နန်းနို့ကို ငါ မှန်တိုင်းပြောမယ်။ ငါသွားလိုက်ဇာဟာ နန်းနို့တွပ် ပိုဘီး ကောင်းဟယ်။ ဖြားဖြစ်ကြောနဲ့ဆိုဟာ ငါသွားဟု ဆိုဟာ ကူညီမဇသူဟာ နန်းနို့နားကို ရော့-က်လာတို့ မှဟု။ အယ်ဘေမဲ့ ငါသွားလိုက်မယ် ဆိုဟာ အယ်သူတို့ နန်းနို့နားကို ငါစေလွှတ်မယ်။

⁸ ကူညီမဇသူ ရော့-က်လာဟူ ခီမာ လောကသားလေတို့ ပြစ်ကြောန်းတို့ရော၊ ဖြောန့်မတ်ကြောန်းတို့ရော၊ တရားစီရင်ကြောန်းလေတို့ရော ဖော်ပြပေးလေ့မယ်။

⁹ သူးနို့ဟာ ငါ့ကို ယောင်ကြည်ဂေဘဲဟူကြောန့် သူးနို့ရဲ့ ပြစ်တို့ ဖော်ပြမယ်။

¹⁰ ငါဟာ ဖနားကို သွားရမယ်ဖြစ်ကြောန့် နန်းနို့ဟာ ငါ့တို့ ဗြင်ရဟိုမှဘီ။ အယ်ကြောန့် နန်းနို့တို့ ဖြောန့်မတ်ကြောန်းတို့ ဖော်ပြမယ်။

¹¹ အယ်လောကတို့ အောက်ချောက်မားဟာ တရားစီရင်ဇာတို့ ခံရဘီဖြစ်ဟူကြောန့် သူးနို့တို့ တရားစီရင်တော်မူကြောန်းတို့ ဖော်ပြမယ်။”

¹² “နန်းနို့တို့ ပြောပြဟို့ဇာလေ ဘောင်ဂီးရှိဘေမဲ့ ခု နန်းနို့ခံယူနိုင်ဂေ မှဟု။

13 အယ်ကြောန့် ဘုရားသခင်ကြောန်းနဆိုင်ဟူ သမ္မာတရားဟို့ လမ်းပြပေးမယ့် ဝိညာဉ်တော် ကြွလာဟူ ခီမာနန်းနို့ဟို့ သမ္မာတရား ဂူလောင်းဟို့ ဖွမ်ပြတော်မူလေ့မယ်။ အယ်ဝိညာဉ်တော်ဟာ သူ့ဆန္ဒတိုင်း ပြောနေဇာမူဘဲ သူကြားရဇာလေဟို့ ပြောပြဘီးဟာ ဖြစ်လာဟို့ ဇာလေဟို့ လည်း ပြောပြလေ့မယ်။

14 သူဟာ ငါပြောနေဇာလေဟို့ဘဲ နန်းနို့ဟို့ ပြောပြပေးနေဟူကြောန့် ငါ့ဖောင်းသရေတော်ဟို့ ထန်ရှားစေလေ့မယ်။

15 ငါ့ဖမာ ရှိဇာလေ ဂူလောင်းဟာ ငါ့ဇာလေဖြစ်ဟယ်။ အယ်ကြောန့် ဝိညာဉ်တော်ဟာ ငါပြောဟူးဟူ စကားလေဟို့ နန်းနို့ဟို့ ပြောပြလေ့မယ်။”

ဝန်းနဲဇာန ဝန်းသာဇာ

16 “ခီနဲနဲကြာဘီးဟာ နန်းနို့ဟာ နော-က်ထပ် ငါ့ဟို့ တွံရလေ့ဟို့မူဘီ။ အယ်ဘီးန ခီနဲနဲကြာဘီးဟာ နန်းနို့ဟာ ငါ့ဟို့ ပုလန်တွံရလေ့မယ်။”

17 တဗွဲတော်တချို့ဟာ “ခီနဲနဲကြာဘီးဟာ နို့လေဟာ ကိုယ်တော့်ဟို့ တွံရဟို့မူဘီ။ အယ်ဘီးန ခီနဲနဲကြာဘီးဟာ နို့လေဟာ ကိုယ်တော့်ဟို့ ပုလန်တွံရလေ့မယ်။ ‘ဖြားဖြစ်ကြောန့်နူးဆိုဟာ ငါဟာ ဖနားဟို့ သွားရအူးမယ်’ ဆိုဘီး နို့လေဟို့ မိန့်တော်မူနေဇာဟု ဖြားခိပါယ်နူး ဆိုဘီး သူးနို့ရှင်းရှင်း မေးနေဂေဟယ်။

18 အယ်ဆိုဟာ ‘ခိနဲနဲကြာဘီးဟာ’ ဆိုဇာဟု ပြားမိပါယ် နူး။ ကိုယ်တော် မိန့်တော်မူနေဇာလေဟို နို့လေလည်း နား လည်ဂေဟု!”

19 သူးနို့လေဟာ ကိုယ်တော်ဟို မေးလျော့-က်ရှင်ဂေ ဟယ် ဆိုဇာဟို ယေရှုဟု သိနေတော်မူဟူကြောန့် “‘ခိနဲနဲ ကြာဘီးဟာ နန်းနို့ဟာ ငါ့ဟို တို့ဟို မဟု။ အယ်ဘီးန ခိ နဲနဲကြာဘီးဟာ နန်းနို့ဟာ ငါ့ဟို ပုလန်တို့ရလေ့မယ်’ ဆို ဘီး ငါပြောဟူးဟယ်။ အယ်မူကြောန်းဟို နန်းနို့ရှင်းရှင်း မေးမြန်းနေဂေဟယ်လော။

20 နန်းနို့ဟို ငါ မှန်တိုင်းပြောမယ်၊ နန်းနို့ဟာ ငိုကြွေးရ ဂေလေ့မယ်။ အယ်ဘေမဲ့ အယ်လောကဟာ ဝန်းသာဂေ လေ့မယ်။ နန်းနို့ဟာ ဝန်းနဲရဂေဘေမဲ့ နန်းနို့ရဲ့ ဝန်းနဲမူဟာ ဝန်းသာမူဟို ပုလောန်းလဲဟူးလေ့မယ်။

21 မီးမတယော့-က်ဟာ သားမီးခါနီးမာ မီးဟိုခီ ရော့-က် လာဟူကြောန့် ဝန်းနဲမူရှိဟယ်။ အယ်ဘေမဲ့ သားမီးဘီးဟူ ခီမာ အယ်လောကမာ သားဂန်းတယော့-က် မီးဟူးပီးဘီ တွပ် ဝန်းသာဟူးဟူကြောန့် ဝေဒနာဟို မေ့ဟူးလေဟု ယ်။

22 ခု နန်းနို့ဟာ ဝန်းနဲနေဂေဟယ်။ အယ်ဘေမဲ့ ငါဟာ နန်းနို့န ပုလန်တို့ရမယ် ဖြစ်ဟူကြောန့် နန်းနို့ရဲ့ စိန်လော င်းဟာ ဝန်းသာဂေလေ့မယ်။ အယ်ဝန်းသာမူဟို ဖယ်သူ လည်း နန်းနို့နားဟုနေ လုယူနိုင်ဂေဟု။”

23 “အယ်မူနေရော့-က်လာခီမာ နန်းနို့ဟာ ငါ့ဟို ပြားဇာ

လည်း မေးဂေလေမယ် မူဟူ။ နန်းနို့ဟို ငါ မှန်တိုင်းပြော
မယ်၊ နန်းနို့ဟာ ငါ့နာမအားဖြင့် တောင်းဇာဂူလောင်းဟို
ဖဟု ပေးတော်မူလေမယ်။*

²⁴ ခုထိ ငါ့နာမအားဖြင့် နန်းနို့ဟာ ဖြားဇာလည်း တော
န်းဂေသေးဟူ။ နန်းနို့ရဲ့ ဝန်းသာဇာန ပုလဲဝဟိုတွပ် တော
န်းဂေ။ တောင်းမယ် ဆိုဟာ ရဂေလေမယ်။

လောကဟို အောက်တော်မူဟူကြောင်း

²⁵ “အယ်မူဇာလေဟို ပေါင်ဥပမာသောင်းပြုဘီး နန်းနို့
ဟို ငါပြောဟားဟယ်။ အယ်ဘေမဲ့ ပေါင်ဥပမာဟို သောင်း
ပြုဘဲန ဖရဲ့ ကြောင်းဟို ပွမ့်ပွမ့်လန်းလန်းဟား ပြောရဟို
ခီရော-က်လာလေမယ်။

²⁶ အယ်မူနေ ရော-က်လာဟူ ခီမာ နန်းနို့ဟာ ငါ့နာမ
အားဖြင့် တောင်းလျှော့-က်ရလေမယ်။ နန်းနို့တွပ် ဖနား
ဟုနေ ငါဟု တောင်းလျှော့-က်ပေးမယ် ဆိုဘီး ပြောနေဇာ
မူဟူ။

²⁷ ဖြားဖြစ်ကြောန့်နူးဆိုဟာ ဖကိုယ်တိုင်ဟု နန်းနို့ဟို ရှစ်
တော်မူဟယ်။ ငါဟာ ဖနားဟုနေ ကြွလာဟယ် ဆိုဇာဟို
နန်းနို့ယောင်ကြည်ဟူကြောန့် ဖဟာ နန်းနို့ဟို ရှစ်တော်မူဟ
ယ်။

* 16:23 ၁၆.၂၃ နန်းနို့ဟာ ငါ့နာမအားဖြင့် တောင်းဇာဂူလောင်းဟို
ဖဟု ပေးတော်မူလေမယ်၊ တချို့ မူရင်းလတ်ရေးမူလေမာ နန်းနို့ဟာ
ငါ့နာမအားဖြင့် တောင်းမယ် ဆိုဟာ ဖဟု ပေးလေမယ်၊ ဆိုဘီး ပါရှိဟယ်။

28 ငါဟာ ဖနားဟုနေ ထွပ်လာဘီး အယ်လောကထဲဟို ကြွလာဟယ်။ ခု ငါဟာ အယ်လောကဟုနေ ထွပ်ဟားဘီး ဟာ ဖနားဟို သွားအူးမယ်” ဆိုဘီး မိန့်တော်မူလေဟယ်။

29 အယ်ဘီးန တမဲ့တော်လေဟာ ကိုယ်တော့်ဟို “ခု ကိုယ်တော်ဟာ ပေါင်ဥပမာဟို သောင်းပြုဘဲန ပွမ့်ပွမ့် လန်းလန်းဟား ဟောပြောတော်မူဟယ်။

30 ကိုယ်တော်ဟာ ဂူလောင်းဟို သိတော်မူဘီး ဖယ်လူ လည်း ကိုယ်တော့်ဟို မေးလျှော့-က်ဟိုလိုအပ်ဟာ ဆိုဇာ ဟို ခု ကျွန်တော့်ဟားလေ သိရဂေဘီ။ အယ်ကြောန့် ကိုယ် တော်ဟာ ဘုရားသခင်နားဟုနေ ကြွလာတော်မူဟယ် ဆို ဇာဟို ကျွန်တော့်ဟားလေ ယောင်ကြည်ပါဟယ်” ဆိုဘီး လျှော့-က်ဂေဟယ်။

31 ယေရှုဟာ သူးနို့ဟို “ခု နန်းနို့ဟာ ယောင်ကြည်ဂေဘဲ လော။

32 နန်းနို့ဟာ ဖုလဲဖုလဲစင်ဖြစ်ဟားဘီး နန်းနို့အီဟို ပုလ န်ဟားဂေဟူ ခီမာ ငါ့ဟို တယော့-က်ဒဲ ထားရစ်ဟို ခီဟာ လည်း ခုဘဲ ရော့-က်နေဘီ။ အယ်ဘောမဲ့ ဖဟာ ငါ့တူးဒူ ရှိနေတော်မူဟူကြောန့် ငါဟာ တယော့-က်ဒဲ မူဟာ။

33 နန်းနို့ဟာ ငါ့အားဖြင့် ငြိသတ်မူရှိဟိုတွပ် အယ်စ ကားဟို ငါပြောပီးဘီ။ နန်းနို့ဟာ အယ်လောကမာ ဆင်းရဲ ဒေါက်ခ ခံရဂေလေမယ်။ အယ်ဘောမဲ့ ကြော့-က်ဂေနု! ငါ ဟာ လောကဟို အောန်ဟားပီးဘီ!” ဆိုဘီး မိန့်တော်မူလေ ဟယ်။

17

ယေရှုဟာ တမဲ့တော်လေတွပ် ဆုတောင်းပေးဟူကြော
 န်း

¹ ယေရှုဟာ အယ်မျိုး မိန့်တော်မူဘီးန ကောင်းဂန်ဟို့
 မော့ကော့ဘီးဟာ “ဖ၊ ခီရော့-က်ဟားဘီ။ သားတော်ဟာ ဖ
 ရဲ့ ဖောင်းသရေတော်ဟို့ ထန်ရှားစေဟို့တွပ် သားတော်ရဲ့
 ဖောင်းသရေတော်ဟို့ ထန်ရှားစေတော်မူပါ။

² ဖဟာ သားတော်ဟို့ လူလေ ဂူလောင်းဟို့ အောက်
 စိုးရဟူ ခွမ့်အာဏာဟို့ ပေးတော်မူဟယ်။ အယ်ကြောန်
 သားတော်ဟာ ဖဟုနေ ပေးဟားဟူ လူလေ ဂူလောင်းဟို့
 ထာဝရသတ် ပေးနိုင်ဟယ်။

³ ထာဝရသတ် ဆိုဇာဟာ စစ်မှန်ဟူ ဘုရားသခင် တဆူ
 ဒဲရှိဟယ် ဆိုဇာန စေလွှတ်တော်မူဟူ ယေရှုခရစ်တော်ဟို့
 သိဟို့ဖြစ်ဟယ်။

⁴ ကိုယ်တော် အပ်ပေးတော်မူဟူ မှတော်ဟို့ ကျွန်တော်
 ဟာ ဆောန်ရွက်ပီးဟားဘီ ဖြစ်ဟူကြောန် ကိုယ်တော်ရဲ့
 ဖောင်းသရေတော်ဟို့ မှလေဂီးထတ်မာ ထန်ရှားစေဘီ။

⁵ ဖ၊ အယ်လောကဟို့ ဖန်ဆင်းခန်ဂဒဲဟာ ကိုယ်တော်န
 တူးဒူ ကျွန်တော်ခံစားရဟူ ဖောင်းသရေတော်ဟို့ ခု ကိုယ်
 တော့်ရှေ့တော်မာ ကျွန်တော့်ဟို့ ပေးတော်မူပါ။

⁶ “အယ်လောကထဲဟုနေ ဝီးကော့-က်ဘီး ကျွန်တော့်
 ဟို့ အပ်ပေးတော်မူဟူ လူလေဟို့ ကိုယ်တော်ရဲ့ နာမဟို့
 ထန်ရှားစေပီးဘီ။ သူးနို့ဟို့ ကိုယ်တော်ဟာ ပိုင်တော်မူဘီး

ကျွန်တော့်ကို အပ်ပေးတော်မူဘိ။ သူးနို့ဟာ ကိုယ်တော်ရဲ့ စကားတော်ကို လိုက်နာဂေ့ဘိ။

⁷ ကျွန်တော့်ကို ကိုယ်တော်ပေးဟူးဇာလေ ဂူလောင်းဟာ ကိုယ်တော်နားဟ ရရှိလာဟယ် ဆိုဇာကို ခု သူးနို့သိရှိဂေ့ဘိ။

⁸ ကျွန်တော့်ကို ကိုယ်တော် ပေးအပ်တော်မူဟူ စကားတော်ကို ကျွန်တော်ဟာ သူးနို့ကို ပေးဟူ ခီမာ သူးနို့လတ်ခံဂေ့ဟယ်။ ကိုယ်တော်နားဟနေ ကျွန်တော်ကြွလာဟယ် ဆိုဇာကို သူးနို့ဟာ မှန်ဘဲသိဂေ့ဟယ်။ ကျွန်တော့်ကို ကိုယ်တော်စေလွှတ်ဟယ် ဆိုဇာကိုလည်း သူးနို့ဟာ ယောင်ကြည်ဂေ့ဟယ်။

⁹ “သူးနို့တွပ် ကျွန်တော် ဆုတောင်းဟယ်။ ကျွန်တော်ကို ကိုယ်တော် ပေးအပ်တော်မူဟူ လူလေဟာ ကိုယ်တော်ပိုင်တော်မူဟူ လူလေဖြစ်ဟူကြောန့် အယ်လောကတွပ် မှဘဲ သူးနို့တွပ်ဘဲ တောင်းလျှော့-က်ပေးဟယ်။

¹⁰ ကျွန်တော့်မာရှိဟူဇာလေ ဂူလောင်းဟာ ကိုယ်တော်ဇာလေဖြစ်ဘီး ကိုယ်တော်မာ ရှိဟူဇာလေ ဂူလောင်းဟာလည်း ကျွန်တော့်ဇာလေဖြစ်ဟူကြောန့် သူးနို့လေအားဖြင့် ကျွန်တော့်ဖောင်းသရေတော်ကို ထန်ရှားစေဘိ။

¹¹ ကျွန်တော်ဟာ အယ်လောကမာ ခီကြာဂီးရှိဟို့ မူဟူ။ အယ်ဘေမဲ့ သူးနို့ဟာ အယ်လောကမာ ရှိဂေ့ဟယ်။ ခု ကျွန်တော်ဟာ ကိုယ်တော်နားကို လာပါဟယ်။ သန်ရှင်း

တော်မူဟူမ! ကိုယ်တော်န ကျွန်တော်ဟာ တလောင်းတ
ဝဒဲ ဖြစ်မျိုးသဲ ကျွန်တော့်ဟို ပေးအပ်တော်မူဟူ လူလေ
လည်း တလောင်းတဝဒဲ ဖြစ်ဟို့တွပ် သူးနို့ဟို ကိုယ်တော်
ရဲ နာမတော်န တဂိုးတော်အားဖြင့် ကာကွယ်ပေးတော်မူ
ပါ။*

¹² ကျွန်တော်ဟာ သူးနို့နတူးဒုရိုနေဒူးမာ ကိုယ်တော်ပေး
တော်မူဟူ နာမတော်ထဲမာ သူးနို့ဟို ပျစ်စီးမှုဟုနေ စော
န့်ထီးတော်မူဘီ။† ကျွန်တော်ဟာ သူးနို့ဟို ကာကွယ်ပေး
တော်မူဟားဘီ။ ပျစ်စီးရဟို့ လူတယော့-က်ဟုလွဲဘီး သူး
နို့ထဲဟု ဖယ်လူလည်း ပျစ်စီးဂေဟု။ အယ်လူပျစ်စီးဟား
ရဇာဟာ ကျမ်းစာ ပုလဲဇောင်ဟို့ ဖြစ်ဟယ်။

¹³ ခု ကိုယ်တော်နားဟို့ ကျွန်တော်ဟာ လာပါဟယ်။ သူး
နို့ဟာ ကျွန်တော့်ရဲ ဝန်းသာမူဟို သူးနို့ရဲ စိန်လောင်းထဲမာ
ပုလဲဝခံစားရဟို့တွပ် အယ်လောကထဲ ရှိနေဒူးခီမာ အယ်
မူဇာလေဟို့ ကျွန်တော် ပြောပါဟယ်။

¹⁴ ကျွန်တော်ဟာ ကိုယ်တော်ရဲ တရားစကားဟို့ သူးနို့
ဟို့ ပေးဟားပီးဘီ။ ကျွန်တော်ဟာ အယ်လောကနဆိုင်ဘဲ

* **17:11 ၁၇.၁၁** သူးနို့ဟို ကိုယ်တော်ရဲ နာမတော်န တဂိုးတော်အားဖြင့်
ကာကွယ်ပေးတော်မူပါ။ တချို့ မူရင်းလတ်ရေးမူလေမာ ကျွန်တော့်ဟို
အပ်ပေးတော်မူဟူ လူလေဟို့ ကိုယ်တော်နာမတော်ရဲ တဂိုးတော်အားဖြင့်
စောန့်ထီးပေးတော်မူပါ။ ဆိုဘီး ပါရှိဟယ်။ **17:12 ၁၇.၁၂** ယော
၁၇.၁၈ † **17:12 ၁၇.၁၂** ကိုယ်တော်ပေးတော်မူဟူ နာမတော်ထဲမာ
သူးနို့ဟို ပျစ်စီးမှုဟုနေ စောန့်ထီးတော်မူဘီ။ တချို့ မူရင်းလတ်ရေးမူလေမာ
ကျွန်တော့်ဟို ကိုယ်တော်ပေးတော်မူဟူ လူလေဟို့ ကိုယ်တော်နာမတော်ရဲ
တဂိုးတော်အားဖြင့် ကျွန်တော်ဟာ စောန့်ထီးပေးတော်မူဘီ။ ဆိုဘီး
ပါရှိဟယ်။

မျိုး သူးနှိလည်း အယ်လောကနဆိုင်ဘဲဟူကြောန့် လောကဟာ သူးနှိဟို မူးတီးဂေဟယ်။

15 သူးနှိဟို အယ်လောကဟုနေ နယူတော်မူဟိုမူဘဲန နတ်ဆိုးရဲ့ လှည့်ဇားမူဟုနေ ကွယ်ကာပေးဟို ကျွန်တော်တောင်းလျှော့-က်ဟယ်။

16 ကျွန်တော်ဟာ အယ်လောကနဆိုင်ဘဲမျိုး သူးနှိဟာလည်း အယ်လောကနဆိုင်ဂေဟယ်။

17 သမ္မာတရားအားဖြင့် သူးနှိဟို သန်ရှင်းတော်မူပါ။ ကိုယ်တော်ရဲ့ စကားတော်ဟာ သမ္မာတရားဖြစ်ဟယ်။

18 ကိုယ်တော်ဟာ ကျွန်တော်ဟို အယ်လောကထဲဟို စေလွှတ် မျိုးဘဲ ကျွန်တော်ဟာလည်း သူးနှိဟို အယ်လောကထဲဟို စေလွှတ်လိုက်ဟယ်။

19 သူးနှိဟာလည်း သမ္မာတရားအားဖြင့် သန်ရှင်းခံရဟိုတွပ် ကျွန်တော်ဟာ သူးနှိတွပ် ကိုယ့်ကိုယ်ကိုယ် သန်ရှင်းစေပါဟယ်။

20 “ကျွန်တော်ဟာ သူးနှိတွပ်ဘဲမူဘဲန သူးနှိဟောပြောဟူ တရားစကားအားဖြင့် ကျွန်တော့်ဟို ယောင်ကြည်ဟူ လူလေတွပ်လည်း တောင်းလျှော့-က်ဟယ်။

21 သူးနှိလေ ဂူလောင်းဟာ တလောင်းတဝဒဲ ဖြစ်စေဟို ကျွန်တော်ဆုတောင်းဟယ်။ ဖ! ကိုယ်တော်ဟာ ကျွန်တော့်ထဲမာရှိဘီး ကျွန်တော်ဟာလည်း ကိုယ်တော်ထဲမာ ရှိနေမျိုးဘဲ သူးနှိဟိုလည်း ကျွန်တော့်ဟားလေထဲမာ ရှိတော်မူ

စေပါ။ ကျွန်တော့်ကို ကိုယ်တော်စေလွှတ်တော်မူဟု ဆို
 ဇာတိ လောကသားလေ ယောင်ကြည်လာစေတို့တွင် သူ
 နို့တို့ တလောင်းတဝဒဲ ဖြစ်စေတော်မူပါ။

22 ကိုယ်တော်န ကျွန်တော်ဟာ တလောင်းတဝဒဲ ဖြစ်
 မျိုးဘဲ သူနို့တို့လည်း တလောင်းတဝဒဲ ဖြစ်စေတို့တွင်
 ကျွန်တော်ကို ကိုယ်တော်ပေးတော်မူဟူ ဖောင်းသရေတော်
 တို့ သူနို့တို့လည်း ပေးတော်မူဘိ။

23 ကျွန်တော်ဟာ သူနို့ထဲမာ ရှိဘီး ကိုယ်တော်ဟာ
 ကျွန်တော်ထဲမာ ရှိပါဟု ဆို။ သူနို့တို့ တလောင်းတဝ
 ဒဲ ပုလဲဇောင်စေတို့တွင် ကိုယ်တော်ဟာ ကျွန်တော့်ကို
 စေလွှတ်တော်မူကြောင်းန ကျွန်တော့်ကို ရှစ်မျိုးဘဲ သူ
 နို့တို့လည်း ရှစ်တော်မူကြောင်းတို့ လောကသားလေဟာ
 သိရှိစေတို့ဖြစ်ဟု ဆို။

24 “ဖ! အယ်လောကတို့ ဖန်ဆင်းခန်ဂဒဲဟာ ကိုယ်တော်
 ဟာ ကျွန်တော်တို့ ရှစ်တော်မူဘီး ပေးတော်မူဟူ ဖောင်း
 သရေတော်တို့ ကျွန်တော့်ကို ကိုယ်တော် ပေးအပ်တော်မူ
 ဟူ လူလေတို့ မြင်တို့စေတို့တွင် သူနို့တို့ ကျွန်တော်ရှိဟူ
 နေရာမာ ကျွန်တော့်နတူးဒဲ ရှိစေရှင်ဟု ဆို။

25 ဖြောင့်မတ်တော်မူဟူဖ! အယ်လောကဟာ ကိုယ်
 တော်တို့ သိဂေဟု။ အယ်ဘေမဲ ကျွန်တော်ဟာ ကိုယ်တော်
 တို့ သိဟု ဆို။ ကိုယ်တော်ဟာ ကျွန်တော့်ကို စေလွှတ်တော်
 မူဟု ဆိုဇာတိ အယ်လူလေဟာ သိဂေဟု ဆို။

26 ကျွန်တော့်ဟို ကိုယ်တော် ရှစ်ဟူမြစ်တာဟာ သူးနို့ နှိုက်ရှိစေဘီး ကျွန်တော်ဟာလည်း သူးနို့နှိုက်ရှိနေဟူ ကြောန့် ကိုယ်တော့်နာမဟို သူးနို့ဟို ကျွန်တော်သိစေပါ ဘိ။ ထပ်ဘီးလည်း သိစေအူးမယ်” ဆိုဘီး ပြောလေဟယ်။

18

ယေရှုဟို ဖမ်းဆီးဂေဟူကြောန့်

(မသဲ ၂၆.၄၇-၅၆; မာကု ၁၄.၄၃-၅၀; လုကာ ၂၂.၄၇-၅၃)

1 ယေရှုဟာ အယ်မျိုးဆုတောင်းဘီးန တမဲ့တော်လေန တူးဒု ကြွဟားတော်မူဘီး ကေဒြန်ခလောင်းဟို ကူးတော် မူဟယ်။ အယ်နေရာမာ ဥယျာဉ်တခုရှိဘီး ယေရှုန တမဲ့ တော်လေဟာ အယ်ဥယျာဉ်ထဲဟို ဝမ်တော်မူဟယ်။

2 ယေရှုဟာ အယ်နေရာမာ တမဲ့တော်လေန ခါဘီးခါ တို့ဆောင်လေ့ရှိဟူကြောန့် ကိုယ်တော့်ဟို သစ်စာဖော့-က် ဟူ ယုဒရှုကာရုတ်ဟာ အယ်နေရာဟို သိနေဟယ်။

3 အယ်ကြောန့် ယုဒဟာ ရောမစစ်သားတစု၊ ယဇ်ပုရော ဟိတ်ဂီးလေန ဖာရိရှဲလေ စေလွှတ်လိုက်ဟူ မိမာန်တော် စောန့်လေဟို ခေါ်ဟားဘီး ဥယျာဉ်ဟို သွားဂေဟယ်။ သူး နို့ဟာ မီးအီလေ၊ မီးဒေါက်လေန လတ်နတ်လေဟို ကိုင် ဆောန်လာဂေဟယ်။

4 ယေရှုဟာ သူနှိုက်ဖြစ်ပျစ်လာဟို့ ဇာလေဂူလောင်းဟို့ သိတော်မူဟူကြောန့် သူးနှိုနားဟို့ ကြွတော်မူဘီး “နန်းနှို ဖယ်လူဟို့ ရှာဂေ့နေနူး” ဆိုဘီး မေးတော်မူလေဟယ်။

5 သူးနှိုဟ “နာဇရက်မြို့သား ယေရှုဟို့ ရှာနေဟယ်” ဆိုဘီး ဖြေလိုက်ဟယ်။

ကိုယ်တော်ဟ “ငါဘဲဖြစ်ဟယ်” ဆိုဘီး မိန့်တော်မူလိုက်ဟယ်။

ကိုယ်တော်ဟို့ သစ်စာဖော့-က်ဟူ ယုဒဟာ သူးနှိုတူးဒုရပ်နေဟယ်။

6 ယေရှုဟာ သူးနှိုဟို့ “ငါဘဲဖြစ်ဟယ်” ဆိုဘီး မိန့်တော်မူလိုက်ဟူ ခီဗာ သူးနှိုဟာ နော့-က်ဆုဟားဘီး မှလေဂီးထတ်ဟို့ လဲကုလဟားဂေ့ဟယ်။

7 ယေရှုဟာ သူးနှိုဟို့ “နန်းနှို ဖယ်လူဟို့ ရှာနေနူး” ဆိုဘီး နော့-က်တခါ မေးတော်မူလေဟယ်။

သူးနှိုဟ “နာဇရက်မြို့သား ယေရှုဟို့ ရှာဟယ်” ဆိုဘီး ဖြေဂေ့ဟယ်။

8 ယေရှုဟ “ငါဘဲဖြစ်ဟယ် ဆိုဘီး နန်းနှိုဟို့ ငါပြောဟားပီးဘီ။ နန်းနှိုဟာ ငါ့ဟို့ ရှာနေဟယ် ဆိုဟာ အယ်လူလေဟို့ သွားခိုင်းလိုက်ပါ” ဆိုဘီး မိန့်တော်မူလိုက်ဟယ်။

9 အယ်မျိုး မိန့်တော်မူဇာဟ “ဖ၊ ကိုယ်တော်ပေးအပ်ဟားဟူ လူလေဟာ တယော့-က်လည်း ပျစ်စီးဟို့မေ့ဟ” ဆိုဘီး ကိုယ်တော် မိန့်တော်မူဟားဇာလေဟာ မှန်ဘဲ ဖြစ်လာလေဟယ်။

10 အယ်ဒီမာ ရှိမုန်ပေတရုဟာ ပါလာဟာ ထားဟို့ ဆွဲထု လိုက်ဘီး ယဇ်ပုရောဟိတ်မန်းရဲ့ ကျွန်ဟို့ ခွတ်လိုက်ဟူ ခီမာ ညာဖတ်နားဝှပ် ပြတ်ဟူးလေဟယ်။ အယ်ကျွန်ရဲ့ နာမယ်ဟာ မာလခု ဖြစ်ဟယ်။

11 ယေရှုဟာ ပေတရုဟို့ “နန့်ထားဟို့ ထားအီထဲမာ ပုလန်သီးလိုက်ပါ! ငါ့ဖပေးတော်မူဟူ ဒေါက်ခဝေဒနာခွပ်ဟို့ ငါသော့-က်ဘဲနေရဟို့လော” ဆိုဘီး မိန့်တော်မူလေဟယ်။

ယေရှုဟို့ အနနတ်ရှေ့ဟို့ ခေါ်ဆောန်ဟူးဟူကြောန်း

12 အယ်ဘီးနု ရောမစစ်သားလေ၊ သူးနို့ရဲ့ တပ်မှူးဂီးနု ယုဒလူ စောန့်တပ်သားလေဟာ ယေရှုဟို့ ဖမ်းဆီးဘီး၊ တောက်နှောန်ဂေ့ဘီး

13 အနနတ်နားဟို့ ရင်ဦးဆောင်း ခေါ်ဆောန်ဟူးဟယ်။ အနနတ်ဟာ အယ်နှစ်မာ ယဇ်ပုရောဟိတ်မန်းဖြစ်ဟူ ကယာဖရဲ့ ယော့-က်ခမဖြစ်ဟယ်။

14 အယ်ကယာဖဟာ လူလေ ဂူလောင်းတွပ် လူတယော့-က် သေရဇာဟု ပိုကောန်းဟယ် ဆိုဘီး ယုဒအာဏာပိုင်လေဟို့ ကြိပေးဟူ သူဖြစ်ဟယ်။

ယေရှုဟို့ ပေတရုဟု ငြင်းဆိုဟူကြောန်း

(မသဲ ၂၆.၆၉.၇၀; မာကု ၁၄.၆၆-၆၈; လုကာ ၂၂.၅၅-၅၇)

15 ရှိ မုန် ပေ တ ရှု န တခြား တ ဗွဲ တော် ဟာ ယေရှု နှော-က် တော် လို က် ဟား ဟှ ယ်။ အယ် တ ဗွဲ တော် ဟာ ယဇ်ပုရောဟိတ်မန်းရဲ့ သိဖြစ်ဟူကြောန့် ယေရှုနတူးဒု ယဇ်ပုရောဟိတ်မန်းရဲ့ ခြိမ်းထဲဟို့ ဝမ်ဟားလေဟှယ်။

16 ပေတရုဟာ ခြံခွဗော့-က်ပုလန်မာ နေရစ်ဟှယ်။ ယဇ်ပုရောဟိတ်မန်းရဲ့ သိဖြစ်ဟူ တဗွဲတော်ဟာ ပုလန် ထွပ်လာဘီး ခွဗော့-က်စောန့် စေခံဝယ်သားဟို့ ပြောဘီး ဟာ ပေတရုဟို့ ထဲဟို့ ခေါ်ဟားဟှယ်။

17 ခွဗော့-က်စောန့် စေခံဝယ်သားဟာ ပေတရုဟို့ “နန် ဟု အယ်မူလူရဲ့ တဗွဲတော် မူဟုလော” ဆိုဘီး မေးလိုက် ဟှယ်။

ပေတရုဟု “မူဟု” ဆိုဘီး ပုလန်ဖြေလိုက်ဟှယ်။

18 အယ်ခီဟာ ရှမ်းဟူကြောန့် စေခံလေန စောန့်လေဟာ မီးဘောင် ပတ်ပတ်လည်မာ ရပ်ဘီးဟာ မီးကန်နေဂေဟှယ်။ အယ်ကြောန့် ပေတရုဟာ သူးနိနတူးဒု ရပ်ဘီးဟာ မီး ကန်နေလေဟှယ်။

ယဇ်ပုရောဟိတ်မန်းဟု ယေရှုဟို့ မေးမြန်းဟူကြောန်း
(မသံ ၂၆.၅၉-၆၆; မာကု ၁၄.၅၅-၆၄; လုကာ
၂၂.၆၆-၇၁)

19 အယ်ခီမာ ယဇ်ပုရောဟိတ်မန်းဟာ ယေရှုဟို့ တဗွဲ တော်လေကြောန်းန ယေရှုရဲ့ သွန်သန်ဇာကြောန်းဟို့ မေး နေလေဟှယ်။

²⁰ ယေရှုဟု “ငါဟာ လောကမာ ပွမ့်ပွမ့်လန်းလန်းဟွား
ဘဲ သွန်သန်ဟယ်။ ယုဒလူလေ စုဝီးဟူ ဝါလယ်ဇရပ်လေ
န ဗိမာန်တော်မာဘဲ ငါဟာ သွန်သန်ဟယ်။ ငါဟာ တိတိ
ဟွား ဟောပြောဟု။

²¹ အယ်ဆိုဟာ ဖြားဖြစ်ကြောန့် ငါ့ဟို မေးမြန်းနေနူး။
ငါဟောပြောဟွားဇာလေဟို ကြားဟွားဘီးဟူ လူလေဟို
မေးမြန်းဂေ။ ငါဖြားဇာလေ ဟောပြောဟွားဟယ် ဆိုဇာ
ဟို အယ်လူလေဟို မေးမြန်းဂေ။ ငါပြောဟွားဇာလေဟို
သူးနို့သိဂေဟယ်” ဆိုဘီး ဖြေတော်မူလေဟယ်။

²² ယေရှုဟာ အယ်မျိုးမိန့်တော်မူလိုက်ခီမာ စောန့်တ
ယော့-က်ဟာ “ယဇ်ပုရောဟိတ်မန်းဟို အယ်မျိုးပုလန်ဖြေ
ရလော!” ဆိုဘီး ကိုယ်တော့်ဟို ပါးရိုက်လေဟယ်။

²³ ယေရှုဟာ သူ့ဟို “ငါပြောဟွားဇာလေ မှားဟယ် ဆို
ဟာ မှားကြောန့်ဟို သတ်သေပြဂေ။ ဖြေတော်မူလေဟု
ယ်။ အယ်ဘေမဲ့ ငါပြောဟွားဇာလေ မှန်ဟယ် ဆိုဟာ ဖြား
ဖြစ်ကြောန့် ငါ့ဟို ရိုက်နေရနူး” ဆိုဘီး မိန့်တော်မူလေဟု
ယ်။

²⁴ အယ်ဘီးန အနန္တဟာ ကိုယ်တော့်ဟို တောက်နှော
န့်ဘီး ယဇ်ပုရောဟိတ်မန်း ကယာဖနားဟို ပို့စေလိုက်ဟု
ယ်။

ယေရှုဟို ပေတရုနော့-က်တခါ ငြင်းဆိုဟူကြောန့်
(မသဲ ၂၆.၇၁-၇၅; မာကု ၁၄.၆၉-၇၂; လုကာ
၂၂.၅၈-၆၂)

၂၅ ရှိမုန်ပေတရုဟာ မတ်တတ်ရပ်ဘီးဟာ မီးကန်နေဒူး
ဘဲဖြစ်ဟယ်။ အယ်ကြောန့် လူတချို့ဟာ “နန်ဟာလည်း
အယ်လူရဲ့ တမဲ့တော်လေထဲဟု တယော့-က် မူဟုလော”
ဆိုဘီး သူ့ဟို မေးဂေဟယ်။

အယ်ဘေမဲ့ ပေတရုဟာ “ငါမူဟု” ဆိုဘီး ငြင်းလေဟ
ယ်။

၂၆ ယဇ်ပုရောဟိတ်မန်းရဲ့ ကျွန်တယော့-က်ဖြစ်ဘီး ပေ
တရု ခွတ်လိုက်ဟူကြောန့် နားဝပ်ပြတ်ဟားဟူလူန ရွှေမျိုး
တော်သူဟု “နန်ဟာ အယ်လူနတူးဒု ဥယျာဉ်ထဲမာ ငါမြင်
လိုက်ဟယ် မူဟုလော” ဆိုဘီး မေးလေဟယ်။

၂၇ ပေတရုဟာ “မူဟု” ဆိုဘီး နော့-က်တခါ ငြင်းလိုက်
ဟူ ခီမာ ရှင်းရှင်းဘဲ ကြစ်တွန်လေဟယ်။

ယေရှုဟာ ပိလတ်ရှေ့ဟို ခေါ်ဆောန်ဟားကြောန့်
(မသဲ ၂၇.၁,၂,၁၁-၁၄; မာကု ၁၅.၁-၅; လုကာ ၂၃.၁-
၅)

၂၈ မိုးလန်းစောစောနု ယေရှုဟို ကယာဖရဲ့ အီဟုနေ
မြို့ဝန်မန်းရဲ့ နန်းတော်ဟို ခေါ်ဆောန်ဟားဟယ်။ ယုဒ
အာဏာပိုင်လေဟာ ပသခါပွဲတော်ဟို စားနိုင်ဟိုတွပ် သူး
နို့ကိုယ်တိုင် ဘာသာရေးစဉ်လာတိုင်း ညစ်ညူးစေရှင်ဘဲ
ဟူကြောန့် နန်းတော်ထဲဟို ဝင်လိုက်ဟားဂေဟု။

၂၉ အယ်ကြောန့် ပိလတ်ဟာ သူးနို့ရှိဟူ ပုလန်ဟို ထွပ်
လာဘီး “အယ်လူဟို ဖြားမူနု စွပ်စွဲဟားဂေနူး” ဆိုဘီး မေး
လေဟယ်။

30 သူ့နှို့ဟု “အယ်လူဟာ ရာဇဝတ်မှုဟို့ ကျူးလွန်ဘဲဟု ဆိုဟာ အယ်လူဟို့ ကျွန်တော့်ဟူးလေ ခေါ်လာဟို့ မှုဟု” ဆိုဘီး ဖြေဂေဟယ်။

31 ပိလတ်ဟာ “အယ်ဆိုဟာ နန်းနှို့ကိုယ်တိုင် အယ်လူ ဟို့ ခေါ်ဟူးလိုက်ဘီး နန်းနှို့ရဲ့ ပညတ်တရားတိုင်း စီရင် ဂေ” ဆိုဘီး ယုဒလူလေဟို့ ပြောလေဟယ်။

သူ့နှို့ဟု “ကျွန်တော့်ဟူးလေဟာ ဖယ်လူဟို့လည်း သတ်ပိုင်ခွမ်မွေဟု” ဆိုဘီး ပုလန်ဖြေဂေဟယ်။

32 အယ်မျိုးပြောနေဇာဟု မိမိဟာ ဖယ်မျိုးသေခံရမယ် ဆိုဇာဟို့ ယေရှုမိန့်တော်မူဟူးတိုင်း ပုလဲဇောင်လာစေဟို့ ဖြစ်ဟယ်။

33 ပိလတ်ဟာ နန်းတော်ထဲဟို့ ပုလန်ဝမ်ဟူးဘီး ယေရှု ဟို့ ခေါ်လိုက်ဘီး “နန်ဟာ ယုဒမန်းဂီးလော” ဆိုဘီး မေး လေဟယ်။

34 ယေရှုဟု “နန်ဟာ နန်ဆန္ဒတိုင်း အယ်မေးခွန်းဟို့ မေး ဇာလော။ အယ်မျိုးမှုဘဲနေဟာ တခြားလူလေဟု ငါ့ကြော န်းဟို့ ပြောပြဟူးကြောနဲ့လော” ဆိုဘီး မေးတော်မူလေ ဟယ်။

35 ပိလတ်ဟု “နန်ဟာ ငါ့ဟို့ ယုဒလူဖြစ်ဟယ် ဆိုဘီး ထန်နေဟယ်လော။ နန်ဟို့ ငါ့နားဟို့ လာအပ်ပေးဟူလူ လေဟာ နန်လူမျိုးလေန ယဇ်ပုရောဟိတ်ဂီးလေဖြစ်ဟု

ယ်။ နန်ဟာ ဖြားဇာလေလောက်ဟူးနူး” ဆိုဘီး မေးလေဟယ်။

36 ယေရှုဟု “ငါ့နိုင်ငံတော်ဟာ အယ်လောကနဆိုင်ဟု။ ငါ့နိုင်ငံတော်ဟာ အယ်လောကနဆိုင်မယ် ဆိုဟာ ငါ့ဟို့ယုဒအာဏာပိုင်လေ လတ်ထဲရော့-က်ဘဲအောန် ငါ့စေခံလေဟာ တိုက်ခိုက်ဂေ့လေ့မယ်။ ငါ့နိုင်ငံတော်ဟာ အယ်လောကနဆိုင်ဟု!” ဆိုဘီး မိန့်တော်မူလေဟယ်။

37 အယ်ကြောန် ပိလတ်ဟု “အယ်ဆိုဟာ နန်ဟာ မန်းဂီးလော” ဆိုဘီး ကိုယ်တော့်ဟို့ မေးလေဟယ်။

ယေရှုဟု “သင်ပြောမျိုးဘဲ ငါဟာ မန်းဂီးဖြစ်ဟယ်။ ငါဟာ သမ္မာတရားဟို့ သတ်သေခံဟို့တွပ် မွီးလာဘီး အယ်လောကဟို့ ကြွလာဟယ်။ သမ္မာတရားနဆိုင်ဟူ လူလေဟာ ငါ့စကားဟို့ နားထောန်ဂေ့ဟယ်” ဆိုဘီး ဖြေတော်မူလေဟယ်။

38 ပိလတ်ဟု “အယ်ဆိုဟာ သမ္မာတရားဟု ဖြားဇာနူး” ဆိုဘီး မေးလေဟယ်။

ယေရှုဟို့ သေဒန်ပေးဟူကြောန်း

(မသဲ ၂၇.၁၅-၃၁; မာကု ၁၅.၆-၂၀; လုကာ ၂၃.၁၃-၂၅)

အယ်ဘီးန ပိလတ်ဟာ ပုလန်မာရှိနေဟူ ယုဒလူလေနားဟို့ ပုလန်ဟူးဘီးဟာ “အယ်လူမာ ပြစ်စီရင်ဟို့ဇာ ဖြားလည်း မှေ့ဟု။

39 နန်းနို့ရဲ့ ထောင်းဇံရ ပသခါပွဲမှာ ထောန်သားတယော့-က်ဟို့ လွတ်လေ့ရှိဟယ်။ နန်းနို့တွပ် ယုဒမန်းဂီးဟို့ လွတ်ပေးစေရှင်ဟယ်လော” ဆိုဘီး သူးနို့ဟို့ မေးလေဟယ်။

40 သူးနို့ဟာ “သူးဟို့ လွတ်ပေးန! ဗာရဗုဗဟို့ဘဲ လွတ်ပေးပါ!” ဆိုဘီး အော်ဘီး ပုလန်ဖြေဂေဟယ်။ ဗာရဗုဗဟာ ဓမ္မလတယော့-က် ဖြစ်ဟယ်။

19

1 အယ်ကြောန့် ပိလတ်ဟာ ယေရှုဟို့ ခေါ်ဆောန်ဟားစေဘီး ကီဒန်ပေးစေဟယ်။

2 စစ်သားလေဟာ ဆူးခတ်လေန လောက်ဟားဟူ သရဖူဟို့ ကိုယ်တော့ခေါင်းထတ်မာ ဆောင်းပေးဘီးဟာ ခရမ်းရောင်ဝတ်ရောင်ဟို့ ဝတ်ပေးဘီး

3 ကိုယ်တော်နားဟို့ လာဂေဘီး “ယုဒမန်းဂီး သတ်တော်ရာကျော်ရှယ်ပါစေ!” ဆိုဘီး ပြောဂေဟယ်။ အယ်ဘီးန ကိုယ်တော့ဟို့ ပါးရိုက်ဂေဟယ်။

4 ပိလတ်ဟာ နော့-က်ထပ်တခါ ပုလန်ဟို့ ထွပ်လာဘီးဟာ “အယ်လူဟို့ ပြစ်စီရင်ဟို့ဇာ ဖြားလည်းတို့ဟူ။ အယ်ကြောန့် နန်းနို့ဗြင်စေဟို့ သူးဟို့ နန်းနို့နားဟို့ ငါခေါ်လာမယ်” ဆိုဘီး လူအောက်ဂီးဟို့ ပြောလေဟယ်။

5 အယ်ဘီးန ယေရှုဟာ ဆူးသရဖူန ခရမ်းရောင်ဝတ်ရောင်ဟို့ ဝတ်ဟားဘီး ပုလန်ဟို့ ထွပ်ကြွတော်မူလေဟ

ယ်။ ပိလတ်ဟာ “ကေ့ကေ့! အယ်လူဘဲဖြစ်ဟယ်!” ဆိုဘီး သူနို့ဟို ပြောလေဟယ်။

⁶ ယဇ်ပုရောဟိတ်ဂီးလေန စောန့်လေဟာ ကိုယ်တော့်ဟို ဖြင်လိုက်ဟူ ခီမာ “အယ်လူဟို ကားစင်တန်ပါ! အယ်လူဟို ကားစင်တန်ပါ!” ဆိုဘီး သူနို့ဟာ အော်ဟစ်ဂေ့ဟယ်။

ပိလတ်ဟာ “အယ်ဆိုဟာ နန်းနို့ဟာ အယ်လူဟို ခေါ်ဆောန်ဟားဘီး ကားစင်တန်ဂေ့။ ငါဟာ သူဟို ပြစ်စီရင်ဟို့ဇာ ဖြားလည်းတို့ဟ” ဆိုဘီး သူနို့ဟို ပြောလေဟယ်။

⁷ ယုဒလူခေါင်းဆောန်လေဟာ “အယ်လူဟာ သူ့ကိုယ်သူ ဘုရားသခင်ရဲ့ သားတော် ဆိုဘီး ကြေညာဟူကြောန် သေထိုက်ကြောန်း ကျွန်တော့်ဟားလေရဲ့ ပညတ်တရားမာ ပြောဟားဟယ်” ဆိုဘီး ဖြေဂေ့ဟယ်။

⁸ ပိလတ်ဟာ အယ်စကားဟို ကြားရဟူ ခီမာ ပိုဘီး ကြော့-က်လန်ဟားဟယ်။

⁹ သူဟာ နန်းတော်ထဲဟို ပုလန်ဝမ်ဟားဘီးဟာ ယေရှုဟို “သင်ဟာ ဖယ်နေရာဟုနေ လာဟယ်နူး” ဆိုဘီး မေးလေဟယ်။

အယ်ဘေမဲ့ ယေရှုဟာ ခွန်းလည်း ပုလန်ဖြေဟူ။

¹⁰ ပိလတ်ဟာ ကိုယ်တော့်ဟို “သင်ဟာ ငါ့ဟို စကားပြောနိုဘီလော။ ငါဟာ သင့်ဟို လွတ်ဟို့တွပ် ခွမ့်အာဏာလည်းရှိဘီး ကားစင်တန်ဟို့တွပ် ခွမ့်အာဏာ

လည်းရှိဟယ် ဆိုဇာဟို သိဟုလော” ဆိုဘီး မေးလေဟယ်။

11 ယေရှုဟု “သင့်ဟို ဘုရားသခင်ဟု ပေးအပ်ဟူးဟူ ကြောန့် အယ်မျိုးခွမ်အာဏာဟို ရဟူးဟယ်။ အယ်ကြောန့် ငါ့ဟို သင့်လတ်ထဲအပ်ဟူ လူဟာ ပြစ်ပိုကီးဟယ်” ဆိုဘီး ဖြေလေဟယ်။

12 ပိလတ်ဟာ အယ်မျိုးကြားရဟူ ခီမာ ယေရှုဟို လွတ်ပေးဟိုတွပ် နည်းလမ်းရှာဟို ကြိုးစားလေဟယ်။ အယ်ဘေမဲ့ ယုဒလူခေါင်းဆောင်လေဟာ “အယ်လူဟို လွတ်ပေးမယ် ဆိုဟာ သင်ဟာ ကံသာမန်းဂီးရဲ့ မိဆွေမှုဟု! ဖယ်လူဘဲဖြစ်ဖြစ် ကိုယ့်ကိုယ်ကိုယ် မန်းဂီးဆိုဘီး ကြေညာဟူလူဟာ ကံသာမန်းဂီးဟို ပူကန်ဇာဖြစ်ဟယ်!” ဆိုဘီး အော်ဂေဟယ်။

13 ပိလတ်ဟာ အယ်စကားလေဟို ကြားဟူ ခီမာ ယေရှုဟို ပုလန်ဟို ခေါ်ထုဟူးဘီး ကုလော့-က်ပုလားစံကြံ ဆိုဘီး ခေါ်ဟူ တရားပလ္လင်ထတ်မာ ထိုင်လေဟယ်။ အယ်စံကြံဟို ဟေမြဲစကားန ဂဗုဗသ ဆိုဘီး ခေါ်ဟယ်။

14 အယ်နေဟာ ပသခါပွဲတိုင်ခန် နေဒန်ဇာဖြစ်ဟယ်။ ပိလတ်ဟာ “နန်းနို့မန်းဂီးဘဲ ဖြစ်ဟယ်!” ဆိုဘီး ယုဒလူလေဟို ပြောလေဟယ်။

15 သူးနို့ဟာ “အယ်လူဟို သတ်ပါ! အယ်လူဟို သတ်ပါ! အယ်လူဟို ကားစင်တန်ပါ!” ဆိုဘီး ပုလန်အော်ဂေဟယ်။

ပိလတ်ဟာ “နန်းနို့မန်းဂီးဟို ကားစင်တန်ရဟိုလော” ဆိုဘီး သူးနို့ဟို မေးလေဟယ်။

ယဇ်ပုရောဟိတ်ဂီးလေဟာ “ကဲသာတပါးဒဲဘဲ ကျွန်တော်ဟူးလေရဲ့ မန်းဂီးဖြစ်ဟယ်!” ဆိုဘီး ပုလန်ဖြေဂေဟယ်။

¹⁶ အယ်ဘီးန ပိလတ်ဟာ ယေရှုဟို ကားစင်တန်ဟိုတွပ် သူးနို့လတ်ထဲဟို အပ်ပေးလေဟယ်။

ယေရှုဟို ကားစင်တန်ဟူကြွန်း

(မသံ ၂၇.၃၂-၄၄; မာကု ၁၅.၂၁-၃၂; လုကာ ၂၃.၂၆-၄၃)

အယ်ကြောန့် သူးနို့ဟာ ယေရှုဟို ခေါ်ဆောန်ဟူးဂေဟယ်။

¹⁷ ကိုယ်တော်ဟာ “ဦးခေါင်းခွံနေရာ” ဟို မိမိလတ်ဝါးကပ်တိုင်ဟို ထမ်းဘီး ကြွတ်တော်မူလေဟယ်။ အယ်နေရာဟို ဟေဗြဲစကားန “ဂေါလဂေါသ” ဆိုဘီး ခေါ်ဟယ်။

¹⁸ သူးနို့ဟာ အယ်နေရာမာ ကိုယ်တော်ဟို တခြားလူနွေယော့-က်နုတူးဒူ ကားစင်တန်ဂေဟယ်။ ယေရှုဟို လယ်မာထားဘီး အယ်လူနွေယော့-က်ဟို ညာဖတ်မာ တယော့-က် ဘယ်ဖတ်မာ တယော့-က် ထားဂေဟယ်။

¹⁹ ပိလတ်ဟာ “ယုဒမန်းဂီး၊ နာဇရက်မြို့သား ယေရှု” ဆိုဘီး ကမ္ပည်းရေးထိုးဘီး လတ်ဝါးကပ်တိုင်ထတ်မာ ကပ်ဟူးဟယ်။

20 ယေရှုဟို ကားစင်တန်ဟူ နေရာဟု မြို့န နီးဟူကြောင့် ယုဒလူလေဟာ အယ်ကမ္ပည်းစာဟို ဖတ်ဂေဟယ်။ အယ် ကမ္ပည်းစာဟို ဟေမြဲစကား၊ လက်တင်စကား၊ ဟေလသ စကားန ရေးဟားဟယ်။

21 ယဇ်ပုရောဟိတ်ဂီးလေဟာ ပိလတ်ဟို “‘ယုဒမန်းဂီး’ ဆိုဘီး ရေးပါန။ ‘အယ်လူဟု ငါဟာ ယုဒလူလေရဲ့ မန်းဂီး ဖြစ်ဟယ် ဆိုဘီး ပြောကြောင်းဟိုဘဲ ရေးတော်မူပါ’ ” ဆို ဘီး ပြောဂေဟယ်။

22 ပိလတ်ဟု “ငါရေးဟားဘီးဇာဘဲ တည်ဖြစ်ရမယ်” ဆိုဘီး ပုလန်ပြောလေဟယ်။

23 စစ်သားလေဟာ ယေရှုဟို ကားစင်တန်ဂေဘီးန ကိုယ်တော်ရဲ့ ဝတ်တော်ဟို လေးပိုင်းပိုင်းဘီး တယော့-က် တပိုင်းစီ ယူဂေဟယ်။ သူးနို့ဟာ ထဲခံအန်းဂီဟိုလည်း ယူဂေဟယ်။ အယ်အန်းဂီဟာ ချောက်ကြောင်းမွေဘဲ ရစ် လောက်ဟားဟူ အန်းဂီးဖြစ်ဟယ်။

24 စစ်သားလေဟာ “အယ်အန်းဂီးဟို ဆုဖုလဲဘဲန ဖယ် လူရမယ် ဆိုဇာဟို မဲနှိုက်ဂေဇို” ဆိုဘီး သူးနို့ ရှင်းရှင်း ပြောဂေဟယ်။ အယ်မျိုးဖြစ်လာဇာဟု

“သူးနို့ဟာ ငါ့အန်းဂီးဟို ခွဲဝီယူဂေမယ်

အယ်ဘီးဟာ ငါ့အန်းဂီဟို မဲနှိုက်ဘီးဟာ ယူဂေဟ ယ်” ဆိုဘီး ကျမ်းစာမာ ရေးဟားဇာလေ ပုလဲဇာ င်ဟိုတွပ် ဖြစ်လေဟယ်။

အယ်ကြောန် စစ်သားလေဟာ အယ်မျိုး လောက်ဂေဟာ
ယ်။

25 ယေရှုရဲ့ လတ်ဝါးကပ်တိုင်နားမှာ ကိုယ်တော်ရဲ့မိ၊ ကို
ယ်တော်မိရဲ့ညီမ၊ ကလောဖရဲ့မီးမ မာရိန မာဂဒလဝါသူ
မာရိ မတ်တတ်ရပ်နေဂေဟယ်။

26 ယေရှုဟာ နီးမာရပ်နေဟူ၊ ကိုယ်တော်ရှစ်ဟူ တမဲ့
တော်န မိဟို့ ပြင်လိုက်ဟူကြောန် ကိုယ်တော်ဟု “နို့မိ၊ နို့မိ
သားဟို့ ကေ့ပါအူး” ဆိုဘီး မိဟို့ မိန့်တော်မူဟယ်။

27 အယ်ဘီးန ကိုယ်တော်ဟာ “သူဟာ နန့်ရဲ့ မိဖြစ်ဟု
ယ်” ဆိုဘီး အယ်တမဲ့တော်ဟို့ မိန့်တော်မူလေဟယ်။ အ
ယ်ခီဟုနေစဘီး အယ်တမဲ့တော်ဟာ မိဟို့ သူရဲ့ အီမာ ခေါ်
ဟားလေဟယ်။

ယေရှုဟာ သတ်စွန့်တော်မူကြောန်း

(မသံ ၂၇.၄၅-၅၆; မာကု ၁၅.၃၃-၄၁; လုကာ ၂၃.၄၄-
၄၉)

28 အယ်ဘီးန ယေရှုဟာ မူအားလောင်း ပီးဟားဘီဆို
ဇာဟို့ သိတော်မူဘီး ကျမ်းစာပုလဲဇောင်ဟို့တွပ် “ငါရေင
တ်ဟယ်” ဆိုဘီး မိန့်တော်မူလေဟယ်။

29 အယ်နေရာမှာ ဝိုင်ရှင်ပုလဲထဲဟားဟူ အိုးတလောင်း
ရှိဟယ်။ အယ်ကြောန် သူးနို့ဟာ ရေမှလုတခုဟို့ အယ်ဝိုင်
ရှင်ထဲမှာ နှစ်လိုက်ဘီးဟာ ဟုသုပဗန် ခတ်ဖျားမာတပ်
ဘီး ကိုယ်တော်ရဲ့ နှော့-က်ခမ်းနားဟို့ ကပ်ပေးလေဟယ်။

30 ယေရှုဟာ ဝိုင်ရှင်ဟို့ သော့-က်တော်မူဘီးန “မူပီးဟားဘီး!” ဆိုဘီး မိန့်တော်မူလေဟယ်။

အယ်ဘီးန ကိုယ်တော်ဟာ ဦးခေါန်းတော်ဟို့ အော့-က်ဟို့စိုက်ခလဘီး သတ်တော်ဟို့ စွန့်တော်မူလေဟယ်။

ယေရှုရဲ့ နံဘေးတော်ဟို့ လုံနထိုးဖော့-က်ဟူကြောင်း

31 ယုဒအာဏာပိုင်လေဟာ ကားစင်တန်ဟားဟူ လူလေရဲ့ ခေလေဟို့ ရိုက်ခလိုးဘီးဟာ လောန်းလေဟို့ ကားတိုင်ထတ်ဟုနေ အော့-က်ခလခွမ်ပြုဟို့ ပိလတ်ဟို့ တောန်းလျှော့-က်ဂေဟယ်။ သူးနို့ အယ်မျိုးတောန်းလျှော့-က်ဇာဟု အယ်နေဟာ ဖိနေဖြစ်ဘီး ဒန်းနေမာ လောန်းလေဟို့ လတ်ဝါးကပ်တိုင်ထတ်မာ မေ့စေရှင်ဟူ။ နတ်ကီးတိုင်ဟာ လည်း ကီးမြတ်ဟူ ဒန်းနေဖြစ်နေဟယ်။

32 အယ်ကြောန့် စစ်သားလေဟာ လာဘီးန ယေရှုနတူးဒူ ကားစင်တန်ခံရဟူ ပထမလူရဲ့ ခေလေန ဒုတိယလူရဲ့ ခေလေဟို့လည်း ရိုက်ခလိုးလိုက်ဟယ်။

33 အယ်ဘေမဲ့ သူးနို့ဟာ ယေရှုနားဟို့ ရော့-က်လာဟူ ခီမာ သေနောဘီ ဆိုဇာဟို့ တွဲဟားဟူကြောန့် ကိုယ်တော်ရဲ့ ခေလေဟို့ ရိုက်ခလိုးဟုမ်း။

34 အယ်ဘေမဲ့လည်း စစ်သားတယော့-က်ဟာ ယေရှုရဲ့ နံဘေးတော်ဟို့ လုံန ထိုးဖော့-က်လိုက်ဟူ ခီမာ သွီးနရေဟာ ရှစ်ရှင်းထွပ်လာဟယ်။

35 အယ်မျိုးဖြစ်ဇာလေဟို နန်းနီလည်း ယောင်ကြည်ဟို တွပ်* မြင်ဟူလူတယော့-က်ဟု သတ်သေခံဟူးဟယ်။ အယ်လူပြောဇာလေဟာ မှန်ဖြစ်ဘီး အယ်လူဟာ မှန်းမှန် ကန်းကန်ဟူး ပြောဟယ် ဆိုဇာဟို သူကိုယ်တိုင်သိဟယ်။

36 အယ်မျိုးဖြစ်ဟူးဇာဟု “သူရဲ ရိုးလေဟာ တရောင်း လည်း ကျိုးဂေဟု” ဆိုဘီး ကျမ်းစာပုလဲဇောင်ဟိုတွပ် ဖြစ်ဟယ်။

37 အယ်ဘီးဟာ တခြားကျမ်းစာမာ “လူလေဟာ သူး နို့ ထိုးဖော့-က်လိုက်ဟူ လူဟို မြင်ရဂေလေ့မယ်” ဆိုဘီး ရေးဟူးဟယ်။

ယေရှုဟို သံဂြိုဟ်ဟူကြောင်း

(မသဲ ၂၇.၅၇-၆၁; မာကု ၁၅.၄၂-၄၇; လုကာ ၂၃.၅၀-၅၆)

38 အယ်ဘီးန အရိမသဲမြို့သား ယောသပ်ဟာ ယေရှု ရဲ့ လောင်းတော်ဟို ယူဟူးခွမ်ပြုဟိုတွပ် ပိလတ်နားဟို သွားဘီး တောင်းလျှော့-က်လေဟယ်။ ယောသပ်ဟာ ယုဒ အာဏာပိုင်လေဟို ကြော့-က်ဟူကြော့န့် ထန်းထန်ရှားရှား နေဘဲဟူ ယေရှုရဲ့ တမဲ့တော် တယော့-က် ဖြစ်ဟယ်။ ပိလတ်ရဲ့ခွမ်ပြုချစ်န ယောသပ်ဟာ လောင်းတော်ဟို ယူဟူးလေဟယ်။

39 ရင်းရင်းဒူးဟု ယေရှုဟို ညဉ့်ခန်းဖတ်မာ လာတို့ဟူ

* 19:35 ၁၉.၃၅ ယောင်ကြည်ဟိုတွပ်၊ တချို့ မူရင်းလတ်ရေးမူလေမာ ဆစ်ဘီး ယောင်ကြည်ဂေ၊ ဆိုဘီး ပါရှိဟယ်။ 19:37 ၁၉.၃၇ ဗျာ ၁.၇ 19:39 ၁၉.၃၉ ယော ၃.၁၂

နိုကောဒင်ဟာ မုရန်န အကျော် ရောနှောဟားဟူ နံသာ ပိဿာနေ့ဆယ်ကျော်ဟို့ ယူဟားဘီး ယောသပ်နတူးဒု လို က်ဟားဟယ်။

⁴⁰ အယ်လူနေ့ယော့-က်ဟာ ယေရှုရဲ့ လောန်းဟို့ ယူ ဘီး ယုဒလူလေရဲ့ သဂြိုဟ်ဇာနဆိုင်ဟူ ထောင်းဒန်းစဉ် လာတိုင်း နံသာလေနတူးဒု လောန်းတော်ဟို့ ပိဖုလူနပတ် လေဟယ်။

⁴¹ ယေရှုဟို့ လတ်ဝါးကပ်တိုင်မာ တန်ဘီးသတ်ဟူ နေရာနားမာ ဥယျာဉ်တခုရှိဟယ်။ အယ်ဥယျာဉ်ထဲမာ ဖယ်လူဟို့လည်း သံဂြိုဟ်ဖူးသေးဘဲဟူ သန်းခုလိုင်းဂူ သစ်တခု ရှိလေဟယ်။

⁴² အယ်နေ့ဟာ ယုဒလူလေရဲ့ ဖိနေ့ ဖြစ်ဟူကြောန့် နီး မာရှိဟူ သန်းခုလိုင်းဂူမာ ယေရှုရဲ့ လောန်းတော်ဟို့ သံဂြိုဟ်ဟားလေဟယ်။

20

လောန်းမွှာဘဲဟူဂူကြောန်း

(မသံ ၂၈.၁-၈; မာကု ၁၆.၁-၈; လုကာ ၂၄.၁-၁၂)

¹ နန်းနေ့နေ့ မိုးလန်းခန် မှော်နနေဒူးခီမာ မာဂဒလဝါ သူ မာရိဟာ သန်းခုလိုင်းဟို့ ရော့-က်လာဘီး ကုလော့-က် တောင်းဟို့ ဂူဝဟုနေ ဖယ်ဟားဇာဟို့ တွံရလေဟယ်။

² သူဟာ ရှိမုန်ပေတရုန ယေရှုရှစ်တော်မူဟူ တခြားတ ဗွဲတော်နားဟို့ ပုလေးဟားဘီး “သခင်ဘုရားဟို့ သန်းခုလို င်းဟုနေ သူးနို့ ယူဟားဘီး ဖယ်နေရာမာ ထားဟားဂေဟု

ယ် ဆိုဇာဟို နို့လေသိဂေဟ့!” ဆိုဘီး သူးနို့ဟို ပြောပြလေဟယ်။

3 အယ်န ပေတရုန တခြားတမဲ့တော်ဟာ သန်းခလိုင်းဟို သွားဂေလေဟယ်။

4 သူးနို့နွေယော့-က်ဟာ တူးဒုပုလေးဟားဂေဘေမဲ့ တခြားတမဲ့တော်ဟာ ပေတရုထတ် ပြန်းပြန်းပုလေးဟားဘီး သန်းခလိုင်းဟို ရင်ဦးဆောင်း ရော့-က်ဟားဟယ်။

5 သူဟာ ငေါက်ကေလိုက်ဟူဇာ ပိဖုလူလေဘဲ တို့လေဟယ်။ အယ်ဘေမဲ့ သူဟာ ထဲဟို ဝမ်ဘဲနေလေဟယ်။

6 နော့-က်ဟလိုက်လာဟူ ရှိမုန်ပေတရုဟာ ရော့-က်လာဘီး သန်းခလိုင်းဂူထဲဟို ဝမ်ဟားဟယ်။ သူဟာ ပိဖုလူန

7 ယေရှုရဲ့ ဦးခေါန်းတော်ဟို ပတ်ဟားဟူ ပိဖုလူဟိုဘဲ တို့ရဟယ်။ ဦးခေါန်းတော်ဟ ပိဖုလူဟာ တခြားပိဖုလူလေနတူးဒု မေ့ဘဲ တခြားစီရှိနေလေဟယ်။

8 အယ်ဘီးန သန်းခလိုင်းဂူဟို ရင်ဦးဆောင်း ရော့-က်နေဟူ တခြားတမဲ့တော်လည်း ထဲဟို ဝမ်ဟားလေဟယ်။ အယ်လူဟာ မြင်ဟားဘီး ယောင်ကြည်လေဟယ်။

9 ကိုယ်တော်ဟာ သေဘီးန ပုလန်ရှင်ရမယ် ဆိုဘီး ပြောဟားဟူ ကျမ်းစာဟို သူးနို့လေ နားလည်ဂေသေးဟ့။

10 အယ်ဘီးန တမဲ့တော်နွေပါးဟာ အီဟို ပုလန်ဟားလေဟယ်။

ယေရှုဟာ မာဂဒလဝါသူ မာရီ ကိုယ်ထန်ရှားပြဟူ

ကြောန်း

(မသဲ ၂၈.၉,၁၀; မာကု ၁၆.၉-၁၁)

¹¹ မာရိဟာ သန်းခလိုင်ဂူပုလန်မာ ငိုဘီး ရပ်နေဟယ်။
သူဟာ ငိုနေဒူးမာဘဲ သန်းခလိုင်ဂူထဲဟို ငိုကေလိုက်ဇာ

¹² ကောန်းဂန်တမန်နေပါးဟာ ဝတ်ရောင်ဖုလူဟို ဝတ်
ဟားဘီး ယေရှုလောင်းတော်ရဲ့ ခေါင်းရင်းမာတပါး၊ ခေ
ရင်းမာတပါး ထိုင်နေဇာဟို မြင်လေဟယ်။

¹³ သူးနိုဟ “မီးမဂီး၊ ပြားဖြစ်ကြောန် ငိုနေရနူး” ဆိုဘီး
သူ့ဟို မေးဂေဟယ်။

သူဟ “ကျွန်မရဲ့ သခင်ဟို သူးနိုယူဆောန်ဟားဘီး ဖယ်
မာထားဟားဟယ် ဆိုဇာဟို သိဟ!” ဆိုဘီး ပုလန်ဖြေလေ
ဟယ်။

¹⁴ အယ်ဘီးန နှော-က်ဟို လှည့်ကေလိုက်ဇာ ယေရှုဟာ
ရပ်တော်မူနေဇာဟို မြင်ဘေမဲ့ ယေရှုဖြစ်ဟယ် ဆိုဇာဟို
သိဟ။

¹⁵ ယေရှုဟ “မီးမဂီး၊ ပြားဖြစ်ကြောန် ငိုနေရနူး။ နန်ဟာ
ဖယ်လူဟို ရှာနေဟယ်နူး။” ဆိုဘီး သူ့ဟို မေးတော်မူလေ
ဟယ်။

မာရိဟာ ကိုယ်တော့ဟို ဥယျဉ်မှူး ဆိုဘီး ထန်နေဟ
ယ်။ အယ်ကြောန် သူဟာ ကိုယ်တော့ဟို ပြောလိုက်ဇာဟ
“ဆရာ၊ သူ့ဟို ယူဆောန်ဟားဟယ် ဆိုဟာ ဖယ်နားမာထား
ဟားဟယ် ဆိုဇာဟို ကျွန်မဟို ပြောပြပါ။ ကျွန်မသွားဘီး
ယူပါမယ်။”

16 ယေရှုဟု “မာရိ!” ဆိုဘီး သူ့ဟို ခေါ်လေဟယ်။

မာရိဟာ လှည့်ဘီး ဟေမြဲစကားန “ရဗဗုနီ!” ဆိုဘီး ပုလန်ထူးလေဟယ်။ ရဗဗုနီရဲ့ ဓိပါယ်မာ “ဆရာ” ဖြစ်ဟယ်။

17 ယေရှုဟာ “ငါဟာ ဖနားဟို တတ်ရသေးဘဲဟူကြောန့် ငါ့ဟို ထိနအူး။ ငါ့ညီကိုလေနားဟို သွားဘီးဟာ ငါ့ရဲ့ဖဖြစ်ဟူ နန်းနီရဲ့ဖ၊ ငါ့ရဲ့ဘုရားသခင်ဖြစ်ဟူ နန်းနီရဲ့ဘုရားသခင်နားဟို ငါတတ်ရအူးမယ် ဆိုဇာဟို ပြောပါ” ဆိုဘီး သူ့ဟို မိန့်တော်မူလေဟယ်။

18 အယ်ကြောန့် မာဂဒလဝါသူ မာရိဟာ တမဲ့တော်လေနားဟို သွားဘီး သခင်ဘုရားဟို တွံဟွားကြောန်းနကိုယ်တော် မိန့်တော်မူဟွားဟူ ဇာလေဟို ပြောပြလေဟယ်။

ယေရှုဟု တမဲ့တော်လေဟို ကိုယ်ထန်ရှားပြဟူကြောန့်

(မသဲ ၂၈.၁၆-၂၀; မာကု ၁၆.၁၄-၁၈; လုကာ ၂၄.၃၆-၄၉)

19 နန်းနွေနေ့ ညဉ့်ခန်းဖတ်မာ တမဲ့တော်လေဟာ ယုဒအာဏာပိုင်လေဟို ကြော့-က်ဟူကြောန့် ခွဗော့-က်လေပိဟွားဘီး စုဝီးနေဂေဟယ်။ အယ်ခီမာ ယေရှုဟာ ကြွလာတော်မူဘီး သူးနီလယ်မာ ရပ်တော်မူဘီး “နန်းနီနတူးဒ ငြိသတ်ရှင်း ရှိပါစေ” ဆိုဘီး မိန့်တော်မူလေဟယ်။

20 အယ်မျိုး မိန့်တော်မူဘီးန ကိုယ်တော်ရဲ့ လတ်တော်
န နံဘေးတော်ဟို့ တမဲ့တော်လေဟို့ ပြတော်မူလေဟယ်။
တမဲ့တော်လေဟာ သခင်ဘုရားဟို့ တို့မြင်ရဟူ ခီမာ ဝန်း
သာဂေ့လေဟယ်။

21 ယေရှုဟာ “နန်းနို့မာ ငြိသတ်မှုရှိစေ။ ဖဟာ ငါ့ဟို့
စေလွှတ်မျိုးဘဲ ငါလည်း နန်းနို့ဟို့ စေလွှတ်မယ်” ဆိုဘီး
သူးနို့ဟို့ ထပ်ဘီး မိန့်တော်မူလေဟယ်။

22 အယ်ဘီးန ကိုယ်တော်ဟာ တမဲ့တော်လေထတ်ဟို့ မူ
တော်မူဘီး “သန်ရှင်းဟူဝိညာဉ်တော်ဟို့ လတ်ခံဂေ့။

23 နန်းနို့ဟာ လူလေရဲ့ ပြစ်လေဟို့ ခွမ်လွှတ်မယ် ဆို
ဟာ သူးနို့ဟာ ပြစ်လေလွှတ်ဇာခံရမယ်။ နန်းနို့ဟာ သူးနို့
ရဲ့ ပြစ်လေဟို့ ခွမ်လွှတ်ဘဲဟာ ဆိုဟာ သူးနို့ဟာ ပြစ်လေ
လွှတ်ဇာခံရမယ်မူဟာ” ဆိုဘီး မိန့်တော်မူလေဟယ်။

ယေရှုန သောမ

24 ယေရှုကြွလာတော်မူဟူ ခီမာ တမဲ့တော် ဆယ့်နှေ့ပါး
ထဲဟာ တယော့-က်ဖြစ်ဟူ မြာဘုလူး ဆိုဘီး ခေါ်ဟူ သော
မဟာ သူးနို့နတူးဒူ မေ့ဟူ။

25 အယ်ကြောန့် တခြားတမဲ့တော်လေဟာ “နို့လေဟာ
သခင်ဘုရားဟို့ မြင်ရပီးဘီ!” ဆိုဘီး သူးဟို့ ပြောဂေ့ဟ
ယ်။

သောမဟာ “လတ်တော်မာ သံရိုက်ရာဟို့ မြင်ရဘဲန၊
သံရိုက်ရာဟို့ တို့စမ်းရဘဲန၊ နံဘေးတော်ဟို့ လတ်ညှိုးန

စမ်းသပ်ရဘဲနဲ့ ငါယောင်ကြည်တို့ မူဟ” ဆိုဘီး သူးနို့ဟို ပြောလေဟယ်။

26 တဘတ်ကြာဘီးနဲ့ တမဲ့တော်လေဟာ အီထဲမာ ပုလန် စုဝီနေဟူ ခီမာ သောမလည်း သူးနို့နဲ့တူးဒု ရှိနေလေဟယ်။ ခွဗော့-က်လေဟို ပိဟားဘေမဲ့ ယေရှုဟာ ကြွလာတော်မူဘီး သူးနို့လယ်မာ ရပ်တော်မူဘီးဟာ “နန်းနို့မာ ငြိသတ်မူရှိစေ” ဆိုဘီး မိန့်တော်မူလေဟယ်။

27 အယ်ဘီးနဲ့ ကိုယ်တော်ဟာ “နန်းရဲ့လတ်ညှိုးနဲ့ အယ်နေရာဟို တို့ဘီးဟာ ငါ့လတ်လေဟိုကေ့။ အယ်ဘီးဟာ နန်းလတ်ဟို ဆန့်ဘီး ငါန့်ဘေးဟို စမ်းသပ်ကေ့။ သံသယ မှော့ဘဲနဲ့ ယောင်ကြည်ပါ!” ဆိုဘီး သောမဟို မိန့်တော်မူလေဟယ်။

28 သော မ ဟာ “ကျွန် တော့် သခင်၊ ကျွန် တော့် ဘုရားသခင်!” ဆိုဘီး ကိုယ်တော့်ဟို လျှော့-က်လေဟယ်။

29 ယေရှုဟာ “နန်ဟာ ငါ့ဟို မြင်ရဟူကြောန့် ယောင်ကြည်ဇာလော။ ငါ့ဟို မြင်ဘဲနဲ့ ယောင်ကြည်ဟူ လူလေဟာ မင်္ဂလာရှိဟယ်!” ဆိုဘီးသူဟို မိန့်တော်မူလေဟယ်။

အယ်ကျမ်းရဲ့ ရည်ရွယ်ချစ်

30 အယ်ကျမ်းထဲမာ ရေးဟားဘဲဟူ တခြားနိမိတ်လတ် ခဏာလေ ဘောင်ဂီးဟိုလည်း တမဲ့တော်လေရှေ့မာ ယေရှုဟာ ပြတော်မူလေဟယ်။

31 အယ်ဘေမဲ့ ယေရှုဟာ ဘုရားသခင်ရဲ့ သားတော် မေရှိယ ဖြစ်တော်မူဟယ် ဆိုဇာဟို့ နန်းနို့ ယောင်ကြည်ဂေဟို့န အယ်မျိုး ယောင်ကြည်ဇာအားဖြင့်* ကိုယ်တော့်နာမနှိုက်သတ်ဟို့ ရရှိဟို့တွပ် အယ်မူဇာလေဟို့ ရေးဟူးဇာဖြစ်ဟယ်။

21

ယေရှုဟာ တမဲ့တော်ခွန်နေ့ပါးဟို့ ကိုယ်ထန်ရှားပြတော်မူကြောင်း

1 အယ်ဘီးန ယေရှုဟာ တိဗေရီအိုင်နားမာ တမဲ့တော်လေဟို့ နေ့-က်တခါ ကိုယ်ထန်ရှားပြတော်မူဟယ်။ ကိုယ်ထန်ရှားပြဇာဟာ အယ်မျိုးဖြစ်ဟယ်။

2 ရှိမုန်ပေတရု၊ မြာဘုလူး ဆိုဘီး ခေါ်ဟူ သောမ၊ ဂါလိလဲနယ်၊ ကာနမြို့သား နာသနေလ၊ ဇေဗေဒဲရဲ့သားလေနတခြားတမဲ့တော် နေ့ယော့-က်ဟာ တူးဒူရှိနေဂေဟယ်။

3 ရှိမုန်ပေတရုဟာ “ငါ ငါးသွားဖမ်းမယ်” ဆိုဘီး တခြားလူလေဟို့ ပြောလေဟယ်။

သူးနို့ဟာ “နို့လေလည်းလိုက်မယ်” ဆိုဘီး ပုလန်ပြောဂေဟယ်။ အယ်ကြောန် သူးနို့ဟာ လေန ငါးဖမ်းထွပ်ဟူးဂေဟယ်။ အယ်ဘေမဲ့ အယ်ညဉ်မာ တကောန်လည်း ဖမ်းမိဂေဟယ်။

* 20:31 **၂၀.၃၁** ယောင်ကြည်ဇာအားဖြင့်၊ တချို့ မူရင်းလတ်ရေးမူလမာ ဆစ်ဘီးဟာ ယောင်ကြည်ဂေ၊ ဆိုဘီး ပါရှိဟယ်။ 21:3 **၂၁.၃** လု ၅.၅

4 မိုးလန်းဇာမာ ယေရှုဟာ ကမ်းနားမာ ရပ်နေဘေမဲ့ လည်း တမဲ့တော်လေဟာ ယေရှုဖြစ်ဟယ် ဆိုဇာဟို့ သိဂေဟဲ့။

5 အယ်န ယေရှုဟာ “မိဆွေလေ၊ ငါးကောန်လည်းဖမ်း မိဟုလော” ဆိုဘီး သူးနို့ဟို့ မေးတော်မူလေဟယ်။

သူးနို့ဟာ “ကောန်လည်းမိဟဲ့” ဆိုဘီး ပုလန်ဖြေလေဟယ်။

6 ကိုယ်တော်ဟာ “နန်းနို့လှေရဲ့ ညာဖတ်ဟို့ ပိုက်ဟို့ ပစ်ခလဂေ။ အယ်ဆိုဟာ နန်းနို့ဟာ ငါးလေဟို့ ဖမ်းမိလှေမယ်” ဆိုဘီး သူးနို့ဟို့ မိန့်တော်မူလေဟယ်။ အယ်ကြောန် သူးနို့ဟာ ပိုက်ဟို့ ပစ်ခလလိုက်ဇာ ငါးလေဘောင်ဂီးမိနေကြောန် ပိုက်ဟို့ ဆွဲဒန်ဟို့ ခွန်အားမေ့ဟမ်း။

7 ယေရှုရှစ်တော်မူဟူ တမဲ့တော်ဟာ “သခင်ဘုရား ဘဲ့!” ဆိုဘီး ရှိမုန်ပေတရုဟို့ ပြောလေဟယ်။ သူဟာ သခင်ဘုရားဖြစ်ဟယ် ဆိုဇာဟို့ ပေတရုကြားလိုက်ခီမာ ခလွတ်ဟားဟူ ပုလန်အန်းဂီဟို့ ခါးမာပတ်ဘီးဟာ ရေထဲဟို့ ခုခလဟားလေဟယ်။

8 တခြားတမဲ့တော်လေဟာ ငါးနုပုလဲနေဟူပိုက်ဟို့ ဆွဲဒန်ဘီးဟာ လှေစီးဘီး ကမ်းနားဟို့ လာဂေဟယ်။ သူးနို့ဟာ ကမ်းဟုနေ ကိုက်တရာလော့-က်ဘဲ့ ဝီးဂေဟယ်။

9 သူးနို့ဟာ ကမ်းထတ်ဟို့ ရော့-က်ဟူ ခီမာ မီးဘောင်ထတ်မာ ကန်ဟားဟူ ငါးနု မုန့်နဲဟားဟို့ တွံဟားဂေဟယ်။

10 ယေရှုဟာ “နန်းနို့ ခုဖမ်းလာဟူ ငါးနဲဟွား ယူလာ
ဂေ” ဆိုဘီး သူးနို့ဟို့ မိန်တော်မူလေဟယ်။

11 ရှိမုန်ပေတရုဟာ လှေထတ်ဟို့ တတ်ဟွားဘီး ငါးဂီး
လေနပုလဲနေဟူ ပိုက်ကွန်ဟို့ ကမ်းထတ်ဟို့ ဆွဲဒန်လိုက်ဟူ
ခီမာ အားလောင်းပေါန်း ၁၅၃ ကောန် ရှိဟယ်။ အယ်မျ
လောက် ငါးလေဘောင်ဂီး ဖမ်းမိဘေမဲ့လည်း ပိုက်ဟာ စု
ပုလဲဟူ။

12 ယေရှုဟာ “လာစားဂေ” ဆိုဘီး သူးနို့ဟို့ မိန်တော်မူ
လေဟယ်။ တဗွဲတော်လေဟု သခင်ဘုရားဖြစ်တော်မူဟ
ယ် ဆိုဇာဟို့ သိနေဟူကြောန့် “ကိုယ်တော်ဟာ ဖယ်သူးနူး”
ဆိုဘီးလည်း မေးရဲဂေဟူ။

13 အယ်ကြောန့် ယေရှုဟာ သူးနို့နားဟို့ ကြွလာတော်မူ
ဘီး မဟို့ယူဘီးဟာ ပေးလေဟယ်။ အယ်မျိုးဘဲ ငါးဟို့
လည်း ယူဘီးဟာ ပေးလေဟယ်။

14 ယေရှုဟာ သေရာဟုနေ ထမြော-က်တော်မူဘီးန တ
ဗွဲတော်လေဟို့ ကိုယ်ထန်ရှားပြဇာဟာ တတိယခါ ဖြစ်လေ
ဟယ်။

ယေရှုန ပေတရု

15 တဗွဲတော်လေ စားဂေဘီးန ယေရှုဟာ “ယောဟန်ရဲ့
သား ရှိမုန်၊ သူးနို့ ငါ့ဟို့ ရှစ်ဇာထတ် နန်ဟာ ငါ့ဟို့ ပိုဘီး ရှ
စ်ဘဲလော” ဆိုဘီး ရှိမုန်ပေတရုဟို့ မေးတော်မူလေဟယ်။

ပေတရုဟု “မှန်ပါဟုယ် သခင်၊ ကိုယ်တော့်ဟို့ ကျွန်တော်ရှစ်ဟုယ် ဆိုဇာဟို့ ကိုယ်တော်သိပါဟုယ်” ဆိုဘီး ပုလန်ဖြေလေဟုယ်။

ယေရှုဟု “ငါ့ရဲ့သိုးသားဂန်းလေဟို့ ကျွေးမွေးပါ” ဆိုဘီး သူ့ဟို့ မိန့်တော်မူလေဟုယ်။

¹⁶ ယေရှုဟု “ယောဟန်ရဲ့သား ရှိမုန်၊ ငါ့ဟို့ ရှစ်ဘဲလော” ဆိုဘီး သူ့ဟို့ ဒုတိယခါ မေးတော်မူလေဟုယ်။

ပေတရုဟု “ရှစ်ပါဟုယ် သခင်၊ ကျွန်တော် ရှစ်ဟုယ် ဆိုဇာဟို့ ကိုယ်တော်သိပါဟုယ်” ဆိုဘီး ပုလန်ဖြေလေဟုယ်။

ယေရှုဟု “ငါ့သိုးလေဟို့ ကေ့ရှုပါ” ဆိုဘီး သူ့ဟို့ မိန့်တော်မူလေဟုယ်။

¹⁷ ယေရှုဟု “ယောဟန်ရဲ့သား ရှိမုန်၊ ငါ့ဟို့ ရှစ်ဘဲလော” ဆိုဘီး သူ့ဟို့ တတိယခါ မေးတော်မူလေဟုယ်။

ယေရှုဟု သောင်းခါ မေးတော်မူဟူကြောန်၊ ပေတရုဟု ဝန်းနဲဟူးဘီး “သခင်၊ ကိုယ်တော်ဟု ဂူလောင်းဟို့ သိတော်မူဟူကြောန်၊ ကိုယ်တော့်ဟို့ ကျွန်တော်ရှစ်ဟုယ် ဆိုဇာဟို့ ကိုယ်တော်သိပါဟုယ်!” ဆိုဘီး ကိုယ်တော့်ဟို့ ပုလန်လျှော့-က်လေဟုယ်။

ယေရှုဟု “ငါ့သိုးလေဟို့ ကေ့ရှုပါ။

¹⁸ နန်းနို့ဟို့ ငါ မှန်တိုင်းပြောမယ်၊ နန်ဟု ငယ်ရွယ်ဒူးခီမာ နန်ဝတ်ရှင်ဇာဟို့ ဝတ်ဘီး နန်သွားရှင်ဟူနေရာဟို့ သွားနိုင်ဟုယ်။ အယ်ဘေမဲ့ နန်ဟု အိုဟူးဟူ ခီမာ နန်

လတ်နေ့ဖတ်ဟို့ ဆန့်ဟူးဘီး ယော့-က်ယော့-က်ဟ နန့်
ဟို့ ဝတ်ဆင်ဘီးဟာ နန့်သွားရှင်ဘဲဟူ နေရာဟို့ ယူဆောန်
ဟူးလေ့မယ်” ဆိုဘီး သူ့ဟို့ မိန့်တော်မူလေဟယ်။

¹⁹ အယ်မျိုးပြောနေဇာဟု ပေတရုဟာ အယ်မျိုးနည်း
လမ်းန သေရဇာအားဖြင့် ဘုရားသခင်ရဲ့ ဖောင်းသရေ
တော်ဟို့ ထန်ရှားစေမယ် ဆိုဇာဟို့ ယေရှုဟာ ဖော်ပြနေဇာ
ဖြစ်ဟယ်။ အယ်ဘီးန ယေရှုဟာ “ငါ့နော့-က်လိုက်ဟူး!”
ဆိုဘီး သူ့ဟို့ မိန့်တော်မူလေဟယ်။

ယေရှုန တဗွားတဗွားတော်

²⁰ ပေတရုဟာ လှည့်ကော့လိုက်ဘီး သူ့နော့-က်မာ ယေရှု
ရှစ်တော်မူဟူ တဗွားတော်ဟို့ မြင်လေဟယ်။ အယ်လူဟာ
ညဉ့်ဇာစားဟူ ခီမာ ယေရှုဟို့ မှီဘီး “သခင်၊ ကိုယ်တော့်
ဟို့ သစ်စာဖော့-က်မယ့်လူဟာ ဖယ်သုနူး” ဆိုဘီး မေးဟူ
လူဖြစ်ဟယ်။

²¹ ပေတရုဟာ အယ်တဗွားတော်ဟို့ မြင်ဟူ ခီမာ “သခင်၊
အယ်လူဟာ ဖယ်မျိုးဖြစ်လေ့မယ်နူး” ဆိုဘီး ယေရှုဟို့
မေးလေဟယ်။

²² ယေရှုဟာ “ငါပုလန်ကြွလာမယ့်ခီထိ သူ့ဟို့ သတ်ရှင်
စေဟို့ ငါလိုရှိဟယ် ဆိုဟာ နန့်နုဖြားဆိုင်နူး။ ငါ့နော့-က်
ဟို့ လိုက်ဟူး!” ဆိုဘီး ပုလန်ဖြေတော်မူလေဟယ်။

²³ အယ်ကြောန့် အယ်တဗွားတော်ဟာ သေဟို့ မူဟု ဆိုဘီး
အယ်ဒန်းဟာ ယေရှုရဲ့ နော့-က်တော်လိုက်လေထဲမာ ပုလုံ

ဟူးလေဟယ်။ အယ်ဘေမဲ့ ယေရှုဟာ အယ်တမဲ့တော်
သေဟို့ မူဟာ ဆိုဘီး မိန့်တော်မူဇာ မူဟာ။ ကိုယ်တော်ဟာ
“ငါပုလန်ကြွလာမယ့်ခီထံ သူဟို့ သတ်ရှင်စေဟို့ ငါလိုရှိဟာ
ယ် ဆိုဟာ နန့်နုးဆိုင်နူး” ဆိုဘီး မိန့်တော်မူလေဟယ်။

²⁴ အယ်ကြောန်းရာလေဟို့ သတ်သေခံဘီး ရေးဟူးလူ
ဟာ အယ်တမဲ့တော်ဘဲ့ ဖြစ်ဟယ်။ သူသတ်သေခံချစ်လေ
ဟာ မှန်ဘဲ့ဖြစ်ဟယ် ဆိုဇာဟို့ နို့လေသိဂေဟယ်။

နိဂေါင်း

²⁵ ယေရှုပြုတော်မူဟူ တခြားဇာလေဟာ ဘောင်ဂီးရှိ
သေးဟယ်။ အယ်မူဇာလေ ဂူလောင်းဟို့ မှတ်တမ်းတန်
ဟူးမယ် ဆိုဟာ ကျမ်းလေဟို့ အယ်လောကမာ ထားဇာ
နေရာမေ့ဟို့ မူဟာ ဆိုဘီး ထန်မိဟယ်။

ဓမ္မသစ်ကျမ်း ထားဝယ်ဘာသာစကား
The Holy Bible in the Tavoyan language of
Myanmar: ဓမ္မသစ်ကျမ်း ထားဝယ်ဘာသာစကား

copyright © 2024 The Word for the World International

Language: (Tavoyan)

Contributor: The Word for the World International

ထားဝယ် ဓမ္မသစ်ကျမ်း

The New Testament in Dawei Language

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

0c63f106-1001-58e4-ad11-6f62c327c4e1